



AA
520
Se 631

Classics
CAGE





Des Antiquites,
Le troisieme liure translaté
d'italien en franchois,

3



Avery

AA

520

Se631

Le troisieme liure de Sebastien Serlio B.

Auquel sont figurez & descriptz les Antiquitez de Rome,
& aultres, estantz tant es Itales que dehors, translaté
de l'italien en franchois .

CHAP. IIII.



N T R E tous edifices antiques qui en Rome se voyent, me semble le Pantheon (pour vne seule piece d'œuvre) estre le plus beau, le plus entier, & le mieulx entendu: Et est daultant plus merueilleux de tous aultres, parce que icelluy a plusieurs membres, ensemble si tresbien concordantz au corps, que toutes personnes voyans vne telle & si belle correspondance, se trouuent dicelluy entierement satisfaitz: Ce qui cause que l'Architect le quel en fut inuenteur, eust la plus parfaite forme, asscauoir, la rotundite, dont procede qu'icelluy Pantheon communement sapelle Nostre dame la ronde: car par le dedens ya autant de largeur que de haulteur. Et parauenture que ledict Architect considerant que toutes choses ordonneement procedantes, ont seul & principal chief, duquel sortent & descendent les membres inferieures, vueillant aussi que cestuy Edifice eust vne seule lumiere, & icelle en la superieure partie, a celle fin quen toutes places egaleement elle sespande, comme en effect lon apparceoit ainsy faire. Et par desus toutes choses ayant leurs lumieres parfaites, principalement ya les six chapelles, lesquelles a l'occasion destre faitz en dedens l'espaisseur du mur, deburoient estre vmbreuses, & neantmoins ont leurs appartenantes lumieres, ce qui procede d'aucunes attirantes fenestres suruenantes sur lesdites chapelles, qui leur fait rendre la seconde lumiere prinse de l'ouerture den hault, tellement quen icelles chapelles n'ayent chose si petite qui n'aye sa partie dicelle lumiere: ce qui na este fait sans grand iudice & ymagination. Et entendu aussi qu'icelluy temple estant d'ancien temps dedie a tous les dieux, qui cauoir y auoir plusieurs ymages (comme la diuersite des tabernacles, nichetz, & fenestrelles le demonstrent) & a vng chescun dicelles appartenir leur iour droiturier: Parquoy doncques quiconques ayant & prenant plaisir en statues, & aultres choses de relieue, bien appartient d'auoir vng cabinet fait de sorte telle que son iour suruient den hault, a celle fin, quen laissant chescune chose sur sa place, ne leur couint avec la piece aller ailleurs emprunter aucun iour. Or pour venir a nostre premier propos, pource que le Pantheon me semble estre la plus parfaite architecture que iamais aye veue, m'a semblé bon le mesme poser icy au premier rencq & pour vng chief de tous aultres edifices.

Le fondateur de ce Temple (selon ce que Plin recite en plusieurs places) fut Marcus Agrippa, pour accomplir la volonte de Auguste Cesar, lequel preueni de la mort, ne le peult faire. Parainsy fut ce Temple edifie enuyron la quatorzieme annee de nostre Seigneur, qui vient a estre enuyron Cinq mil, deux centz & trois ans du commencement du monde. En ce dessus dict Temple (selon Plin) estoient les chapiteaulx de cuyure. Il escript aussi que Diogenes tailleur d'ymages Athenien fait les tresprisees Cariatides aux piliers. Et aussi que les statues posees sur le pignon ou frontispice estoient fort extimees. Combien que par la grande haulteur de la place nestoient celebrees. Ce temple fut frappe de la foudre & brusle enuyron la douziesme annee de Lempereur Traian, qui vient aux ans de Nostre Seigneur enuyron Cent & treize, & du commencement du monde Cinq mil, trois centz, & vnze ans. Dont Lucius Septimius Seuerus, & Marcus Aurelius Antoninus le firent reparer avec tous ses aornementz, come sensuyt par l'inscription de l'architrabe du pignon: lesquelz aornementz lon peult croire estre refaitz tout de nouueau, car autrement les Cariatides de Diogenes y apparteniroient encor veoir. Mais certainement l'Architect qui les ordonna, fut tresiudicieux & constant d'auoir avec si bon ordre si bien concorde & alliene les membres avec le corps, ne vueillant par beaucoup de taille opprimer l'œuvre: mais (comme en son lieu sera plus amplement recite) les sceust bien saigement entrepartyr. Mesmes en toute icelle œuvre obserua il l'ordre Corinthe, & ny

A ii


vous

DES ANTIQVITES

voulut mesler aucuns aultres ordres : & avec ce sont toutes les mesures si bien obseruees en tous les membres, q̄ oncques aye veu ny mesure en nulles œures : parquoy au vray lon peult iuger & appeller ce Temple vng vray exemple d'Architeſture . Depoſant doncques ces raisons conſiderant eſtre extimees de Larchiteſt de petite efficace, retourneray aux particulieres mesures : & affin quen ces Antiquitez nous procedions par bonne ordonnance, ſy ſera Lichnographie la premiere figure, la ſeconde ſera Lorthographie, & la troiſieſme la Sciographie .

La figure ſuyuante eſt doncques Lichnographie, ceſt la platte forme de ce temple deſuſdit, lequel eſt mesure avec lantique ou ancienne palme Romaine cy au coſte figuree . Et premierement parlant du portique ou auantportail, duquel les coulomnes ſont deſpeſſeur ſix palmes & .xxix. minutes. Les entrecolomnes (ceſt a dire, leſpace dune coulomme a aultre) contiennēt huit palmes & neuf minutes. La largeur de ce portique eſt de quarante palmes. Les largeurs des platz pilliers dudit portique ſont comme le diametre des coulomnes . La largeur des nichetz ou nids entre les pilliers ſont de .x. palmes : & les pilastres auſſy des coſtez ſont de deux palmes . La largeur de la porte contient vingt & ſix palmes & demye . La largeur du Temple entier, aſſcauoir le pauement depuis lung des murs a lautre, contient cent & .xciii. palmes : & aultant egaleement contient la haulteur depuis ledit pauez iuſques a linferieur bort de louuerure denhault. Ladite ouuerture eſt de trente & ſix palmes & demye . Les ſix chappelles faiſtes en leſpeſſeur du mur ſont larges cheſcune de vingt & ſix palmes & .xxx. minutes, & entrent la moitie au mur, reſerué leſpeſſeur des pilliers quarez des coſtez : mais la principale chapel le eſt de trente palmes de large, & eſt auſſy dung demy cercle reſte les pilliers des coſtez prediſtz. La groſſeur des coulomnes de toutes les chappelles ſont chūne de cinq palmes, moins trois minutes . Le ſemblable contiennent auſſy les pilliers carrez des cantons deſdictes chappelles . Les coulomnes des tabernacles entre les chappelles ſont cheſcune de deux palmes de groſſeur. Leſpeſſeur du mur enuyronnant tout le temple eſt de trente & vne palme. Et combien que leſdictes chappelles envuydent aſſez le mur dicelles, ſi reſte il toutesſois encor dedens lediſt mur placettes creuſes, leſquelles aucuns veulent dire eſtre reſeruees pour ſortementz des ventz, adcauſe de tremblement de terre : Neantmoins il meſt aduis que pluſtoſt ſont eſte delaiſſees vuydes pour eſparner leſtoſſe, a loccaſion que leſdictes faiſtes en maniere de demy cercle, ſuffiſent aſſez en fortreſſe. La montee que lon voit au coſte ſeneſtre, eſtoit auſſy au coſte dextre pour monter ſur le portiq; . Lon alloit auſſy par icelle montee a lentour du temple par deſſus les chappelles, & ce par vneallee ſecrete qui encor y eſt, avec laquelle lon va auſſy dehors aux degrez pour iuſques au ſommet de ledifice monter par pluſieurs montees qui a lentour ſont . Lon extime que ce fondement eſtoit vne ſeule entiere maſſe, occupant & tenant du dehors beaucoup de place : ce que pluſieurs voiſins ontz apperceuz, parce que icculx vueillant edifier, & en tirant la terre hors ontz trouuez telz fondementz.


Vecy lancienne palme Romaine, compartie en douze doigtz, & vng cheſcun doigt eſt encor party en quatre parties, & ſont appellee minutes : Par laquelle mesure ceſte preſente edifice avec toutes ſes ſuyuantes parties ſont mesurees.



DES ANTIQVITES

La forme du Pantheon par dehors.

Ceste inferieure figure demonstre la totale forme du Pantheon droictement a le veoir de front. Et combien que pour l'heure a l'entree lon y descend aulcunes degrez, touteffois au cōmencement de sa fondacion estoit de sept degrez esleue de terre. Cest bien raison que telle ancienne œuvre soit encor si tresentiere, a l'ocasion que ses fondementz ne furent faictz de poure & lasche couraige : car lon tient que au desoubz estoit en double largeur contre le dessus, ainsy q̄ par les voisins a este trouue. Or venons aux particuliers mesures depuis la terre amont. Cy deuant iay dict que le diametre des coulomnes du portique contient six palmes & .xxix. minutes: mais leurs haulteurs sont de .liiii. palmes & .xxix. minutes, sans bases ny chapiteaulx: Chescune base est haulte trois palmes & .xix. minu. Les chapiteaulx sont haultz sept palm. & xxxvii. minut. La haulteur de l'architrave est de cinq palmes. La phrise est haulte cinq palm. & .xiii. minutes. La cornice contient quatre palmes & .ix. minut. Le timpane (cest le plat du frontispice) extime lon que entierement estoit aorne de figures d'argent, combien quen nulles escriptures ne l'aye trouue par escript. Mais considerant la grande puissance & richesse de relz Empereurs. mest aduis qu'ainsy peult auoir este. Car si les Gotz, Wandalz, & aultres nations, lesquelles pillerent Rome plus dune fois, eussent cuyure desirez, ilz en eurent peu saisir de l'architrave & aultres aornementz dudit portique, dont il est garny a foison. Neantmoins cōment quil en soit, les enseignes demonstrent quil ya heu figures d'aulcuns metaulx.






La partie du Temple par dedens.


Estre figure suyuantte demonstre le dedens du Pantheon. Laquelle forme (comme dit est) est prinse de la Sphere, parce que dung mur a aultre est de pareille largeur comme la haulteur depuis le pauement embas iusques a louverture denhaut. Laquelle largeur & haulteur contiennent chescune Cent nonante & quatre palmes: Depuis le pauement iusques au dessus de la superieure corniche, & depuis la corniche iusques au plus hault de la voeure sont pareilles mesures, Ascauoir chescune de la meite de Cent .xciiij. palmes. Les quadratures qui se voyent en la voeure, sont toutes egales a celle du mitant: & dicelles se trouue diuerses opinions, disantz qu'elles estoient enrichies de plattes d'argent cizelees a l'ocasion d'aucuns vestiges que encor pour l'heure lon y appareoit. Car si telz aornementz fussent estez de cuyure, lon les y trouueroit encor: ou les aultres du portique fussent aussi estez raues.

Que nulluy ne s'esmerueille que en ces choses (desirant perspective) lon n'aperçoit nulz pauementz ny aultres raccourcissementz: car ie lay seulement voulu tirer hors du plant, pour demonstrier sa haulteur par mesures. A celle fin, quicelle ne fut absconsee & euanoye p^r le raccourcissement. Mais le tout reseruant iusques au Liure de la perspective, la ou ie demonstrey toutes choses selon le vray raccourcissement, & ce en diuerses manieres, ascauoir, en superficies, en beaucoupz de corps, & en plusieurs manoirs a ce duysantz. De la corniche embas pour le present ne touchera y de la diuersite des mesures, car cy apres ie demonstrey les figures pieces par pieces, en donnant dicelles particulieres mesures.

La chapelle du mitant, nonobstant que tresbien soit concordante avec tout l'aultre ouuraige, toutesfoi si est ce l'opinion de plusieurs, quelle n'est pas antique, a cause que son arcure corrompt les cinq pilliers, Qui est vne chose que i'amaies les vrayz Antiques n'ont vsez, mais presuppont quicelle soit este du temps des Crestiens eslargie & faicte plus grande q^{ue} les aultres: come tousiours aux temples des crestiens ya vng autel plus grand q^{ue} les aultres.




Cest ornement se trouue encoire en estre dessus le porti^q du panthe^o, & est fait de telle mode tout p tables de cuyure: le demy cercle ny est point, mais il y auoit vne sup^{ice} curue de cuiure fort enrichie. Plusieurs tiennent ausly ceste opinion, q lenrichissement auoit este darg^t, a locasion q cy deuant est dit: mais de q^{lle} matiere elle a estee, lon nen sceit pour vray: Neantmoins tant ya quil conuint q ce debuoit estre oeuvre excellentem^t belle oultre mesure, au regard de ce q encor pour le iourdhy lon peult veoir en effect.





Este figure cy embas demonstre la veue du dedens du portique, lequel est fort aorne & enrichy de marbre, tant aux costez comme deuant, & avec ce ausly par dehors. Combien q par la longanimité de temps est fort adnichille. Les quatre pilliers sont canellez par tel nombre de canalz comme en desoubz lon peult apparcevoir. Et pource que les rondes coulomnes sont plus estroictes enhault que le diametre, la ou le fond de larchitrabe est de semblable espaisseur de la coulomme, vueillant doncques associer larchitrabe avec les pilliers carrez, lesquelz en la superieure partie point ne samoindrent, par ainsy le fond neust trouue son perpendicle, car il eust aultant defaillly que ladmoindrissement de la ronde colomne: Dont le prudent Architecte volut larchitrabe tant eslargir droict sur les quatre pilliers, q parce telles choses se trouuent bien aornees. Quant a la porte, la largeur est de vingt palmes & deux minutes, & la haulteur quarante palmes & quatre minu. Des aultres particuliers mesures traicteray plus amplement cy apres.





Ceste base est l'ung des
platz pilliers, estantz
au deuxiesme ordre au
circuit du temple, les-
quelz parce quilz se loi-
gnent fort de la veue,
ont vng astragal pour
deux, affin de non cor-
rompre ou admoindrir
l'œuvre.



La proportion de ceste porte quāt
a la largeur & haulteur, il en est
dit, mais son pilastre ou antipag-
mète est large de l'huictiesme par-
tie de l'ouuerture du iour: & com-
bien qu'ainsi soit q Vitruue fasse le
pilastre tant de la doricque q de la
Ionicq enuyron de la sixiesme par-
tie: ce neantmoins n'est messeant
a cestuy cy, parce qu'il est corinthe
Car les colones corinthes sont plus
delitieuses q aultres. Encor semble
estre d'autant plus espes, quant les
costez sont de bonne profondeur,
en sorte que a loel (en comprenant
l'ung avec lautre) ne semble estre
si estroict comme il est en effect.

Les pilastres des costez, & le su-
percile ou architrabe de dessus, dist
on que le tout est d'une piece: &
quāt a moy, n'ay trouue en icelluy
nulz separementz. Les mesures
particulieres se trouuēt cy au cosle



Ceste corniche, frise, & architra-
be vient dessus la porte du Pan-
theon. Et quant a leurs mesures
l'architrabe ou supercile est de
l'huictiesme partie du iour: La
frise parce q'elle n'est taillee, con-
tiēt la troiziesme partie moins
que le supercile. La corniche est
haulte comme ledict supercile:
Les aultres membres sont pro-
portionnez apres le grand. Par
quoy avec le compas legiere-
ment se porra comprendre &
trouuer le residu.

DES ANTIQVITES


Pour & affin de demonstrier toutes les parties de ce triumpant tres beau & bien assemble edifice, est besoing & fort necessaire d'icelluy vertir & tourner par plusieurs costez. Et pource ayant cy deuant demonstree la face en maiesse, avec toutes choses qui de front se peultent apparcevoir: Maintenant feray demonstration, tant du portique ou portail, comme de l'entree du temple d'un costé droictement ainsi qu'il est. Et quant a la declaration des mesures, Les grosseurs & haulteurs tant des colonnes come des pilastres sont este cy deuant asses amplement recetees: Parquoy n'est besoing d'en plus mentionner, mais suffit assez de veoir la dispositiõ des choses par dedens: Lesquelles combien qu'elles soient en petite forme, si suyvent elles toutesfois leurs mesures droicturieres & proportionnees selon le grand: Les petitz pilliers estantz a l'entree de ce temple, sont quarrez en maniere de pilastres, desquelz cy apres feray des mesures la declaration: Car ilz seruent aussi aux coings des chapelles dedens le circuit du temple: Et aultant que les espaces de ces trois entrecolumnes contiennent, aultant aussi s'estendoit la volseure de cuyure dequoy cy deuant est mentionné.



IE ne me veulx entremesler de coucher par escript toutes les mesures de chescune canella ture ou caeure des colonnes qui sont en grand nombre au Pantheon, mais des colonnes qui sont au deuant de la grande chapelle, pource qu'elles sont de si belle & triumpante efica ce, n'ay voulu delaissier a en bailler quelque cognoissance. Parquoy ceste figure cy desoubz designee par A & B, representent l'œuvre des canaulx desdictes deux colonnes de la grand chapelle, asscauoir sur le plat & sur le debout. Touchant a la forme & façon il est suffisamment demonsté par icelles deux figures, doncques maintenant voulons nous faire ouuerture des mesures: Les canalz sont en nombre de vingt & quatre, & vng chescun canal est large neuf minutes & demye. Le boizel ou thore avec les deux quadretz ou filletz, comprennent ensemble quatre minutes & demye. Car le thore contient trois minutes, par ainsy reste vne minute & demye, & icelles comparties en deux viennēt pour chascun quadret estre trois quart d'une minute: Ceste caeure est fort agreable aux regardantz, & samblable œuvre se trouue a la Basilica *del foro transitorio*, pour decoration d'une porte, comme au quatriesme liure est mentionné. La base marqué de C. est vne d'icelles colonnes de la deuandiste grande chapelle dans le Pantheon, duquel la haulteur est de deux palmes vnze minutes & demye: Et est en tel le maniere compartie que le plinthe inferieur est de dixneuf minutes en haulteur. Le thore inferieur, contient dixsept minutes, & le quadret de dessus contient trois minutes & demye. La premiere schotie, ou trochille, est de huit minutes & vne troisieme partie. Le quadret desoubz lastragal est d'une demye minute. Le semblable contient aussy l'autre suruenant sur ledict astragal. Les deux astragalz contiennent six minutes & demye, par ainsy vient chescun astragal a tenir trois minutes & vng quart. La seconde schotie venant dessus lesdict astragal est de six minutes: Le supercille (de Vitruue ainsy nommé) ou le quadret desoubz le deuxiesme thore est d'une minute. Le thore est hault sept minutes & deux tiers. La cinde, cest le lieu de la colonne dessus le thore, combien quil ne soit de la base, contient trois minutes: La saillie de la dessusdicte base, est de vingt & trois minutes proportionnees en la maniere cy desoubz demonsté.




Ceste figure fuyuante represente vne partie du dedens d'icelluy Pantheon, asscauoir du pauement iusques a la seconde corniche, qui la tribune ou volsure ronde supporte, lon voit aussy par dessus icelle corniche le commencement de la caeure quaree du dessusdicte tribune. Pareillement demonstre ceste figure en l'inferieure partie la largeur de l'une des six Chappelles, desquelles en ya deux en figures de demy cercles: Et les aultres quatre en forme d'vng quadrangule: neantmoins si sont elles toutesfix en face egalz. Chescune d'icelles chappelles ont deux rondes colonnes, & les coings ont leurs pilliers quarez, sicomme au plant prefigure, & en figure fuyuante lon peult apparcevoir. Et combien qu'icelle chappelle ne soit mise en perspective par laquelle lon porroit cognoistre si cest vne ronde ou quaree chappelle, ce qui est delaisse a celle fin, qu'elle demeure en sa mesure: Mais ce nonobstant ceste presente est posee pour vne quaree, laquelle on cognoit a la forme des fenestres feinctes estants dedens ceste chappelle, car les aultres circuyroient beaucoup plus. Les grosseurs de ces dictes colonnes sont chescune de cinq palmes trois minutes moins. La haulteur de chescune base est de deux palmes & vingt & vne minutes: La haulteur des coulomnes sans chapiteaux est pour chescune de quarante palmes: Les chapiteaux sont haultz cinq palmes & trente minutes: Par ainsy contient chescune colonne avec bases & chapiteaux quarante huit palmes. La haulteur de l'architrabe, phrise, & corniche, montent ensemble treize palmes & demye: Et ycelle haulteur se comparte en dix diuisions: les trois sont pour l'architrabe, aultre trois pour le zophore ou frize, & les aultres quattres restantes seront pour la corniche: De la reste des aultres membres n'en metz aucunes aultres mesures, par ce que ceste figure est transmise proportionneement du principal en ceste forme, laquelle cy de coste est posee, signee de .P. la ou lon peult veritablement comprendre le bon iudice & ingeniosite de l'Architecte, lequel ioinchant en icelle les mutiles, n'a voulu au mesme tailler les dentilles pour non point tumber en l'erreur cōmune: La ou tant d'anticques ont estez suffoquez: & pour le iourd'uy encor beaucoup plus des modernes. Ceste erreur, dequoy ie parle, est ceste: Que toutes corniches ayantz mutiles, & en ycelles les dentilles tailles sont vitieuses, & de Vitruue totalement deiectez au quatriesme liure, chapitre deuxiesme. Et combien que ceste corniche soit formee avecques dentiles, ce neantmoins a l'occasion quilz ne sont taillez, ne les doit on condempner en ceste endroict. Dessus ceste corniche ya vne podie ou basement, lequel en haulteur contient sept palmes & six minutes, & est de petite saillie, pour cause que les pilliers saillent aussy petitement hors du mur: la haulteur d'icelles ensemble l'architrabe, phrise, & corniche, est de trente palmes & .xxxvi. minu. Et ycelle haulteur diuisee en cinq, l'une d'icelles est pour l'architrabe, phrise, & corniche, lesquelz architrabe, phrise, & corniche sont proportionnez apres le grand, & est cy au coste marquez de .M. En ceste corniche, & mesmes en l'architrabe sont les membres compartis, en partie tailles, & en aultre non tailles, en sorte qu'elle n'absconse sa forme, mais plustost par l'entremesleure des membres taillez avec les non taillez, se trouue par ce en ycelle vne grace merueilleuse. La fenestre de dessus la chappelle est pour seruir a icelle de lumiere, laquelle lumiere nonobstant quelle ne soit la principale, ce neantmoins a l'occasion qu'elle est radiante attiree de la superieure ouuerture, qui cause ladicte chappelle obtenir par icelle sa lumiere duysante. Entre les pilliers, & mesmes dessus les fenestres, sont ioinctes diuerses pierres fines: Et la frize de la premiere corniche est d'vng profil tressin.



DES ANTIQVITES

Ceste figure denote l'vng des tabernacles qui sont entre les chappelles. Et les pilliers des costez representent les pilliers quarrez estantz sur les coings des chapelles, De rechief lon aperçoit icy la belle ingeniosite de cest Architecte, lequel vueillant, l'architrabe, phrize, & corniche conduire sur le mur, & considerant que les pilliers quarrez estantz




aux deux costez, ne s'elloiét tant hors du mur que on y eust peu enfermer la totalle proiecture de la corniche, fait seulement la Scime, & la reste des aultres membres couuertit il en vne fascie, parquoy tel œuvre se trouue modeste & gracieux associât l'ordre: les deux feinctes fenestrelles presuppõe on, q̃ ce s'õt este places d'ydoles: Le base mēt dudiēt tabernacle est de neuf palmes & douze minutes: La grosseur de la colonne contiēt deux palmes, la haulteur est de seize palmes sans base ny chapiteau. Les bases sont haultz vne palme, L'altitude des chapiteaux est pour chescun de deux palmes & demye. L'architrabe contient vne palme, aultāt fait la frize, laquelle est toute de fin profil. Mais la haulteur de la corniche cōporte vne palme & demye: le frontispice est hault de cinq palmes. L'architrabe suruenant sur les .ij. grandz pilliers tient vne palme & trois quartz. Quāt aux aultres mesures, seront plus amplement cy après declarees Et de ce present tabernacle en ya .iij. pignons pointuz, & aultres .iij. couverts en rond ascaoir de la quatriesme partie du cercle.

CEs quatre figures cy designees, sont membres des tabernacles au grandt, cōme les lettres A.B.C.D. demonstrent: Des mesures quāt aux haulteurs sont cy deuant mentionnees. De la reste suffise a l'architect que toutes choses sont de membre en membre trāfferez & redigez du grant fort proportionnement en ceste forme presente, combié que par aduerture aux estudiés de Vitruue porra ceste cornice sembler de trop grāde haulteur, au regard de l'architrave & de la frise, & pour moyne la feroie de si grande altitude. Neantmoins la mesme apperceuant en son lieu la q̃lle ait grosse distāce, n'estant aussy de trop grāde haulteur, demōstre bōne proportiō. Le chapiteau s'elloigne des escriptures de Vitruue, car il est plus hault sans Abacus q̃ ne declaire ledict Vitruue avec l'abacus: nonobstant q̃ selon la cōmune opiniō sont les plus beaux chapiteaux qui soiēt en Rome, & non pas seulement les chapiteaux des tabernacles, mais aussy ceulx des chapelles sont de telle forme. Et ceulx aussy du portail: Tellement q̃ a mon iugement (cōme au principe iay mentionné) n'ay trouuē nulz edifices faictz avec plus grāde obseruance d'ordre que ceste cy. Et si ie vouloie icelles toutes coucher par escript, tant celles du dedens que du dehors, ie seroie trouuē par aduerture trop prolix. Parquoy feray fin de ceste merueilleuse edifice, en ensuyuant apres aultres antiquitez.



DES ANTIQVITES

C Et temple de Bacchus est fort antique, & suffisamment entier, il est aussi fort riche d'œuvre, de belles pierres, & de muzaycque, tant au pavement comme en la muraille, & aussi en la tribune ou voûte ronde du mitant, mesmes aussi en la voûte de l'ambulation, & est celluy fait selon l'ordre composite. L'entier diametre de dedens de mur a mur coûte C. palmes de longueur, de quoy le corps du mitant environné de colonnes contient L. palmes: Aux entrecolumnes ie trouue grande différence, quant aux distances de l'une a l'autre, a l'occasion que la moienne entrecolonne par ou lon entre du portique au temple, tient neuf palmes & trente minutes, & l'autre a l'opposite ne contient que neuf palmes & neuf minutes. Celles qui sont a l'endroit des grandz nids, ont chacune huit palmes & trente une minutes. Et des autres quatre restantes entrecolumnes, les aucuns contiennent sept palmes & huit minutes, & autres sept palmes douze minutes: La largeur du dedens de l'entree, & aussi de la chapelle quarrée droict a l'opposite, s'uyent sur les entrecolumnes: Pareillemēt s'uyent aussi les largeurs des deux grandz nids, ou chapelles rondes leurs entrecolumnes: Les autres niches sont larges sept palmes & cinq minutes. Les mesures du portail de deuant, peult on prendre hors des mesures du temple, lequel portail est voûte rond: Droict au dehors de ce portail estoit une ambulation avec une galerie tout alentour, fait en forme ouale, duquel la longueur contenoit cinq centz & octant huit palmes: Et estoit au mitant large. C. & xl. palmes: Et selon qu'on voit aux vestiges, estoit fort aorne de coulomnes, ainsi qu'en la figure lon peult appercevoir.




I Ay cy deuant faict ostention tant du plant ou platte forme de ce temple, comme de ses mesures: Maintenant demonstreray cy desoubz l'orthographie pour le veoir par dedens: Car par dehors est entierement sans enrichissemens. La haulteur depuis le pauement iusques au plus hault de la volseure, contient octante & six palmes. La grosseur d'une chescune colomne est de deux palmes & quatorze minutes: Leurs haulteurs sont de vingt & deux palmes & vnze minutes. La haulteur de chescune base comporte vne palme & sept minutes. La haulteur de chescun chapiteau est de deux palmes & vng quart. L'altitude de l'architrabe tient vne palme & vng quart: aultant aussy contient la frize. Mais la haulteur de la corniche comporte deux palmes & demye. Et quant aux particulieres membres, comme corniches, bases, & chapiteaux, sont icy desoubz proportionnees apres le grant, & signees sur leurs lieux, sic comme lon voit par les carracteres. Ce temple est dedens Rome a present dediez a S. Agnes.




DES ANTIQVITES


Ceste ichnographie cy desoubz, & la predicte ambulation au deuant dudict temple de Bachus enuironnee d'une loge ou gallerie, ainſy que par pluſieurs enſeignes fort ruynees lon peult comprendre. Et tout a lentour d'une cheſcune entrecolonne y auoit vng nichet aorne de petites colonnettes. En dedens lequel nichet y peult auoir eſte vne ydole. Et ainſy comme dict eſt, eſtoit ce courtil ou ambulation en forme oual, & neantmoins fort long, aſſcauoir de cinq centz & octantehuit palmes. Et cent & quarante palmes de large.



Le temple de Bachus comme i'ay dict eſt fort riche de pluſieurs aornementz & de diuerſes compartimentz, leſquelz en partie (mais non tout) ay voulu demonſtrer, dont ces trois inuentionz cy desoubz figurez, ſe trouuent au meſme temple: lesaulcuns de belles pierres, les aultres de muſaycque.




CE temple de Paix feit Lempereur Vespasien edifier apres du marche de Rome, lequel temple est de Pline fort extime. Car il estoit fort enrichy de sculptures, & avec œuvre de Stucco. Et encor sans iceulx aornementz dudiect tēple, lediect Empereur Vespasien apres le decez de Nero feit en icelluy poser toutes les ymages & figures, tant de cuyure que de marbre, lesquelles lediect Empereur Nero auoit rassemble de diuerses places, & nestoient icelles figures en petit nombre. Et encor q̄ plus est, feit aussy lediect Vespasien au mesme temple poser la contrefaicture de luy & de ses enfans faictes d'ung mabre nouveau trouue, venant Dethiope, appelle Bassalto, ayant couleur de fer, vne estoiffe qui pour lors estoit fort extime. Au prediect temple y auoit en la principale chapelle vne statue ou ymage de marbre blanc fort grande, faicte de plusieurs pieces: desquelz reliques lon trouue assez a Campidoglio, Et entre autres pieces ya la vng pied, duq̄l l'ongle du grand doigt est si ample que ayseement me suis assis dessus. Par lequel lon peult comprendre la grandeur d'icelle: laquelle on voit aussy estre faicte d'ung bon maistre.



DES ANTIQVITES


CE Temple dessusdict est mesuré par aulnes, & icelle est diuisee en douze portions appellees onces. La ligne doncques qui est au long du plant dudit temple, est demye aulne. Premièrement la longueur du portique ou portail est enuiron de .C. & .xxxij. aulnes : & sa largeur est de quinze aulnes. La largeur des nids au deuant du portail contient dix aulnes. La grosseur des pilliers de l'entree sont de cinq aulnes, & les entredeux d'vng pillier a aultre sont de dix aulnes. Les entrees des deux costez, tant du portail que du temple, sont larges seize aulnes. La longueur du temple entier est enuiron de cent & septante aulnes. La largeur contient cent vingt & cinq aulnes. La Capitale place du mitant tient cinquante & trois aulnes. Les costez des pilastres a lencontre desquelz reposent les colonnes rondes, sont de neuf aulnes & demye : Et la grosseur desdictes coulommnes sont chescune de quatre aulnes, quatre onces & demye, & sont canallees : lesquelz canalz sont en nombre de vingt & quatre. La caueure d'vng chescun canal est large cinq onces : & ses quadretz ou filletz sont chescun d'vne once & demye. La largeur de la principale chapelle est enuiron de trente & deux aulnes, & est d'vng demy cercle. Celles des costez marquee par A & B, sont .xxxvij. aulnes de large, & entrent seize aulnes dedens le mur : ce qui est moins de demy cercle. L'espeſſeur du mur enuironnât le temple, est de douze aulnes : cōbien qu'en plusieurs places se trouue moins espez, pour cause soubzarcures. La circonférence des chapelles est de six aulnes d'espeſſeur. L'entredeux d'vng pillastre a aultre contient xlv. aulnes. De plusieurs nichetz, fenestrelles, & aultres choses particulieres, peult on comprendre par les deuandictes mesures : car la figure est vrayement proportionnee. Quant a l'orthographie, elle est denoté par ceste figure suyuant estante en pied. Et parce que le plant est fort couuert des ruynes, n'a este impossible de pouoir mesurer, du plant iusques a la scime, mais pour aultant que i'ay ſceu comprendre hors dudit plant & des ruynes q̄ lon y apperceoit, i'en ay faict cest eslieuemēt, & la conuient entendre pour l'ung des costez du temple. Je ne suis pas bien certain si les coulommnes auoient leurs pedestalz ou non, pource que lon ne voit les piedz desdictes colonnes : Et bien que ainſy soit que Pline aye ceste edifice fort louee, si a il touteſſois plusieurs choses mal correspondantes : Et principalement la corniche de dessus les colonnes, laquelle ne ſa compaignie avec nulles choses quelconques, mais demeure ſeule nue & eſgaree.



Ceste edifice est appelée Le temple de Pieté. Ce temple est entièrement fait d'une pierre crue, laquelle est la nommée Tiburtin, après le Tibre : Mais pource qu'icelle pierre est fort espongieuse & plaine de trous, on l'avoit couverte d'une amplasre appelée Stucco. Et est fort ruinée. Car lon ny voit nulles apparences de fenestres, ce neantmoins ie les ay mis en ce plant, la ou elles dussent le mieulx.

Ceste edifice est mesurée d'une aulne, laquelle est diuisée en .lx. minutes, Et la ligne courante au long du mitât de ce plant, est la troisieme partie de l'aulne précédente. Premièrement chescune colonne est grosse vne aulne & .xviij. min. Les entrecolumnes sont chescune de trois aulnes & .xiiij. minut. La largeur de la porte cõtient quatre aulnes & .xiiij. minu. & demye. L'espeuseur du mur est d'une aulne & vingt minutes. La longueur du temple est de dix huit aulnes et .xx. minutes. La largeur du temple cõtient huit aulnes & trente minutes.


La gallerie entourant le tẽple auoit platte volseure, avecque parques carrez. Mais quant a la volseure de la large place estante au deuant du dict temple, nen peult on trouuer la maniere, pour cause de la grande ruine. Les colonnes de ce temple nont nulz bases, ne nulles cinctes, ny proiectures, mais sont debout & nudz sur leur plant. Et furent aussy faictes (comme dict est) de Tibertyn couuert de Stucco. Ce temple auoit le frontispice deuant & derriere.






DES ANTIQVITES

L A haulteur des colonnes avec leurs chapiteaux, sont de trois minutes moins de dix aulnes . Leurs grosseurs embas (comme dict est) contiennent vne aulne & dixhuiet minutes: & leurs grosseurs d'enhault sont d'une aulne & quinze minutes: la haulteur des chapiteaux est de dixsept minutes: mais le Boizel & Cincte de la colonne y sont compris: la

haulteur de l'architrave est de trente & six minutes: la haulteur de la phrise est d'une aulne & cinquante six minutes: la corniche a vne aulne & huit minutes de haulteur . Et depuis la amont est le timpane hault deux aulnes & deux minutes. Les aultres mem bres particuliers designez par les caracteres sont cy decoste en forme grande, & avec grande dilige nce proportionnees apres le principal.



A Tiouli est ce present Temple sur vne Riuiere,
& lappelle lon Temple de Vesta. & est la plusgrand
part fort ruynez, il estoit tresbien conduict selon
l'ordre Corinthe: pardeuant est il esleue de terre,
ainsi quil est au basement, mais au derrier ya plus de
sept aulnes de muraille soubz ledict basement.





DES ANTIQVITES



CE Temple deuantdict est mesuré avec la derniere aulne de soixante minutes . Et
 premierement sont les colonnes grosses chescune d'une aulne & dix sept minu-
 tes : Les entrecolumnes contiennent, chescune deux aulnes & trente quatre mi-
 nutes : Entre les colonnes & le mur, ya deux aulnes & demye : Lespeueur du mur
 est d'une aulne & treize minutes : Le paument de dedens le temple, contient douze aulnes
 & demye. Le pedestal marqué par A, avec sa colonne & son aornement, sert a tout l'ordre de
 ce temple . La haulteur de la base du pedestal, est de quarante & cinq minutes . Et le champ
 ou plat dudiect pedestal tient deux aulnes, quarante huit minutes . La corniche d'icelluy est
 de trente sept minutes & demye de hault . La haulteur de la base de la colonne est de trente
 huit minutes & demye . Le troncq de la colonne & dix aulnes de hault . Le chapiteau con-
 tient vne aulne & vingt quatre minutes de haulteur . Larchitrabe, Frize, & Corniche, com-
 portent ensemble environ deux aulnes & demye de haulteur . Lhuys cy desoubz denoté par
 S & Y, contient en haulteur neuf aulnes. La largeur du iour, contient en l'inferieure par-
 tie, quatre aulnes & quatre minutes, Mais en la superieure partie, ne comporte que
 trois aulnes & cinquante cinq minutes, pource qu'en ladicte superiorite est re-
 stroissy, selon la doctrine de Vitruue. Lantipagment est large vingt deux mi-
 nutes & demye , mais le supercile (pour cause du restroictissement) ne
 contient que vingt & vne minutes. La prise tient trente minutes en
 haulteur , & la corniche vingt & quatre minutes . La fenestre
 marquee T & X, est large vne aulne & quarante six minutes
 & demye, & sa haulteur contient cinq aulnes & trois mi-
 nutes, & est icelle retroissie comme lhuys, Lantipag-
 ment est large trente & vne minutes & demye,
 La corniche contient le semblable. Et quant
 aux autres membres particuliers, yceulx
 sont mises en grande forme, avec les
 mesmes lectres marquees, & mi-
 ses dessus tresbien proporti-
 onnees: Ceste fenestre est
 besongnee tant par
 dedens, que
 par de-
 hors.

Vecy la troiziesme partie de l'aulne commune de soixante minutes, de laquelle ce
 temple dessusdict, & aussy le suyuant, furent mesurees.






DES ANTIQVITES





V dehors de Rome est ce present Temple fort ruyné, la plusgrande part faict & massonné de pierres cuytes: & ny voit on nulz de ces aornementz que icy i'ay esleue: mais par aultant que par le plant d'icelluy lon peult comprendre, mesmes considerant la proportionnee haulteur, peult estre qu'en telle forme & maniere pouoit auoir este, comme ces deux pieces au costez suyuantcs signee de A & B le demonstrent. Parquoy nous n'auons seulement que les mesures de l'ichnographie, ou le plant dudict temple, par lesquelles mesures lon peult comprendre l'œuvre de l'orthographie: Ceste ichnographie ou plant est mesuré avec l'ancienne palme Romaine: Et premierement la porte du temple est large, vingt & deux palmes: Le diametre de ce temple contient soixante & neuf palmes & demye: Les deux nids des costez, sont semblable a la porte en largeur: Et tel est aussi lhuys du petit temple, mesmes d'icelle largeur: De pareille largeur sont aussi les quatre chappelles la ou on entre dedens, Mais au derriere deuiennent elles pluslarges, pource que les murs des costez courent vers le centre de ce temple: Et ses quatre chappelles aultant que lon en peult comprendre, recoiuent des costez leurs lumieres: Le diametre du petit temple est long soixante & trois palmes: Les chapelletes, tant les creuses, que les auant boutantz, sont larges quinze palmes: mais quant ausdictes deux chappelles esleues ou auant boutant, ne peulx ymaginer comment ny en quelle maniere en la superieure partie elles pouoient prendre fin, pour cause qui ne se trouue debout aultant d'entier, parquoy lon porroit apperceuoir quelque apparence, sinon seulement vng commencement hors terre: & comme i'ay dict, com bien qu'ainsy soit, que lon ne voit en quelle forme cest edifice pouoit estre hors de terre, neantmoins i'ay bien voulu (selon mon opinion) mettre & dresser ceste orthographie: Et pourtant ceste partie de l'vng des costez marquee de la lectre B, represente vne piece du temple maieur: & laultre partie signee de la lectre A demonstre vne partie du petit temple.

L'ancienne palme Romaine de douze doigtz & quarante huict minutes.





DES ANTIQVITES

CE temple d'embas est hors de Rome trefruyné, estant la plusgrande part de pierres cuites, & n'est pas fort grand: lon ne peult ausly trouuer ny scauoir qu'il ayt heu aulcune clarte ou lumiere sinon par l'huy, & des fenestres suruenantes dessus la corniche. Tous les aultres creuz estoient places d'ydoles ou telles semblables. La mesure de ce temple fut perdu sur le chemin, combien que i'ay encor bien en memoire, qu'icelluy temple conte noit vng carre & demy, tant sur le plant qu'en la superieure partie: parquoy ne metz cy aulcunes aultres mesures, mais l'Architecte se porra ayder avecques la minute.





CE Temple est raisonnablement petit fait de pierres cuyttes, & est mesuré avec l'anciēne palme romaine. La longueur du portique contient .xl. palmes, & la largeur d'icelle seize palm.

L'ouverture de la porte est large dix palmes. Les nids de dedens sont tous d'une mesme largeur, ascauoir de .xiiii. palmes. L'espace d'entre les nids est de six palmes. La reste est mesuré de la veue: esti māt la haulteur depuis le paue ment iusques au desoubz de l'architrabe quarante palmes: & l'architrabe, frize, & corniche de neuf palmes. De la reste me fut aduis qu'en donnant a la coupe ou vol seure de dessus vne palme dressāte, par ainsy paruiendroit la totale haulteur a .lx. & dix palmes.



L'ancienne & antique palme Romaine.







CE present petit Temple, est hors de Rome, en partie faict de pierres de marbre & en partie de pierres cuyttes, & est fort ruyné. L'on tient, q̄ ce fut vne sepulture, estât de tous costez droitement en carreure: d'vng mur a aultre ya trente palmes de largeur. Lespeffeur dudict mur, est de deux palmes & demye: La largeur des chapelles sont chescune de dix palmes, la porte contient cinq palmes en largeur. La haulteur de chescune colonne avec base & chapiteau contiennent vingt & deux palmes & demye: La grosseur d'icelles, sont quelque peu plus de deux palmes, L'architrabe, frize & corniche, sont quatre palmes de haulteur. Depuis la cornice iusques en la superieuri-
te de la volseure, sont vnze palmes, Les arcures d'une chescune chapelle sont de vingt palmes.


CE temple cy desoubz demonstřé, est a *Tiuoly* pres de la Riuiere fort desrompu & ruyné lequel auoit le frontispice de front & du derriere : Les colonnes des costieres sont plus de la moitie hors du mur : La largeur de ce temple est d'vng mur a aultre de vnze aulnes, & est mesuré par icelle aulne de laquelle le temple de *Piete* est mesuré : La longueur de ce temple contient dixhuiet aulnes : L'espeſſeur du mur est d'vne aulne & vnze minutes. La grosseur des colonnes du portail sont chescune d'vne aulne & la troisieme part : Leurs haulteurs avec bases & chapiteaux comportēt pour chescune enuirō. xii. aulnes : la haulteur de l'architrabe, frise, & corniche, contiennent trois aulnes : le frōtispice depuis la corniche iusques au plus hault, trois aulnes : la haulteur du basement est de trois aulnes & demye . En la face de deuant nya nulle apparence de porte quelconque, ne pareillement de nulz nichetz, & ce pour cause des ruynes. Neantmoins l'ay voulu ainſy designer pour aornementz, parce qu'ainſy peult auoir esté, mesmes aussy lon ne voit au mur, ny au costez, ny semblablement au derriere aucunes fenestres, combien que ie l'aye cy mis en ce plant, la ou il ma semblez bon. Quant aux mesures des membres, tant du basement comme de la corniche d'en hault, ne declaireray particulierement, car ilz sont proportionnez apres l'antique, desquelz lon aperceoit encor aucuns pieces, & sont mises de coste de ledict temple signees par A B.

La troiziesme partie de l'aulne deuandiste.







Ombien que au commencement de ce present liure ay dict de seulement traicter des antiquitez, si ne veulx ie pourtant me retenir de traicter d'aulcunes choses modernes faictes de nostre temps, & principalement pource que noz predecesseurs ont heu si belle ingeniosite en l'art d'architecture. Au temps doncques de Iulio Secundo P. M. vng ouurier appellé Bramant de Casteldurante en la Duche Durbin, lequel fut vng homme si tresingenieux en l'art d'architecture, qu'on peult dire (auec l'ayde & auctorite que le dessusdict Pape luy donna) qu'il feit ressusciter la bonne Architecture, laquelle depuis les antiques iusques en son temps auoit estee ensepulie. Lequel Bramant en son temps conduysa le commencement de ce merueilleux edifice de Saint Pierre a Rōme: mais preueni de la mort, ne laissa seulement la fabricque imparfaicte, mais ausly la modelle qui demeura inacheuee en aulcunes parties. A raison dequoy plusieurs diuerses espritz se sont empeschez en tel affaire. Et entre aultres Raphael Durbin painctre mesmes ausly fort bien entendu en l'architecture, en ensuyuant les vestiges dudiect Bramant, feit ce porget, lequel a mon aduis est vne la plusbelle composition, de laquelle l'ingenieux Architecte se peult accommoder en diuerses choses. Je ne vous declaireray ny mesiray point toutes les mesures de ce temple, a cause (& par d'estre bien proportionné) que par vne partie des mesures lon porra trouuer la reste. Le dict Temple est mesuré auec l'antique palme Romaine: & ceste moyenne ambulation est vingt & deux palmes de large. Et icelles des costez contiennent chescune la moitie aultant. Par icelles deux mesures peult on comprendre la reste de toute la platte forme.




AV temps de Iulio Secundo trouua en Rome Balthasar Petrucio de Siens non pas seulement vng excellent paindre, mais aussi tresentendu & expert en l'architecture, lequel suyuant les vestiges du dessusdict Bramant, feist vne modelle en telle forme que cy desoubz est demonstre. Et ordonnoit que le temple eult quatre entrees, posant le grand autel droit au mitant dudit temple. Aux quatre coings ordonna il quatre Sacristies & reuesiaires, sur lesquelles lon edifieroit les clochers pour decoration, & principalement en la premiere face regardante vers le dedens de la ville. Ce present temple est mesure avec l'ancienne palme Romaine. Et premierement au mitant d'ung pilastre a aultre sont cent & quatre palmes. Le diametre du cercle du milieu est de cent & quatre vingtz palmes de longueur. Le diametre des quatre petit cercles est de septante & cinq palmes. Les reuesiaires sont chescune de cent palmes en largeur. Les quatre pilastres du mitant, sont quatre arcures, lesquelles soubstiennent & portent la lanterne. Et iceulz quatre arcqz sont tous parfaictz, desquelz la haulteur est de deux centz & vingt palmes. Et par dessus ces arcures couroit vne tribune ou lanterne fort enrichye de colonnes, avec leur ronde coupe ou volseure dessus, laquelle tribune ordonna ledict Bramant auant quil morut, duquel cy apres senfuyt le plant.



Ceste figure, que cy desoubz se demonstre, est le plant de la tribune ou lanterne qui baste enuironne les quatre arcures comme cy deuant est mentionne. Par lequel lon peult comprendre que Brâmant en tel endroit fut plushardy dentreprise que consideratif, a l'occasion que a vne telle grosse masse & de tel poix, eust este bien besoing pour l'asseurement d'icelle d'auoir vng tresbon & ferme fondement, & ne le point fonder sur quatre arcures de telle altitude. Et en confirmation de mes parolles, sont les quatre pilastres ensemble les arcures sans aultre pesanteur dessus, desia rassis & fenduz en aucunes places. Neantmoins pource que l'inuention est belle & bien enrichie, mesmes pour donner faueur a l'architecte, l'ay bien voulu icy poser en porget. Touttefois a celle fin que ie ne soye trop prolix a narrer les mesures, i'en mestray cy aucunes des plus principales, & la reste porra on trouuer par la petite palme. Laquelle au plant cy desoubz est posee, & est la longueur dicelle diuisee en cinq parties, & chesque ne d'icelle contient dix palmes, dont paruiet la totale longueur a cinquâte palmes, cõe par la partie du milieu lon peult cõprendre. Lespesseur de chũne colõne de dehors est de cinq palmes: lespesseur des deuxiesmes colom. en entrant, sont chũnes. iij. palm. lespesseur des troiziesmes sont chũes de. iij. palm. & .iij. quartz. La largeur de la tribune en dedens, contient cent. lxxxvij. palm. Le diametre de la petite lanterne du mitant, comporte. xxxvj. palm. La reste peult on ymager & mesurer par la petite palme.




Vecy l'orthographie du dedens & mesmes du dehors, attiree de la preterite ichnographie, par laquelle lon peut aduifer & comprendre la grosse masse & pesant fardeau, que ce fut este sur les deuandictes quatre arcures. Et laquelle masse (comme dit est) eust assez este au scauant architecte de pour penser & ymaginer a ledifier sur terre, & nō en aer & de telle haulteur, dont a mon iugement ie diz, que myeux vault l'architecte estre timide ou paoureux, que trop hardy & aventureux: car s'il est timide & craindant, il affirmera ces choses certaines, & ne repudiera le bon conseil d'aultruy: & en ce




faisant bien peu sera defaillant: Mais en estant trop courageux, il ne voudra s'uy-
ny entendre l'aduis d'aultruy, se assu-
rant seulement sur son scauoir & ingenio-
site, qui cause que souuentefois ses œu-
res tombent & paruiennēt a grand scan-
dale: Parquoy doncques ie conclud, que
trop grande audace procede de presump-
tion, & presumption de peu scauoir. Et
prefere que timidite est chose vertueu-
se, tousiours s'estimant ydiot & de petit
scauoir. Les mesures de ceste œuvre lon
trouuera par icelle palme deuandictē.

Ce plant cy desoubz figure, est duffy vne inuention de Bramant, combien que ne fut mis en oeuvre, laquelle se debuioit aller accorder avec le viel ouurage: La partie marquée de B, est leglise de Saint Pierre in montorio hors de Rome. Et la partie signee par A, est vñ viel monastere: Mais la partie du milieu fut ordonnee dudit Bramant, Jaccommodant de lancienne edification: La place ou est la lettre C, signifie vne loge ou gallerie avec quatre chapelles au coings dielle: La place D, est soubz laer descouuerte: La partie marquée de E, est vñg petit temple lequell ledit Bramant feist faire, Duquel les mesures en la suyuante marge seront specifiees Et demonstrées: Quant aux mesures de ce plant ne declare nullement, mais seulement lay cy pose pour cause de linuention.



DES ANTIQVITES

EN cest aultre coste de ce fœillet ay promis de monstrier ce petit temple de Bramât, leq̃l n'est de grande forme n'ayant esté faict que seulement pour memoire & souuenance de S. Pierre Apostre: car lon veult dire que sur la mesme place il fut crucifié. Lediēt temple est mesure avec l'anciē pied Romain, leq̃l pied est de .xvj. doigtz & chascun doigt est de quatre minutes, duquel lon trouuera les mesures par la palme Romaine, icelle accroissant de quatre doigtz. Le diametre de ce temple est de .xxv. piedz & .xxij. minut. La largeur de l'ambulation enuironnant le temple, est de sept piedz. Lespesseur des colomnes sont chescunes d'vng pied & .xxv. minu. La largeur de la porte est de trois piedz & demy. Les quadretz & petitz rondz de dedens enuyronnât lediēt temple, denotēt les lacunaires de la volseure suruenâte sur les colom. Lespesseur du mur est de cinq piedz. La reste des aultres mesures peult on comprendre par les premieres.




La moitié de l'ancien pied Romain.




Vecy l'orthographie ou esleuemēt du temple dessusdict, leq̃l represente la partie du dehors, estāt conduict entieremēt selon l'ordre doricque, cōme p ceste figure lon peut apparcevoir. Quāt aux mesures particulie


res a pnt m'en tairay, d'aultāt q̃ par le plant lon peut cest esleuemēt cōprendre: & com bien que celluy soit en petit, ce neātmoins est il ordonneement proportionne & transmis du grant en ceste forme.



OR puis que i'ay demonstre la partie exterieure de ce temple de S. Pierre, maintenant feray ostention de la partie interieure, laquelle (côme dit est) est faicte & conduite par bonne proportion, tellement que l'architecte porra facilement trouver par le moyen du plant tous les mesures appartenâtes. Et combien que ce temple semble estre trop hault au regard de sa largeur, a l'occasion d'exceder deux largeurs en hauteur: ce neâtmoins par l'ouuerture des fenestres, & ausy des midz quilz y sont, n'est telle altitude nial seante. Et principalemēt par les doubles cornices qui contournēt a l'entour: lesquelles (p leurs grandes piectures) couurēt beaucop d'icelle hauteur: qui cause q̄ lediet temple se monstre plus large aux regardantz qu'il n'est en effect.





Ceste edifice est audehors de Rome a S. Sebastien, & est entierement ruyne iusques a la terre, & principalemēt la loge ou ambulation circuyāt a lentour, excepte ledifice du mitant qui est encor tout entier, parce que cest vne œuure tresferme, & est faicte de pierres cuytes. En icelluy ny voit on aulcunes aornemens, & est aussy fort obscur, daultant quil n'ya aultre lumiere que celle quil entre par lhuyz, & par quelque petites fenestrelles suruenātes sur les nichtz. Lichnographie ou plant de ceste œuure est mesure par l'ancienne palme Romaine. La longueur, mesmes aussy la largeur, sont mesurees par verges, dont chescune verge contient dix palmes. Premieremēt la loge marquee A, est de .xlj. verges & .iij. palmes. Les deux aultres pluslongues contiennēt chescune .lvj. verges & .iij. palmes. La largeur dicelles est de .xxxij. palmes. Lespeſſeur de pilliers au coingz avec tous leurs membres sont chescun de douze palmes. Par lesquelles mesures legieremēt la reste est a comprendre. Touchant ledifice du mitant, la place signee B, est au descouuert, contenant en longueur sept verges & six palmes, & la largeur trois verges & quatre palmes. La partie C, est couverte, & contient quatre verges en carreure. Les quatre pilastres sont chūn dix pal. despeſſeur. La grosseur du mur enuironnāt ledifice est de .xxiiij. palmes. La place signee E, est volsee, dont la partie du milieu est vne masse soubſtenant ladicte volsee, ayant au mitant dicelle vne ouuerture. Ceste susdicte masse est garnie & enrichie de nichetz, lesquelz correspondent a ceulx qui sont au mur. Quant a la haulteur ie ne lay mesurē, a loccaſion de la ruyne, & en especial pource quil ny auoit nulle sumptuosite d'architecture digne de memoire.





E Theatre feist Augustus edifier foubz le nom de Marcello fon nepueu : qui caufe que ce Theatre pour l'heure s'appelle Le Theatre de Marcello, eftant en Rome. De cediſt Theatre encor lon en voit vne partie en eſtre & ſur pied, aſſcauoir la partie de la loge ou gallerie exterieure, & eſt ſeulement de deux ordres, l'vne de Doricque & l'autre de Ionicque. Vne œuvre en verite d'extimation : Combien que touteſſois les colonnes Doriques n'ayent nulz Baſes ne Scinte, ny auſſy aux tronqz d'icelles aucunes proieſtures, mais re poſent ſimplement ainſy (ſans aucunes choſes deſſoubz) ſur le plat d'icelle loge. Quant au plant de ce theatre n'aperceuoit on ſingulieres apparences. Touteſſois depuis n'aguieres le grant Patrice de Rome vucillant edifier vne habitation, dont vne partie d'ycelle ſuruenoit ſur ce theatre, & eſtant Baltazar de Sienes Architeſt fort expert, ordonnateur de la deſſuſdicte habitatiō, lequel en cauant les fondamentz trouua pluſieurs relicques des cornichementz de ce Theatre, & en deſcourant vne bonne partie d'icelluy, comprint lediſt Balthazar la totale ichnographie dudiſt Theatre, & le meſura par bonne diligence, poſant icelle en ceſte forme precedente, & moy meſme me trouuant enuyron ce meſme temps a Rome, apperceuz la vne grande partie deſdiſt cornichement ayans commodite a les meſurer. Et trouuant illec verita blement auſſy agreable & belle forme, que iamais euſſe veu en quelconques ruynes ancien nes, & principalemēt au chapiteau Doricque, meſmes auſſy aux impoſtes des arcures, leſquelz a mon aduis equiparent fort aux eſcriptures de Vitruue. Semblablement auſſy la phriſe, tri gliphes & methopes correspondent raiſonnablement. Mais la corniche Doricque, combien qu'elle ſoit fort riche de membres, & biē mencee ou beſongnee, touteſſois ſi trouuay icelle fort diſcordante aux eſcriptures de Vitruue. Car la meſme corniche eſtante aſſez licētieuſe de mem bres, eſt de telle haulteur, qu'elle contrarie a la proportion de l'architrabe & de la frize, & euſt ſuffit d'eſtre d'icelle haulteur les deux tiers. Parquoy, a mon aduis, me ſemble que par la li cence de ceſte ou d'autres choſes anticques, aucuns architeſtz modernes ne doibuent pour tant errer (i'entens errer, contrarier aux doſtrines de Vitruue) ne eſtre ſi oultre cuidez d'en treprendre a faire telle corniche ou autres choſes, de telle proportion qu'il a peu veoir & me ſurer, & en apres icelle meſtre en œuvre : pource qu'il ne ſuffit de dire ie le peulx faire d'aul tant que les anticques l'ont bien faiſt ſans conſiderer ſi elle eſt proportionnee au reſidu de l'edi fice. Et q̄ plus eſt, combien quil fut a tel ancien architeſt permis, ce pourtant ny debuons auoir regard, nous qui debuons (moyennāt que la raiſon le requiert) ſuyure les preceptz & doſtrines de Vitruue, comme guyde & reigle inſoruoyable, pour aultant que de ce temps, en ſa per ſonne n'a veu ny congneu meilleurs ne pluſparfaicte doſtrine d'architecture, que celle que le diſt Vitruue a monſtré par ſes eſcriptures. Et ſi nous apperceuons doncques en quelque aul tre ſcience vng chief & ſuperieur, auquel eſt octroyé & permis d'ajouter foy a ſes diſt & pa rolles : qui ſera celluy doncques qui renyera (ſi ce n'eſt qu'il ſoit ignorant) que lediſt Vitruue tient le degre ſuperieur en l'architecture, & que ſes eſcriptures (la ou il n'ya aucunes euidētes cauſes) doibuent eſtre tenuz ſeu, bonne, & inuiolable, luy adiouſtant foy plus qu'a milles œuvres faiſtes d'aucuns Romains : Combien que touteſſois iceulx Romains porroient auoir heu apprins des Grecz la plus parfaicte ordonnance quant a edifier, & que apres comme Do minateurs deſdiſt Grecz, peult eſtre adueni, qu'aucuns parce ſont deuenus oultre cuidez. Mais veritablemēt ſi eſtoit poſſible de pouoir veoir les merueilles d'œuvres, qu'a lors furent faiſtes, par leſdiſt Grecz, leſquelles ſont quaſi toutes abſconſees & miſes au bas par la lon ganimite du temps & meſmes des guerres : lon les iugeroit certainement, de beaucoup exceder les choſes des Latins. Doncques tous Architeſtz, condamnant & repudiant les eſcriptures dudiſt Vitruue, & principalement en place telle que ouuertemēt lon le peult entendre, cōme en l'ordre Doricque, dont pour l'heure ie parle, ſeront tenuz pour hereticqs & ydiorz en l'art d'Architecture, denyant & renonceant a tel Auſteur, lequel de long temps enſa & encor pour l'heure, eſt des ſaiges ſi bien approubez. Or maintenant ayant doncques faiſt ceſte courſe, la quelle eſtoit neceſſaire au grand bien & vtilite de tous ceulx qu'ilz ce n'ont conſidere, & re tournant doncques a propos, ie diſt que ce plant fut meſuré par l'ancien pied Romain. Et

premierement la place du milieu signee de la lettre A, laquelle se nomme Orchestra, est en diametre, cent & nonãte & neuf piedz, estant d'ung demy cercle : d'ung des boutz de l'ordre marquées de H, iusques a l'autre, ya quatre centz et dix sept piedz. La place signee B, appellee Proscenium, est du tout spacieuse : & la ou le C se demonstre, cest la loge ou gallerie quilz appellent Porticus de la Scena: au milieu de laquelle estoit le Pulpitre. La partie de la lettre D, estoit vng portail avec le degrez seruant des deux costez, lesquels alloient sur les places signees de E, qui s'appellent Holpitalia. Les deux galleries des costiers, marquées de G, vsoient ilz a eulx pourmener. Desquelles choses a present lon n'en voit hors de terre nulles apparences, pour cause d'estre couuert par la ruyne de l'autre edifice. Quant aux singulieres mesures, tant de la Scene que du Theatre, & des degrez, n'en declareray plus auant, a l'occasion qu'en Lamphitheatre autrement dict le Colisee, en traicteray tresamplement, par lequel lon porra comprendre, de quelle maniere cestuy cy a peu estre. Et touchant la partie du dehors enuironnant ledict Theatre, en demonstrey par la deuxiesme figure l'ortographie, laquelle fut mesuree avec vne aulne cõmune, compartie en douze portions, & icelles portions appellees onces, & chescune once ayant cinq minutes, cõme cy apres sera demonstre.




DES ANTIQVITES



Estre figure ensuyuant represente la partie exterieure du Theatre dessusdict, estant mesuré avec la deuandiste aulne. Et premieremēt les colonnes embas contiennent chescune en grosseur (asscauoir de la premiere ordre) vne aulne & quarante trois minutes. La haulteur des chapiteaux sont chescū de la moitie des grosseurs du diametre des colonnes: lequel chapiteau est plusamplemēt & myeulx formé au quatriesme liure en l'ordre Doricque foëillet E 2, & icelluy chapiteau est marqué de la lettre B. De pareille haulteur est aussy l'imposte soubstenant l'arcure, cōme celle dudiēt chapiteau, estant aussy audict foëillet, asscauoir E 2. Les pilastres aux costiers des colonnes, contiennent chescune dixneuf minut. La latitude d'vng chescun arcq, comporte sept aulnes & neuf minutes: & la haulteur dudiēt arcq, contient vnze aulnes & .xvi. minut. La haulteur de l'architrabe est de .xlix. minut. L'altitude de la phrise est d'une aulne & huit minut. La haulteur totale de la corniche contient vne aulne & .xl. minutes. L'ouuerture du second arcq qui est du deuxiesme ordre, est semblable a celle du desoubz: reste sa haulteur, qui est de dix aulnes & .xlviii. minutes. La haulteur du piedestal soubz les colonnes de ce second ordre, tient vne aulne & .xlviii. minutes. Lespefseur du chescune colonne est d'une aulne & vingtquatre minut. L'altitude de chescune colonne sans base ny chapiteau, est de vnze aulnes & vingt sept minutes. La haulteur d'iceulx bases sont chescun de quarante quatre minutes. La haulteur des chapiteaux asscauoir en dedens les volutes, depuis la petite bordure de la colōne iusques au sommet dudiēt chapiteau comporte trentefix minutes: mais la volute depend soubz l'astragal ou boisel vingt minutes & demye, ensemble comportant depuis le desoubz de ladicte volute iusques au hault de l'abacus, quarante six minutes & demye. La largeur dudiēt abacus seruant sur ladicte colonne est d'une aulne & demye. Reste la largeur des volutes, qui continnent deux aulnes. L'altitude de l'architrabe contient cinquante neuf minutes. La haulteur de la Phrise comporte cinquante huit minutes. Et la haulteur de la corniche est d'une aulne & quarante huit minutes. Laquelle corniche contient veritablement la moitie plus que son appartenance, si ainssy est qu'adioustrons foy aux escriptures de Vitruue. Neantmoins ie prie au discret lecteur, ce ne me vouloir reputer pour presumption, ne m'estimant aussy pour reprehendeur ou correcteur des œuures antiques, desquelles si grandement lon apprend. Car mon intention n'est seulement, sinon pour vous donner instruction, de ce qui est faict ou formé de bon entendement a l'opposite de ce qui est mal entendu, che que touttefois de moy mesmes ou a mon semblant ne veulx faire, comme si l'instruction sortist de moy: mais par l'auctorite dudiēt Vitruue, & aussy des bonnes antiquitez, qui sont celles, lesquelles a la pluspart s'accordent avec la doctrine d'icelluy aucteur. La Bale de cest second ordre, & son pedestal du desoubz l'imposte des arcqz, & avec ce l'architrabe, frise, & corniche, trouuera on le tout ensemble au quatriesme liure en l'ordre Ionicque au foëillet K. & sont toutes designees par T. Au mesmes liure trouues vous aussy le chapiteau au derriere foëillet I 3, marque par M.

La troiziesme portion de la dessusdict aulne de soixante minutes.









N Dalmatie ya vne ancienne ville appelee Pola, situee pres de la mer : en icelle ville lon trouue vne grande partie d'vng Theatre, a l'edification duquel l'ingenieux & subtil Architecte s'accommoda de la montaigne, contre laquelle il est basti, vsant d'icelle montaigne pour vne partie des degrez. Et en la pleine d'embas, y fait Lorchestra, la Scene, & aultres edifices appartenantz a tel œuure. Et pour dire la verite, les ruynes & les pieces que encor en icelle place ce trouuent, demonstrent bien auoir este vne tresriche & sumptueuse edifice de pierre & d'œuure : Et pardessus tout, comprend on illec grande quantite de colonnes, les aulcunes estantes seullettes, & aultres avec pilastres, & aussy aulcunes avec pilliers carrez & demy rondz, tous ensemble congregez & bien besongnez selon l'ordre Corinthe. Car l'entier œuure tant par dedens q̄ par dehors estoit conduict selon l'ordre Corinthe. Cest edifice fut mesure avec vng pied moderne, lequel se cōparte en douze portions, appellee onces : dequoy cy desoubz la moitie en est demonstree. La figure suyuant demonstre l'ichnographie & le profil dudit Theatre : duquel sensuyuent les mesures. Premièrement la largeur de Lorchestra, qui est en demy cercle, contient en diametre environ cent et trente piedz. Les degrez ou montee a l'entour avec les deux chemins ou voies, sont de septante piedz. La voye designee par T, est egale en haulteur a la pleine du Pulpitre de la Scene. La largeur du Porticq; environnant ledict Theatre, est de cinquante piedz. Et les costez des pilliers en dedens sont chescun de sept piedz et demy, mais les pilliers de front a l'entour de la gallerie, ensemble avec les coulomnes, contiennent environ cinq piedz en largeur. Et d'ung pillastre a aultre est environ dix pied de largeur : & est cecy selon le plant du deuantdict Theatre. Les deux grandz quarrez, marquez de O, sont appelees Hospitalia : de laquelle place lon alloit sur l'allee, signee par T, qui vient sur la rue iusques au demy degre, ainsi qu'on peult comprendre par le profil aussi signé de la lettre T. Et soubz ceste allee est la partie de l'entree. Les hospitalz sont de quarante cinq piedz :

La largeur de la Scene, contient vingt et vng pied : La latitude du Porticq; ou loge de deuant, est de vingt sept piedz, & la longueur contient cōme l'edifice : L'edifice estant esleue dessus le plant du Theatre, denote le profil dudit Theatre. L'arcure designee par A, signifie le pant : Les deux arcures C, & B, sont soubz les degrez. La corniche au coste, marquee D, est l'imposte de l'arcure. A ce Theatre ne conuenoit auoir nulles montees pour monter en hault, car la dessusdicte montaigne bailloit cōmodite et aysement pour aller dessus, & pouoit on aussi de la Scene venir sur le Theatre, a l'occasion destre alienez avec icelluy Theatre. Mais le Theatre de Marcello, se separe de la Scene, pource estoient en icelluy les montees par dedens vtiles & necessaires.

Vecy la moictie du commun pied, par lequel ce Theatre suyuant, ensemble tous ses aornementz est mesure.







DES ANTIQVITES



E Theatre (comme i'ay dict) estoit fort riche d'aornementz tout de dure pierres, conduict par œuure Corinthe, tresbien & richement besongne: Et par aultant que lon en peult apparcevoir aux reliques la gisantz semez & esgares, La Scene estoit fort riche & sumptueuse de colonnes sur colonnes, tant doubles que sengles, mesmes aussy tant en l'interieure partie cōme en l'exterieure, avec diuerfes aornementz des portes & de fenestres: L'interieurs parties de cest edifice sont fort ruynes. Et quant a la declaration des mesures d'icelluy ce sera de petite eficace, mais de l'exterieure partie en donneray aucunes mesures. Et premierement doncques, le premier ordre rusticq auquel n'ya nulles colonnes, est esleue de terre ensemble lentiere corniche marquee de E, enuyron seize piedz: La haulteur du premier pedestal, est de cinq piedz: L'altitude de chescune colonne avec base & chapiteau, est de vingt & deux piedz: L'espaisseur des pilliers avec les colonnes sont chescun de cinq piedz: La grosseur d'une colonne apart, est de deux piedz & demy: Les largeurs des arcures sont enuyron de dix piedz, & leurs haulteurs de vingt piedz: La haulteur de l'architrabe, frize, & corniche, est enuyron de cinq piedz: Le deuxiesme pedestal marquee de X, est de quatre piedz & demy en haulteur: La haulteur dicelles colonnes sont chescune enuyron de seize piedz: L'architrabe, frize, & corniche, est hault, quatre piedz: Quant aux membres particuliers nen faictz autre mention, parce quen la figure suyuant facilement sont iceulx a comprendre, lesquelz sont apres le grand iustement proportionnez: Mesmes touchant la Scene avec les aultres parties du dedens, n'en donne aucune mesure, mais seulement ay voulu poser cy apres le portique ou ambulation de la Scene, lequel est signé de la lettre P, dont en la superieure partie estoit ceste corniche frize & architrabe marquee par F, les chapiteaux signez par S, estoient par dedens, avecq aucunes demy colonnes rondes, esleues hors d'aucuns pilastres, choses tresbien faictes & besongnees: Toutes lesquelles choses (comme dict est) sont de si grande sumptuosite, tant les pierres cōme par la science, que bien deburoient estee equiparees a celles de Rome, La corniche, phrise, & architrabe, marquee par A, se veoit au sommet de ce theatre, La corniche signee par C, est celle de dessus les premiers arcures, La corniche marquee de D, est l'imposte de la premiere arcure, La corniche signee par E, circuyt & enuirōne le dessus de l'œuure rustique a l'entour de ledifice. Ceste ligne cy desoubz est le demy pied, du pied entier, duquel cest edifice fut mesuré. Ne vous esmerueilles, bien ayme lecteur, de ce que ie ne vous ay affirmatiuement & de plus pres mis toutes les mesures en plain, car la cause en est, que toutes ses choses de Pole furent mesurees d'vng lequel s'entendoit myeulx en l'art de pourtraicture, qu'il ne faisoit en aucuns nombres ou mesures.

Le demy pied par lequel ce present est mesure.










DES ANTIQVITES



A Ferente, ville tresantique, estante aupres de Viterbe, ya encor a present aucuns vestiges d'vng theatre fort ruyné, & simple d'ouuraiges & d'aornementz pour aultant que veoir lon peult: Car on ny a aucuns reliques par lesquelz lon porroit comprendre ses aornementz, sinon qu'on aperceoit au porticque circuyant ledict theatre y auoir este pilliers carrez. Les degrez ou montees estoient moult simples, combien que bonnement lon ne peult ymaginer, par leurs ruynes, comment y furent conduictz. La Scene de ce theatre est fort differente aux aultres, cōme par le plant de la figure suyuant lon peult apparcevoir. Mesmes n'ya aussy d'icelle Scene tant petit hors terre, parquoy lon puist comprendre en quel le forme ont este ladicte Scene, ny le Pulpite. Ceste ichnographie ou plant fut mesure par le pied anticque. Et pour le premier parlant de l'orchestra cotee A, lequel est d'vng demy cercle, son diametre est de cent & quarante piedz, & demy en longueur. Le corps entier de ce theatre, asscauoir depuis cest orchestra, iusques au bout des pilliers des angletz du porticque contient trente cinq piedz. Le pillier de l'anglet, est d'vng chescun coste cinq pied de large. L'entree dudit porticque au coste de la Scene, tient huiet piedz. La voulte soubz la montee, est de vingt & deux piedz. L'espeuteur du mur enuyronnant ledict orchestra, est de trois piedz & demy. Les hospitalz marquees de X contiennēt en longueur quarante piedz & demy, & trente piedz en largeur. La largeur du porticque circuyant ledict theatre, est de vnze piedz. Ses pilliers sont chescun de trois piedz & vng tiers d'espeuteur & de largeur. L'ouuerture des arcures est pour chescun de neuf piedz. La largeur du plant de ladicte orchestra B, est de vingt piedz. La place du pulpitre C, comporte quarāte piedz & demy en longueur, & sa latitude est de douze piedz, & son entree de neuf piedz. La place signee par D, appartenoit estre le porticque au derrier de ladicte Scene. Neantmoins il nya aucuns vestiges de colemnes, combien qu'elle demonstre y auoir este muraille, seant sur le bort de quelque eue. La largeur d'icelle place contient dixneuf piedz & demy. Au dehors de ce theatre a la main fenestre, se voyent vestiges de deux edifices, mais par la grande ruine d'iceulx lon ne peult facilement trouuer leurs fins. Nonobstant l'edifice marquee par F, pour aultant qu'on en voit, semble bien estre auoir este enuyronne & ceinct d'aultres appartenances. La largeur de la place cotee F, contient trente & vng pied. Les deux petites mansions, tiennent huiet piedz & demy d'ung coste, & de l'autre dix & demy. Les loges ou arcures la ou sont les quatre colōnes (pour lesquelles ie les tiens en cest endroit) sont de vingt sept piedz & vng quart en longueur, & de dix piedz & demy en largeur. La latitude de l'edifice signé par E, est de vingt piedz. Les nichetz des costieres, contiennent dix sept piedz. La longueur du tout, est de soixante piedz, estant distant du theatre cent & quarante & vng pied. Et de l'autre edifice septante & six piedz & demy.

La moiētie de l'ancienne palme anticque.









DES ANTIQVITES



Estte figure cy embas signee par A, me semble auoir este la Scene de quelque Theatre, estant entre Fondy & Terracina: mais du Theatre ya si peu de vestiges, que ie ne le mesuray, ne mesmes aussy ceste partie dicelle Scene, laquelle est beaucoup plus ruyne, quicy ne se monstre: mais estant a cheual en passant prins en portraicture seulement linuention. La Porte marquee par B, se trouue a Spoletto, fort antique de lordre Doricque, laquelle aussy par moy ne fut mesuree, mais seulement prins le porget de la forme & inuention. La porte signee de C, est entre Foligno & Rome, hors du chemin: & combien quelle peut sembler estre chose irraisonnable ou non licite, par la fracture que faict larcure surmontant oultre larchitrabe, phrise, & corniche, ce neantmoins ne me desplaist pourtant linuention: ie nestimay aussy le mesurer sinon la haulteur & largeur, laquelle est de vingt & vng piedz & demy, & de dixhuiict piedz. A mon aduis ce semble auoir este quelque temple ou sepulture, mais quoy quil en soit il se demonstre fort agreable a loel.



L On dict que cest edifice fut le portique de Pompee, aultres l'appellent la maison de Marius, mais du commun se nomme Cacabario: Icelluy edifice selon ce qu'on en peut trouver, n'estoit seulement que pour soy ayser ou negocier, car il ne se trouue aucunes mansions. Et combien qu'icelluy edifice soit a present quasi tout ruyné, ce neantmoins estoit il fort grand, contenant en luy tresgrande place, cōe encor par plusieurs maisons aux parties terriennes on trouue de ceste edifice: La ou est ceste ligne, est pour l'heur la voye qui va de Campo flore vers la place des iuifz, appelée Iudeca: Et ou la croix se demōstre, sont a present assizes les maisons de sainte Croix: La marque G, est la place de iuifz: La coste M, sont les macellaires: ou le C est, cest la Cimetierre de Saint Saluateur. Et ou vous veez la lettre E trauesée, est le front de la maison de Celsis, par lequel lieu on peut comprendre sa grandeur. Les trois rondetez estoient montees pour paruenir aux aultres rondeurs ouuertes. Et parce qu'au deux d'iceulx rondeurs on n'apperceoit aucuns vestiges de degrez, est doncques a presumer, que furent places ouuertes a faire son eue, car telz choses sont necessaires. Le plant de cest oeuvre est mesure de la mesme aulne q̄ le Theatre de Marcello fut mesure. Laquelle mesure se trouuera cy apres entre les obillises, & sera la demye aulne de trente minutes. Premieremēt doncques, le p̄sieur de chescun pilastre, est de trois aulnes & demye: le p̄sieur d'une chescune colonne, est de deux aulnes: Les entrecoulomnes sont de tous costez neuf aulnes & demye: Les pilastres des quatre coingz, sont d'autant plus gros que langlet comporte assis au canton: Lequel canton fut iudicieusement fait, supportant l'entier coing avec force & beaulte d'œuvre: Et en ce peullent les architectz comprendre par doctrine, en quelle façon & maniere se doibuent alier les coingz avec les colonnes, & pilastres, a celle fin que les cantons suruiengnent au regard des colonnes. Laquelle chose donne stabilitē & force, audictes coings, beaucoup plus qu'il ne feroit si ledict coing fut tiré du long desdictz pilastres: Et pour ce que les cantons lesquels sont retirez en dedens, si ainsi est qu'on les regarde en forme diagonale, la ou les deux ronde colonnes coeuurent le coing, semblera estre coingz imparfaictz, Parquoy (comme i'ay dict) ie prise & estime fort ceste maniere de faire, & principalement pour autant q̄ on les peut veoir de tous costez.






Touchant l'ichnographie de ceste edifice en ay suffisamment parle, maintenant est chose cōuenable de donner quelque notice de sa forme se veant hors de terre, combien que les vestiges en sont de petite eficace : Ce neantmoins lon a trouue tant en pied & en estre, qu'on en a pour le moins comprins & trouue l'escorce du dehors, lequel veritablement est vne inuention ingenieuse pour vne œuvre solide, & principalemēt en l'ordre premiere qui se peult nommer Doricque, combien qu'elle naye architrabe, triglyphes, ne cornice, mais bien quelque forme, & icelle tressubtillement faicte avec grande stabilite, & beaulx liementz, tant de pierres dures que pierres cuytes: comme par la figure suyuant on peult appercevoir. Les espees & largeurs dont cy deuant sont mentiōnees, a present narreray leurs haulteurs. Qui est, que celle de la colonne avec base & chapiteau est de dixsept aulnes : Et la haulteur de chescune arcure est quinze aulnes. Les haulteurs des penantz ou cōtreclēz serrant lesdictes arcures, sont chescun de deux aulnes. La haulteur des liementz estantz au lieu de l'architrabe contient deux aulnes escarcement, & aultant contient ausy la fascie de dessus iceulx. Ce deuxiesme ordre semble estre importable, parce que la masse ou solide du pilastre suruiuent sur l'ouerture de l'entree, vne chose au vray dire faulce & inlicite selon raison: Neantmoins d'aultant que le premiere ordre est fort solide & massif, mesmes par la fermeture de la clef, serrant l'arcure, ausy par la cōtrepierre, ou contreclef de dessus, par la ferme fascie ausy de dessus, & puissantes espaulles ou contrefortz des arcures: Lesquelles ensemble demōstrent & representent telle fortitude (comme en effect il est) que les pilastres sur iceulx reposantz ne semblent appesantir ne greuer l'œuvre de desoubz, ce qui se feroit, si c'estoit vng simple arcure avec son architrabe, phrise, & cornice: dont par telle raison suis contrainct m'absurber a non blasmer ny despriser telle inuention. La largeur de ses arcures, sont chescun de quatre aulnes: & leurs haulteurs contiennent neuf aulnes. La largeur de chescun pilastre est de deux aulnes & vng tiers. La grosseur d'une chescune colonne contient en diametre vne aulne & la sixiesme partie. La haulteur d'icelles colonnes sont chescune dynze aulnes & vne huitiesme partie, y compris base & chapiteau, & sont cōduictz selon l'œuvre Corinthe. L'altitude de l'architrabe, phrise, & cornice, sont de deux aulnes trois quartz: combien que d'iceulx membres particulieres, impossible m'est en donner quelque mesure, parce quilz ne sont en estre, ny en effect, sinon seulement quelque petite portion de mur, par lequel lon peult comprendre aulcunement la haulteur dicelluy architrabe, phrise, & corniche.

La troiziesme partie d'icelle aulne dont cest edifice est mesuré.








Ntre aultres sumptueuses antiquitez de Rome, ya deux colonnes de marbre toutes entretaillees d'histoires de raisonnable relieue. L'une est appelée la colonne Antoniana, & l'autre se nomme la colonne Traiana: mais touchant ceste Traiana, veu quelle est celle qui est la plus entiere, en donneray quelque notice: Ceste colonne (comme lon dict) feist faire l'empereur Traianus, laquelle colonne est de marbre ioincte de plusieurs pieces, & si bien assemblee, & alliee, quil est aduis aux regardantz estre d'une seule piece: Et pour declairer les particuliers mesures dicelles, ie commenceray au pied de son bassement: Premièrement doncques le degre en terre reposant, est de trois palmes de hault: Le Plinthe dudit base est hault vne palme & huit minutes, Le base entretailé & enrichy contient la mesme haulteur: Le plat d'icelluy bassement est de douze palmes & six minutes en haulteur: La corniche enrichie, est vne palme & demye de hault: La place ou pend le feston, est hault deux palmes & dix minutes: L'entiere base de la colonne, est de six palmes & vingt-huit minutes de hault, Comparty en sorte telle, que le plinthe au coing duquel ya vng aigle (qui sont en nombre de quatre coingz) est hault de trois palmes & dix minutes: La haulteur du thore de dessus, est de trois palmes & huit minutes: La cinste est de dix minutes en haulteur. La haulteur de la colonne asscauoir le troncq, contient cent & dix-huit palmes & neuf minutes. Lastragal avec ses quadretz ou filletz soubz l'echine, tient dix minutes: La haulteur de lechine, contient deux palmes & deux minutes: La haulteur de labacus, comporte deux palmes & vnze minutes: Dessus icelle coulomme ya vng pedestal de forme ronde, par lequel lon sorte de la montee, & facillemēt peult on circuyr & aller tout alentour d'icelluy, parce que la pleine contient deux palmes & demye de large: La haulteur d'icelluy pedestal, est d'vnze palmes en tout, reserue sa base, laquelle contient deux palmes, & la corniche de dessus est d'une palme de hault: La couronne ou couuerture ronde de dessus ledict pedestal, est de trois palmes & demye de hault: La grosseur dudit pedestal, est de douze palmes & dix minutes: Lespesseur de la superieure partie de la coulomme, est de quatorze palmes, & sa grosseur embas contient seize palmes: La rotondite signee de A, en la platte forme, represente la grosseur d'enhault. Et le cercle marqué par B, est la grosseur d'embas: La latitude de la limace ou montee, contient trois palmes, & le fuseau quatre palmes: La largeur du bassement, est de vingt quatre palmes & six minutes, En laquelle espace sont deux victoires entretaillees, tenantz vng Epitaphe, soubz lequel ya plusieurs Trophees entretaillees. Et en ceditte Epitaphe sont posee ses lettres soubscriptes.

S. P. Q. R.

IMP. CÆSARI DIVI NERVÆ. F. NERVÆ
TRAIANO AVG. GERMANIC. DACICO
PONT. MAX. TRIB. POT. XVII. COS. VI. PP.
AD DECLARANDVM QVANTÆ ALTITV-
DINIS MONS ET LOCVS SIT EGESTVS.

Ceste colonne (comme dit est) est toute historiee, de tresbonne taille, enrollee d'vng filet ou biser, elle est canallee en forme Doricque, & audictes canaulx sont icelles figures entretaillees en sorte que l'esleuemēt desdictes figures n'empeschent ny ne defigurent la forme de la coulomme ny aussy des canaulx, Entre aulcunes figures suruiennent plusieurs fenestrelles, rendantz commodieuse lumiere a la montee, & combien qu'icelles fenestrelles soient posees par ordre, si n'occupent ny empeschent toutteffois lesdictes figures, ou histoires, nonobstant quelles soient en nombre de quarante & quatre, comme par la coulomme suyuante nous demonsturerons, Neantmoins que ceulx cy sont ses plus diffusez & amples membres, cy designez & descriptz. Tous lesdictz membres sont mesurez par l'ancienne palme Romaine, laquelle se trouue aupres dela la rotonde.






Ay cy deuant assez amplement traicte de la colonne Traiane, & de ses particulieres mesures, maintenant fera ostention de l'entiere colonne proportionnee apres la principale & reduicte en ceste petite forme. La colonne doncques marquee de la lettre T, represente la colonne Trayane, de laquelle sont produictes & yssues les Obeliscs. De narrer l'origine & la cause pourquoy premierement elles furent apportees a Rome, ny a quoy elles seruoient, ne m'en trauailleray en faire declaration, a l'occasion que Pline assez plainement le declaire, mais seulement reciteray icy les mesures, en demonstrent les formes d'aucuns qu'en Rome i'ay veu & mesure. Et premierement l'obelisce signee par O, est au dehors de la porte Capena, & est engrauee de lettres Egiptiennes. Sa grosseur asscauoir au pied, contient dix palmes & demye, & sa haulteur quatre vingtz palmes, & fut icelle seule mesuree avec la palme anticque, mais les aultres trois suyuantcs furent mesurees par l'aulne moderne contenant soixante minutes, de laquelle aulne la ligne qui est tiree au long desdictz obeliscs est la moitie d'icelle compartie en .xxx. minutes. L'obelisce marquee de P, se trouue en Vaticano, cest a S. Pierre, estant de pierre Egiptienne, au sommet de laquelle lon veult dire que les cendres de Gayo Cesare y sont gardees. Sa grosseur d'embas, est de quatre aulnes & quarante deux minut. Sa haulteur contient .xlii. aulnes & demye. La partie superieure, a despesseur trois aulnes & quatre minutes. Et au desoubz aupres du piedz sont ces lettres soubscriptes.


DIVO CÆSARI. DIVI IVLII. F. AVGVSTO. TI.
CÆSARI DIVI AVGVSTI. F. AVGVSTO SACRVM.

L'obelisce signee de la lettre Q, est a S. Roch au mitant de la rue, despiecee & rompue en trois pieces, lon dict aussi que la empres en ya encor vne ensepuelee en terre, a l'oposite de la Augusta. La grosseur embas de la predicte obelisce contient en chescune face, deux aulnes & xxiiii. min. Sa haulteur comporte .xxvi. aulnes, & .xxiiii. min. La grosseur d'enhault, est de .xxxv. min. Son basement estoit tout d'une piece. L'obelisce marquee de R, est *nel circo di Antonino Caracalla*, estant cassee comme en sa forme lon peult apparcevoir. Lespesseur dicelle Obelisce est en l'inférieure partie de .ii. aulnes & .xxv. min. & en la superieure partie elle a vne aulne & .xxxiiii. min. Sa haulteur comporte .xxviii. aulnes, & seize min. Et tous les pedestalz de chescun des obeliscs, sont proportionnez apres le principal. Et combien que parauenture en y ait encor d'aultres en dedens Rome lesquelles n'ay veu, si ay ie toutteffois bien voulu faire paroistre celles qui de moy sont este veues, & comme dyng chescun les myeulx congneues.




DES ANTIQVITES

L'Amphitheatre de Rome appelle
le Coliseo/ edifié l'empereur
Vespasien au mitant de la cite/ cōe
Augustus auoit propose de faire:
L'ichnographie duquel ay diuise
en. iij. portions (ainsi cōe ledifice
est aussi de. iij. ordres) a celle fin
que toutes choses soient mieu
entendues/ pour le grand artifice
qui y gist. Le plant est mesure par
la palme antiq. & cōmenceant p
mierement au parties exterieures:
les pilastres sont doncq de frōt
de dix palm. & six minu. en largeur:
L'espeur dune chescūe colōmne
cōtient. iij. palm. mais le pilastre
contient de chūn coste. ij. palm. &
ij. mi. La distance dūng pilastre a
autre cōpoite dix palm. reste les
quatre principales entrees lesq
les tiennent. xij. palm. L'espeur
des pilastres des costez est de. xij.
palmes. La largeur de la premiere
ambulatio ou portiq/ est de. xij.
palmes. Le deuxiesme portiq/ en
dedes est large. xx. palmes/ & sont
tous deux voltes. Des autres mes
sures tirant vers le cētre pour cau
se de leurs restroictissemens/ n'en
traictay nullemēt/ car par celles
du dehors l'on pora icelles facil
lement cōprendre/ veu quelles sont
entieremēt proportionnees apres
le principal: l'exterieure partie du
secōd plant est cōe le p̄mier/ sinon
les galleries qui sont vne palme
plus larges/ car les pilast. ne sont
si espez au costez/ cōme ceulx d'ens
bas. Les galleries interieures sōt
voltes en croix/ & au mesmes sont
aucuns petitz tribuns signez par
X. au milieu desquelz sont spiras



ces carrez/ croyant quilz furent obser
uez & fait a l'usage des places rendat
a icelles lumiere appartenāte. Le trois
iesme plant est aussi par dehors cōme
le second/ reserve les ambulations qui
sont d'autant plus large q les pilastres
samoindissent / & est l'ambulatio exte
rieure voltee par croix/ & interieure a
botte: Tous les buys ou porteletes
signez par. V. seroient sur les degrez,
pour vng chascū se retirer en son lieu
cōmodieux. Le. iij. plant/ est aussi par
dehors cōme les autres trois/ reserve
quil n'y a nulz arcq/ & aussi les colōm
nes sont plates: aux espaces desqelles
sont fenestres sicōme l'on appareuera
cy apres en l'orthographie: Le quatr
iesme & dernier plant met plusieurs en



Ceste distance d'une fleche
a aultre, estoient les degrez
la ou les regardant se
soient assement.


aultre pouoit passer par
deuant facilement sans
sempescher: Au dedens
diceulz degrez estoient
encor aultres pluspetitz
marches pour comodite
a pour aller vng chescun
en sa place comme en la
figure G & H. est demons-
tre: Ausquelz degrez
sont aucuns canaux ou
goutieres du hault en
bas seruantz pour con-
duire leauue ou vrine en
bas / lexemple de ce se
monstre en la figure H.
Les degrez a seoir sans
clinioier d'ung costé vng
bon doigt / a celle fin q
leauue ny demeura dessus
lesquelz degrez estoient
fort bien ioinctz & en-
semble liees / comme la
figure. I. le demonstre.

Montees entre
les degrez


DES ANTIQVITES



Pres auoir demonstté l'ichnographie de ce Coliseo Romain en quatre manieres, comme l'edifice est de quatre ordres: maintenant est chose conuenable de faire ouuerture & demonstration de son profil, par lequel lon porra conprendre grand partie des choses interieures. Parquoy d'ocques ceste figure suyuant represente le total edifice estant sur terre, droit au vray cōme sil feust coppé par le mitant, par laquelle figure lon peult congnoistre, premieremēt tous les degrez sur lesquels seioient les regardantz. Lon voit ausly en icelle les secretes ambulations comme elles estoient, lon comprend illec comment & en combien de sortes se dressoient les montees, lesquelles certainement estoient fort commodieuses & aysees a mōter & descendre, en sorte que l'amphitheatre ne tarδοit guieres a estre remply de grand nombre de personnes, & encor plus legierement vuyd sans empeschement d'aucuns. En icelle figure comprend on ausly la partie exterieure, commēt & en quelle maniere l'espeisseur tant des pilastres que du mur se diminueoit en montant amont soy retirant en l'interieure partie ce qui donne grāde fortitude a ledfice. Et en signe de verite lon voit encor pour l'heure du iourdhy, d'aucunes parties de l'orthographie exterieure toutes entieres depuis le hault iusques au bas. Ce qui se voit au cōtraire en l'interieure partie qui est ruynee, dont ceste instabilite procede par le retirement de deuers le centre, ce qui faict l'œuvre plus delicate & de moindre poix, prenant de soy mesmes forme pyramidale. Et cecy n'a este obserue aux communes edifices de Venise, mais le contraire, parce que les murs sont par dehors en perpendicule, & diminuent en l'interieure partie. Et cela font ilz (par faulte d'heritaige) pour gagner plus de place en la partie superieure: mais ce qui donne grande ayde & assistance a telles fabricques, est, qu'il n'ay nulz arcqz, ne nulles sortes de volseures qui oppressent ou deboutēt les murs, ayns l'abondance des sommiers qui se posent aux mures bien ancrez, viennent lesdictz murs a se vnyer avecques les traueures, de sorte que telz edifices durent autant qui ceulx sommiers, lesquels par temps au besoing lon les renouuelle: Ce neantmoins telles fabricques nont iamais telle perpetuite comme les antiques, faictz par tel ordre qu'on aperceoit en la face du Coliseo, duquel ie reuiens a en parler. Et parce (comme iay dict) que les parties interieures sont si ruynees, qu'on n'en voit en linterieure partie choses quelconq's, laquelle est signee & despartie par la ligne ayant au deux boutz les fleches. Et a l'occasion qu'en icelle lon ny aperçoit aucuns vestiges, si la superieure partie du finement des degrez, iusques a la partie de dehors fut couuert avecques doubles galleries, ou si cestoit vng seul porticque, & que le residu demoura descouvert: Cela cause que ie l'ay voulu demonstter en deux manieres: L'une est, comme il se voit audict profil associe & vny avec toute l'œuvre: Et l'autre sorte, est celle qui est portraictē & designee a part au dessus des degrez, laquelle ordonnance s'accorde ausly a l'autre œuvre, quant on la met de sorte que les deux fleurs de lis (estantes marquees sur les pedestalz) se viennent a rencontrer egalemēt. Mais parce qu'on voit aucuns vestiges (cōe dit est) de volseures croisees, lesquels encor pendēt en linterieure partie du mur, ainsy que le quatriesme plant le demonstre, me faict iuger & mest aduis que cestoit vng porticque ou galerie seule, & que l'autre partie estoit descouverte pour serrer le peuple, & ainsy estant lon peult recepuoir plus de gens quil neust faict si les galleries furent estees doubles. Or maintenant pour retourner au principe de noz degrez, a celle fin de ne laisser chose sans en toucher d'autant q̄ possible me sera. Je dis doncques q̄ a loccasion des ruynes & remplissementz des matieres dont la pleine ou place du mitant est fort remplie, tant & si fort qu'on ne peult appercevoir ne ymaginer, de quelle haulteur les premiers degrez dicelle place estoient esleuez. Mais par la notice de ceulx qui en ont veu la fin, estoit ledict premier degre tant esleue & si hault de terre que nulles bestes sauluaiges & nonpriuees, ne pouoient greuer ne nuyre aucuns des regardantz, & ausly y auoit vng appuyement ou garde poitrine, avec vng large chemin pour alentour circuyr, comme est demonstté par la leltre C. Les deux ouuertures de dessus l'arcq̄ maieur & mineur, estoient aucuns spiracles pour rendre & acquerir lumiere. Les places ou lieux esleuez de dessus les degrez estantz couuertz signez de A, sont ouuertures & passaiges par lequel les regardans entroient venant par les montees au Theatre.




Le profil du l'amphiteatre de Rome.






Exterieur partie asscauoir l'orthographie de ce Coliseo Romain, est cōpose de quatre ordres: dont la premiere ordre (cōmenceāt de terre) est œuvre Doricque, & combien qu'en la frize n'ya aucunes triglyphes ny methopes, ne aussy en l'epistile ou architrabe ne sont les guttes, ne soubz la coronne les fulmines: ce neantmoins le peult on appeller Doricque. Le second ordre est d'œuvre Ionicque, prenez que les colonnes ne soient striees ou canalees, nonobstant en effect se peult nommer Ionicque. Le troiziesme ordre, est cōpose de la Corinthe, œuvre tresferme & solide sans entretaille: reste les chapiteaux, lesquelz pour cause de leurs haulteurs, ne sont pas trop delicatement faictz. Le quatriesme ordre est Composite, d'aulcū appellez Latine, parce qu'il fut inuētē des Romains, les aultres nommēt Italica, mais a la verite on la peult biē nōmer Composite, & ne feust seulemēt q̄ par les mutiles qui sont en la frize, & parce aussy qu'aulcū aultre ordre n'ont nulles mutiles en leur frize. Plusieurs arguēt & demandēt scauoir la raison, pourquoy les Romains feirent edifier ceste edifice de quatre ordres, & qu'ilz ne le feirent faire tout d'vng ordre, cōme plusieurs aultres, asscauoir celluy de Verone, lequel est tout d'œuvre rusticque, le mesme aussy est celluy de Pole: Pour a ce respondre, il est notoire, que les Romains antiques, cōme Dominateurs de l'vniuersel, & principalemēt de ce peuple, dont les trois ordres ontz receuz leurs origines, voulurēt poser se trois gendres l'vng sur l'autre, & par dessus iceulx mētre l'ordre Composite ou Latine, par eulx inuentee, vueillant par icelle donner a congnoistre cōme estantz triūphateurs de ce peuple, voulurēt aussy triūmpher en leurs œuvres, les disponāt & entremeslās a leur bon plaisir & volonte. Delaisant doncques ses raisons retournerōs aux mesures de l'exterieure partie de cest edifice, lequeledifice estoit esleue deux degrez de terre, le second degre estoit large cinq palmes, & le premier deux. Leurs haulteurs estoient chescun quelq̄ peu moins d'vne palme. Les bases des colom. ne cōtiennēt pas du tout deux palmes en haulteur, & ne sont aussy cōme le Doricque. La colom. est grosse, quatre palmes & deux min. Sa haulteur est de .xxxviii. palm. & .v. min. y compris bases & chapiteaux. La haulteur du chapiteau, est enuiron de deux palm. Les pilastres a chescū coste des colom. contiennēt trois palm. & trois min. La largeur de l'arcure est de .xx. palm. & sa haulteur de .xxxiii. palm. Depuis le sommet de l'arcure iusques soubz l'architrabe ya cinq palmes & six minutes. L'altitude de l'architrabe est de deux palmes & huit min. La haulteur de la frize, est de trois palm. & deux min. La cornice aussy cōtient aultāt. Le pedestal du secōd ordre cōporte huit palm. & dix min. en haulteur. La haulteur de la colom. avec base & chapiteau est de .xxxv. palm. Sa grosseur & de .iiii. palm. Le pilastre avec l'arcure, cōtiennēt aultāt que ceulx d'embas. Reste la haulteur de l'arcq, qui tiēt .xxx. palmes. Depuis l'inferieure partie iusques soubz l'architrabe, ya .v. palm. & six min. La haulteur de l'architrab. est de trois palm. La haulteur de la frize, est de deux palm. & neuf min. L'altitude de la corniche est de trois palmes & neuf min. Le pedestal du quatriesme ordre, appelle cōposite (en cest endroit a nostre aucteur passe de narrer le troiziesme ordre, neātmoins qu'icy qu'il en soit il n'ya pas grande differēce d'icelluy de la Ionicque) Le pedestal Composite doncques est hault .xii. palm. Les soubzbases de dessus tiennēt chescū .iiii. palm. La haulteur du pillier avec base & chapiteau, est de .xxxviii. pal. & six min. L'altitude de l'architrabe, frize, & cornice, sont enuiron de dix palm. en haulteur, cōpartis en trois portioīs egalz, l'vne pour la cornice, l'autre pour la frize ou les mutiles sont, & la tierce pour l'architrabe. Mais a quelle raison les architectz poserēt lesditz mutiles en la Phrize, choses q̄ parauēture au parauāt oncques ne furēt faictz, ien ay declare en mō. iiii^e. liure mō aduis & bon semblāt au cōmencemēt de l'ordre Composite Chap. viij. Les pilliers ou colom. de ce. iiii^e. sont platz & peu esleuez, & tous les aultres sont rōdes colonnes, asscauoir les deux tiers sortāt hors des pilastres. Les mutiles de dessus les fenestres soubstenoient aulcū sommiers, lesquelz sommiers ou tisons p̄ aulcū trouz faictz en la corniche, on les laissoit descēdre, auquelz se tiroiēt & espardoient cordes & têtes pour couvrir l'etier amphitheatre, tāt pour la chaleur du soleil cōe pour la pluye. La raison pourquoy les colōnes sont tout d'vne grosseur, & q̄lles ne se diminuent l'vne sur l'autre, cōme semble estre raisonnable, ce q̄ Vitruue ordōne, q̄ le second ordre soit diminue & restrainēt du premier la. iiii^e. partie: de cecy ay ie aussy en mondict. iiii^e. liure, Chap. ix. declare mon opinion, au traictē de les colōnes de les composer courtes ou longues. Et pour auoir plus ample congnoissance des membres particuliers, les ay biē voulu mētre cy au coste de l'orthographie dudit Coliseo, lesquelz sont diligemment proportionnez apres le principal, ensemble leurs caractères pour myeulx les congnoistre.




A Hispello vne cite fort antique en la terre de Rome ya vne porte tresantique & d'œuvre Dorique combien quil ny ait triglyphes ne methopes, ne ausy nulles guttes en l'epistile. Les deux torelles des costez se peultent appeller modernes, pour cause des aornemētz de dessus. Icelles torelles sont d'une egale façon combien que l'une aye laissé a portraire. Lichnographie touttefois ay mis cy embas, & fut mesure avec le pied antique. Et depuis l'une des tours a l'autre ya septante piedz. La porte du mitant est vingt piedz de large. Chescune poterne est dix piedz de large. Les pilastres d'entre les deux portelettes sont chescun dix piedz de large. La haulteur ne mesuray ie point, mais seulement en prins linuention, pource que fort elle me pleust.




Ces cornices/basemētz/et bases/sont reliques d'antiquitez: et celluy qui est note par A/asseauoir vne piece de colonne/avec sa chitrade/frize et cornice/avec aussy le basemēt de dessus/estoit tout d'une pierre/leur hauteur est de xi. piedz antiques ainsi proportionnez. Et fut trouuee hors de Rome pres du Tibre. La corniche marquee de B fut trouuee aux fondementz de S. Pierre dont Bramāt les feist de rechief ensouyr au mesme lieu. Tous ses membres estoient aussy d'une piece/haute de six piedz antique/et proportionne au principal. La base signe par C/est a S. Marc/fort bien besoingne de cuivre Corinthe/mais nō pas trop grande: il peult contenir en hauteur enuyron pied et demy/mesme aussy proportionneemēt faict. Le basemēt signe par D/fut trouue en la place La prancia/fort bien conduit. La hauteur de lad. base sans le plinthe/est de deux palmes/aussy egalement proportionne. La base note par E/estoit de grande formosite: lequel fut trouue soubz certaines ruynes: Et par lastragal suruenāt sur le thore/iuge auoir esie Composite:Et combien que de tous les membres nen donne nulle notice/ce neantmoins si sont ilz reduictz des grandz en petit.






Il y a plusieurs sumptueuses antiquitez qui
 se trouvent en Verone / y a principallemēt vng
 Amphitheatre de ceure rustique / appelle Lare-
 na : duquel en vraye lictographie ou plant / des-
 monstrant aussy au costē vne partie du profil /
 mesme en quelle maniere estoient les degrez. Les
 ouuertures qui sont sur lesdictz degrez / estoient
 portelletes par lesquelles lon venoit des interi-
 eurs montees sur iceulx degrez / & de la pouoient
 descendre iusques aux lieux deputez selon leurs
 dignitez. Ceste figure signifie A / demontre com-
 ment les portelletes estoient sur iceulx degrez La
 figure B / represente en quelle forme les descētes
 & montees estoient conduictz ausd degrez. Mes-
 mes lon apperceoit aussy en icelluy les enchasse-
 mentz & ioinctures diceulx degrez. Les petites
 goutiers venāt au costiers / estoient faictes pour
 cōduire leaue & vrine du peuple / du hault en bas
 sans nuire ny empêcher aucune persone : & estoi-
 ent aussy lesdictz degrez quelque peu decclinant
 vers lesd goutiers pour descēdre leaue en icelles
 En l'inférieure partie y a plusieurs portelletes en



forme de ses deux cy dessous demonstre & enco-
 daultre sorte tous conduitz de œuvre rustique.
 L'ichnographie de ceste edifice fut mesure par le
 mesme pied dont le theatre de pole fut mesure: &
 premierement parlant des parties exterieures/ la
 grosseur du pilastre est de viij. piedz & ung tiers
 Les platz pilliers contiennent chün trois piedz &
 ung tiers: par ainsy demurer larges chün de pi-
 lastres soubstenir l'arcq/ deux piedz & demy. la lu-
 titude des arcqz est. xij. piedz & demy: reste les quat-
 re principaulz qui sont plus grãdz. Les pilastres
 des costez sont chün de six piedz de s'espeur: le por-
 tique circuyant a l'entour est. xij. piedz de large
 rond vofsez: le portique du mitant a. ix. piedz &
 demy de large/ vofsez en rondeur: le portique
 encoz plus en dedens est de viij & demy en larg.
 pareillemēt vofsez. mais aux deux principales en-
 trees ya cinq porticus vofsez sur les pilastres:
 cō son peult par le plant appareuoir: & celluy
 du milieu est plus spacieus que les autres.
 La reste des mesures se peussent compēdre par
 le dessusdictes.





Vant a l'ichnographie du predict Amphitheatre, ay declaire & donne assez ample notice de toutes les principales mesures, & aussi suffisamment traite de son profil. Maintenant feray declaration de l'exterieure partie, laquelle ceun ne se peut appeler sinon rustique. Et pour auoir assez dist de la grosseur & largeur, pour l'heure m'en tairay sans en plus toucher, mais de la hauteur en narreray & donneray cognoissance aultant qu'il me sera possible. Et premierement la hauteur du premier arcure cotient trente trois piedz. La hauteur des pilliers, est de .xvii. piedz. La forme de l'architrabe, frize, & cornice, comportent six piedz en hauteur. Lapuyement ou garde poitrine de dessus la cornice, est de deux piedz & demy de hault. La hauteur du second arcure est de .xxiiii. piedz, & est large douze piedz. L'altitude de chescun pillier sont de .xxvii. piedz & demy. La hauteur de la cornice, frize, avec la forme de l'architrabe, est de cinq piedz & demy. Lapuyement du tiers ordre, cotient .iiii. piedz & demy en hauteur. La largeur de l'arc est de neuf piedz & vng tiers. Et la hauteur dicelluy, est de dixsept piedz & demy. La hauteur des larges pilliers, est de .xx. piedz & demy. A lencotre desquelz estoient appuyez (aultant que lon peut comprendre) diueres statues d'assez bonne grandeur. La .iii^e. & derniere cornice est de cinq piedz de hault, & ne traiteray icy de nulles de ses particulieres mesures. Parce qu'avec grande diligence iay transmue icelle cornice du grant en ceste petite forme, laquelle figure sera demonstree en la premiere carte suyuant signee par A B C. Et la apres sera aussi le profil ou taille de l'exterieure partie dudit Amphitheatre. Et tiercement sensuyt la apres l'orthographie d'une piece du dessusdict Amphitheatre par dehors, le quel est tout rustiquement besongne, avec pierre de Verone estant tresdure, mais les cornices sont faictes quelque peu plus mignottes & gracieuses, lesquelles cornices sont de diueres & differentes formes de celle de Rome, fort ressemblant la maniere des cornices de l'amphitheatre de Pole. Touchant la plaine de cedit Amphitheatre Veronese, du commun peuple appelle *La arena*, prenant le nom de arena, qui est sablon, lequel en illec on y espandoit a la commodite de plusieurs diueres jeux & esbatemens, que lon y faisoit: parquoy nay sceu auoir aulcune apparence du fond, mais bien pour aultant qu'aucuns Veroniens men ontz racompte, disoient qu'apres lacheuement des jeux & esbatemens faictz sur le sablon, incontinent suruenoit eaues par diueres conduitz, qui en brief & peu de temps emplissoit l'entiere place, en presence de tous les regardantz, tellement qu'ilz pouoient iouster & batailler sur ceste eaue avec nasseles & petitz bateaux, & iceulx esbatemens & ioyeusetez parfaictz & accomplis, se euannoient & perdoient icelles eaues par aucuns secretz, & demouroit le lieu secq comme parauant. Cecy & encor plusieurs aultres choses peult on bien croire, si nous voulons considerer la grandeur & puissance des Romains. Et puis que nous sommes entre en propos de la grandeur Romaine & des antiquitez de Verone. Il est notoire quil ya encor sur la tresrenommee riuere Adix, ainsi appellee, deux beaulx & triumpantz pontz antiques, entre lesquelz y estoit assis vng fort beau spectacle, sur lequel se pouoient asseoir grant nombre de gens, pour veoir les jeux & esbatemens de iustes sur nacelles & aultres triumphes qui se faisoit sur icelle riuere: Ledit spectacle estoit appuye & ioint contre vne montaigne au long du bort de ladicte riuere. Et quelque peu plus hault au dessus dudit spectacle, estoit vng Theatre, la Scene duquel s'accor doit avec le dessusdict spectacle. Et parce (comme dit est) que ledit Theatre estoit edifie en la montaigne avec grand artifice, suruenoit encor au sommet de ladicte montaigne vng grand edifice, lequel surmontoit tous les aultres, mais les ruynes d'icelluy sont tant grandes, & par l'espace du temps si esgare & aboly, que tresgrande despence seroit & perdition de temps den vouloir recourir toutes les mesures. Neantmoins parce qu'en plusieurs places de ladicte montaigne iay aperceu aucuns membres d'icelluy, me fait fort esmerveiller pensant seulement a la magnificence. Cest chose aussi bien licite & raisonnable qu'iceulx Romains firent a Verone ses beaulx chiefz d'œuvre, a l'occasion, que a mon semblant, cest la plus belle cotee & situation de toute Italie, tant pour les belles plaines, montaignes, & eaues qui y sont, & par dessus tout pource que le peuple dicelle ville est fort humble, courtoys, & amyable.



DES ANTIQVITES

Grandes choses & en diuerses formes feirent les renommez & fameux Romains, desquelz a l'occasion des grandes ruynes lon na peu compréde, a quoy elles seruoient, & principale ment ceste edifice appellee Le sette Sone di Seuero, duquel encor pour l'heure lon en voit vng coing en estre & sur pied, & est de trois ordres tout d'œuure Corinthienne, & apperceoit on eu deniment, quil a este fait & rassemble par le despoulement & vsurpation d'aultres edifices, par ce qu'aucunes colonnes sont canallees, les aultres vuyes, & avec ce sont aussy les chapiteaux, & aultres œuures differens lung de lautre. La haulteur de cest edifice nay pas mesure, mais bien le plant, & lespeueur & grosseur des choses. Et pour aultant que ien puis comprendre, diminue chescun ordre estantz lung sur lautre, de la quatriesme partie, selon la doctrine de Vitruue. Ceste figure inferieure represente le plant de cest edifice, & aussy le ciel ou volseure du planchier de dessus les colonnes. Et fut mesure par le mesme pied dont le Theatre de Pole fut mesure. Et premierement lespeueur du mur contient trois piedz & demy. Entre dung mur a lautre, ya quatre piedz & demy. Entre le mur & la colonne ya distance de cinq piedz & trois quartz, aultre aussy contient l'espace d'entre les colonnes. Lespeueur dune chescune colonne tient deux piedz & vng quart. En cest edifice naperceoit on aucunes mansions, ny apparences de nulz vestiges de degrez ne montees pour au dessus paruenir. Combien que lon ymagine & comprennent assez quil continuoit en plus grande forme, la ou paraudenture en aultre place pouoient estre situez habitations, & montees. Et certainement cest edifice estant entier, sembloit bien estre & auoir grand de sumptuosite, tant pour le grand nombre des colonnes, que pour le decor de ses aornementz.



Le plant de l' Amphitheatre de Pole.

A Pole vne cite en Dalmatie ya cest Amphitheatre, Cest encor fort entier, lequel edifice na seulement que la pmiere aesse ou face par dehors, avec ses quatre contre-fortz, chescun forme de trois pilastres, ce q' ie croy auoir este fait pour fortificati^o, parce q' le circuyct du mur est ainsi seul habandonné : & de ceste edifice en linterieure partie nen a este fait aultre chose fors que le mur exterieur avec ses arcures signe par A, mais par lindic^{ti}on d'aulcuns trouz qui sont au dedens du mur, peult on croire q' illec lon y posoit des degrez & places a seoir, faictes de bois, pour seruir au besoing de leurs festes & passetemps Neantmoins pour decoration de la figure, ay bien voulu cy demonst^rer par pourtraicture la partie interieure, ainsi qua mon aduis se porroit faire. Cest Amphitheatre fut mesure avec vng pied moderne, leql est pose au desoubz de ce plant. La largeur de chescun arcure est de neuf piedz & deux onces, excepte les quatre principaulx arcqz: lesquelz contiennent chescun quinze piedz de largeur. Le front des pilastres est de quatre piedz & deux onces. Les platz pilliers sont larges chescun deux piedz & deux onces, par ainsi contient chescun coste des pilastres vng pied de largeur. Les pilastres des costez sont chescun de cinq piedz & trois onces de largeur. Lentredeux des pilastres & cōtrefortz contient trois piedz & quatre onces






Touchant l'ichnographie ou plant de ce Amphitheatre de Pole ay assez suffisamment traicte. Mais maintenant m'est neccessaire de donner congnoissance de l'orthographie & profil d'icelluy. Et commenceant aux inferieures parties, quant au basement n'ya nulz termines de mesures, a l'occasion que la montaigne n'est egale, car par l'esleuement de ladicte montaigne ne s'aucuglist seulement le pedestal, mais aussi l'ordre premiere des arcqz avecque tous ses cornichementz de dessus sont totalement absconsez, & paruient la haulteur dicelle montaigne iusques a la plaine du second ordre, pour ceste cause ne donneray aucunes mesures quelcôques de la haulteur dudit basement, mais comencera depuis la a mont. Par ainsy doncques la haulteur du pedestal soubz le pillier, est de deux piedz & demy. La haulteur du pillier ou colonne platte avec son chapiteau, contient enuyron seize piedz. L'altitude de l'arcure, tient .xvii. piedz & demy. L'architrabe est hault vng pied & .ix. onces. La haulteur de la phrise est de neuf onces. La haulteur de la cornice est d'vng pied, & dix onces. La haulteur de l'apuyement (si d'auenture il en y est) suruenant sur la cornice, est de telle haulteur que la cornice. L'altitude d'vng chescun pillier est de .xxi. piedz & neuf onces, y compris le chapiteau. La haulteur de l'arcure tient dixhuiet piedz & vne once. L'espeueur dudit arcq, tient vng pied & neuf onces. L'architrabe, frize & cornice, est de semblable haulteur a celle d'embas. Le basement marque par X, contient quatre piedz & quatre onces. Depuis le basement iusques soubz la cornice ya dixneuf piedz. La haulteur d'icelle cornice, est d'vng pied & demy. Et cecy est selon l'orthographie, qui est l'esleuemēt dudit Amphitheatre, laquelle orthographie est en la carte ensuyuante signee de P. Et pource (cōme en ce traicte de l'ichnographie i'ay faict mention) que cest Amphitheatre a au quatre costez aucuns pilastres, lesquelz sont estez faictz pour fortification & cōtrefortz du mur, lequel mur estoit la dedens seuler & habā donne de toutte societe, dont i'ay voulu monstrier la forme cōme il pouoit auoir este. Pource la figure marquee de Q, signifie le coste de l'vng des cōtrefortz. Et la partie signee par H, represente vng pilastre. La partie signee par I, demonstre le profil du mur dudit Amphitheatre. Entre le pilastre H, & le mur ou pilastre I, ya vne allee, large de trois piedz & vng tiers, tellement que deux personnes ensembles y peullent facilement sans aucuns empeschemens aller & venir. Cesdictes cōtrefortz ont sur chescun ordre leur plantz ou pavez ou le peuple se pouoit tenir debout, mais il n'ya nulles montees ne aucunes apparces de degrez, mais se font de bois, comme demonstrent aucunes mutiles de pierre & trouz suruenātz sur les fenestres, dont cy deuant est faict mention. Et affin q̄ les cornices de ceste presente edifice soyēt myeulx entendues, les ay voulu meētre cy au coste en grande forme, a celle fin qu'on la peulle mesurer, & de ses membres auoir la cōgnoissance, car ilz sont fidelement & par grande diligēce transferez du grand en petit. La maniere de ces cornichementz sont fort different a ceulx de Rome, comme lon peult apperceuoir. Et quant a moy, ne me voudroye asister en mes œurs de telles cornices, mais biē me voudroie seruir de celles du theatre du mesme lieu, pource qu'elles sont de meilleurs sorte & beaucoup myeulx entendues. Et tiens pour vray, que cestuy fut vng aultre Architecte different aux aultres, il peult estre que ledict Architecte estoit natif d'Allemagne, parce qu'icelles cornices sentent la maniere dudit pays.


Le demy pied commun, par lequel ce present
Amphitheatre fut mesure.






DES ANTIQVITES

A Monte Cauallo dedens Rome/la ou pour s'heure sont les cheuals de Praxiteles/de Phidia/ya les vestiges d'ung tresfertible & precieux palais, l'une partie duquel estoit situe sur la montaigne/mais la partie de la montee estoit dressée & ioincte contre la descente de ladicte montaigne/ sicomme par le profil suyuant on peult apparecevoir. Lichnographie de ceste edifice/ fut mesuree par vne aulne/ dont la tierce partie dicelle est cy embas denote. Et premierement aux niches **T** & **V** furent trouue les figures du Tibre/ & du Nil/ lesquelles a present sont transportees a Beluedere. La place marquee par **N**/ est vng cheu min ou allée contenant dix aulnes de large. La partie signee par **B**/ est de douze aulnes en carreure. La partie **C**/ contient trente six aulnes quatre aulnes de large. La place a foposite **E**/ est de semblable mesure. La largeur des quatre montees est de quatre aulnes. Les places **E**/ sont deux courtiylz/ chescun contenant en longueur cent & quatorze aulnes/ & en largeur soixante & deux aulnes & demye. Les loges **G**/ sont larges treize aulnes. Les plus grandes montees pour aduenir sur la plaine dudict palais/ contiennent. xi. aulnes de largeurs. Les parties d'auzres les coingz signees de **K**/ sont chescunes large douze aulnes & demye/ & longues seize aulnes & demye. Les parties **H**/ sont contrefortz soubrenantz les montees. La place **L**/ est vne court rendant lumiere aux lieux de dedes. Les deux allées **J**/ estoient pour paruenir dessus les degrez. Le grant superieur frontispice estoit au mitant de cesti edifice/ de telle largeur come la partie du mitant coprent/ sans les loges ou galleriēs/ & courtiylz. Les deux figures **K**/ & **K**/ se vault au dehors dudict edifice/ l'une desquelles represente le coing **K**/ en plus parfaite & grande forme/ & lautre denote l'ung des coingz de la court **D**.







DES ANTIQVITES



Ntre les ruynes de Rome lon trouue plusieurs choses, hors desquelles impossible est de comprendre ne d'imaginer a quoy elles seruoient, combien que toutefois se y voyent ruynes plantureuses desrompues & adnichillees par l'espace du temps. Par lesquelles se comprennent la magnanimité des antiques Romains: dont entre lesquelles antiquitez ceste suyuant figure est merueilleusement bien entendue, i'entens qu'elle fut faicte d'ung bon & ingenieux entendement, pour aultant qu'on en voit encor en estre. Ceste edifice est appellé *La basilica del foro transitorio*, duquel par ymagination & haulteur de la colonne suyuant, lon pould comprendre l'altitude d'icelluy. Combien qu'on n'en voit le sommet ny la fin: parce que la superieure corniche n'est la en œuvre, ne mesmes a l'enuyron des ruynes, ne s'en trouue aucune piece quelconque, par laquelle on porroit attirer & scauoir, quelle chose a peu estre sur cedit edifice. Ceste ruine fut mesuré avec l'aulne cōmune & moderne, laquelle est compartie en soixante minutes, dont la moitié se trouue entre les obelisces. Ces colonnes estoient esleuees de terre, sept degrez de haulteurs aysees & cōmodieuses. La grosseur de la colonne marquee par C, est de trois aulnes au diametre inferieur a l'encontre la base: & le diametre de la superieure partie de desoubz le chapiteau, contient deux aulnes & .xl. minutes. Le haulteur de la nue colonne ou troncq, sans base ny chapiteau, comporte .xxiiii. aulnes, & .lv. minutes. La haulteur de la base est d'une aulne & demye. La haulteur du chapiteau est de trois aulnes & .xxvi. minu. La haulteur de l'architrabe est de deux aulnes & .xxiii. minutes. La corniche d'entre la colonne & contrepillier, laquelle corniche est marquee par D, tient en haulteur vne aulne, & .xlviii. minutes. La superieure corniche (cōme dit est) n'est a trouuer. La contrecolonne ou pillier plat, est de la mesme proportion comme la colonne ronde, & se diminue aussy en la partie de hault. Le chapiteau est de semblable façon de ceulx du Pantheon ou rotonde. La base signee par C, est la mise au coste en plus grāde forme, estant proportionnée apres la grande de mesures egales: le mesmes voit on aussy en la corniche marquee par D. l'ay cy dessus demonstre & narre les mesures des grādes colonnes, maintenant ie declareray celles des petites colonnes, signee par B. lesquelles colonnes ont soubz elles vng tresbeau basement, duquel la haulteur contient six aulnes: la grosseur desdictes colonnes contient pour chescune au diametre d'embas vne aulne & vng tiers: & en la superieure partie est diminuee & estroissie a l'aduenant de la grosse colonne. Sa haulteur avec base & chapiteau, est de treize aulnes & deux tiers: la haulteur de sa base est de la moitié du troncq de la colonne, façonnée cōme la grande: la haulteur du chapiteau est d'une aulne & demye, fort bien conduit & besongnee: dont la grandeur de la forme d'icelluy se demōstre en mon quatriesme liure au commencement de l'ordre Composite. Ceste colonne est stryee ou canallee ainsy que la figure d'empres le denote: elle a aussy sa platte cōtrecolonne de mesme forme: l'architrabe, frize, & corniche, de dessus ceste colonne, tient enuyron quatre aulnes en haulteur: laquelle corniche a les mutiles ou modiglions sans dentilles. Et ressamble fort l'œuvre du Pantheon. Et d'aultant que i'en puis comprendre, seruoient icelles petites colonnes a quelque ornement de portes de ladite Basilica.


La troisieme partie de l'aulne commune.






DES ANTIQVITES

Les Romains par leurs magnanimes couraiges/ont tousiours cherche de demonstrier choses a l'exaltation de leurs actes & puis-
sances/tant par mer que par terre: parquoy pour la commodite de leur Lir de Rome/seirent edifier ce merueilleux port de Ostie:
lequel en verite/tant pour l'aysement dicelluy/ que pour le grandeur de ledifice/ & par dessus ce/ pour la grande fortresse/ bien doit
estre appelle merueilleux. Il est de forme hexagone/cest de six faces: dont chescune face contient Cent & seize verges/ & chescune ver-
ge tient dix palmes/ de ceste principale mesure peult on comprendre sa grandeur. Chescune face auoit vng spacieux courtyl/enuy-
ronnee de loges ou galleries/ & quatre appartementz (cy desoubz en grande forme denote) signee de A B/ mesmes enuyronne de loz-
ges avec vne ambulation au mitant. Et au long de la rue de leue/ estoient par ordre les troncs des colonnes/ ausqueiz on syoit les
nauieres. Et a la bouche du port/ estoient torellles pour au besoing faire le quet contre les ennemys.



Le Port d'Ostie.



L Es Termes de Titus sont moindre que les aultres, qui cause quilz sont appelez du peuple Terme minori. Neantmoins a mon aduis, ilz ont estez tresbien ordonnez: Lichnographie de ces Termes, est mesuree avec la palme Anticque. Et au premier le diametre de la ronde forme marquee A, contient enuiron cent & cinquante palmes: La partie B, tient en longueur & largeur soixante palmes: La forme D, com porte en diametre, enuiron cent palmes: Et le portal E, contient cinquante palmes: Ceste partie ronde H, est de cent & cinquante palmes en diametre: La partie I, est de cent palmes, estante enuiron de deux carrez: Les deux parties, chescunne marquee de K, contiennent a chescun coste trente palmes: La partie L, tient en longueur, cent vingt cinq palmes, & sa largeur trente palmes: La rotondite marquee par M, est enuiron de cent & vingt palmes en diametre: La partie N, est longue cent & quarante huit palmes, & large vingt & sept: La partie O, est le mesme: Le conseruatifz des eaues sensuyuent cy apres.



DES ANTIQVITES




LA Conserue ou cisterne, la ou s'entretoit & gardoit l'eau des Thermes de Titus, filz de Vespasien, est merueilleuse & de grande artifice : A l'occasion que les arcqz desdictz cisternes, sont posez en tel ordre, que vne persone estant au mitant d'vng diceulx, peult facilement veoir au trauers de tous les aultres . Et est ceste place appelee du commun peuple Les sept Sales : Et ce pour cause, que les espaces sont en nombre de sept, & par icelles peult on regarder & veoir par le trauers, le deuât & derrier, tousiours le nombre de sept portelletes. L'espaisseur du mur, est de quatre piedz & de my . La largeur d'vng chescun arcure, est de six piedz. D'vng arcq a l'autre ya vingt sept piedz. La largeur d'vng des murs a l'autre est .xv. piedz, estantz volsez en rondeur de conuenable et raisonnable haulteur . Lesdicts murs & volseures sont plastrez d'vne tresdure matiere.

L'ancienne palme Romaine.





En Rome & ailleurs sont plusieurs pōtz edifiez des Romains, mais seulement demōstreray icy l'inuē-
tion de quatre manieres, a celle fin qu'en edifiāt aucun pont, lon en choisist la plus agreable sorte.

Ce pont s'appelle, *Ponte S. Angelo*, parce qu'il est sur le Tibre pres du chasteau S. Angel. Au temps
des Antiques estoit ce pont nomme, *Le Pont Elio*, de *Elio Adriano*.



ENtre aul-
 tres Ther-
 mes estâtz en
 Rome, ie trou-
 ue ceste Anto-
 niane myeulx
 entêdue q̄ les
 autres, cōbien
 quainly soit q̄
 les thermes de
 Diocletiā sōt
 plus grādz, ce
 neâtmoins ie
 trouue en tou-
 tes les parties
 de ceux cy pl^r
 beaux associe-
 mētz & corres-
 pōdēces qu'en
 tous les autres
 pce q̄ en la pla-
 ce B C, se pou-
 oîēt faire tous
 esbatemētz &
 triūphes sans
 aucuns empes-
 cementz. Et a
 loccasiō q̄ les
 thermes estoi-
 ent principa-
 lement faictz
 pour baigner,
 oultre les di-
 uerses ieux q̄
 lon y faisoit.
 Les cōserues
 deseaues estoi-
 ent au derriere
 de ledifice
 marquee p A,
 conduictes &
 iceux remplis
 p les aquedu-
 ctz seruant a
 telz besoingz.








Ce plant est mesure avec l'aulne commune, dont la tierce partie de celle se mōstre au desoubz de cest edifice. La ligne du mirāt de la place, est de cent aulnes, par laquelle lō porra trouuer quasly toutes les mesures, des q̄lles pour cause de briefuete n'en declaire-ray. L'extremite d'icelles, mais bien des choses principales. Et premieremēt l'vne des places a la cōseruatiō des eaues est de .xxx. aulnes de long, & lx. de large. La partie X, est lōgue .lxxx. aulne, & .xliiii. de large. Le rond edifice D, est en diametre soixāte & huit aulnes. La place B C, est de sept centz aulnes en longueur. La partie du mirāt signee par G, contiēt en longueur enuiron cent & cinq aulnes & soixante en largeur.

DES ANTIQVITES

A l'occasion que au deuant dict plant
ou platte forme, par la petite corpulen
ce de la figure (laquelle impossible estoit
de la mesurer en ce present liure en plus
grand forme) lon ne peult congnoistre
les particuliers membres, a raison de quoy
iay cy en ses deux merges voulu ouuerte-
ment demonstrier aucuns diceulx mem-
bres, comme lingenieux Architect par
le moyen des caracteres que y sont notes
porra legierement congnoistre & trou-
uer les conferantz avec l'entiere ichno-
graphie.




Combien que les presentes figures soient sans ordre, et de plusieurs pieces, ce neantmoins le prudent Architecte les congnoistra toutesfois estre icelles des deuandictes thermes, ayant regard aux caracteres ou lettres y estâtz, lesquelles conferees a l'entiere ichnographie, se trouuera quelles parties ce sont, aussy congnoistra il, que la partie H et X, n'appartiennent a la partie de F. Car ces inferieures figures, sont trois separez membres, prenez quelles soient par extremité posees l'une pres de l'autre. Je nay aussy declaire ny donne icy aucunes particulieres mesures, car l'Architecte se aydera & seruira plus de l'inuention, que des mesures.



DES ANTIQVITES


E Nuiron sept lieues Dalkayre lon trouue vne pyramide, de laquelle demonstrey la forme, & donneray les mesures d'icelle, d'aültāt que ien ay recouert de M. Marco grimano gentilhōme de Venize & patriarche daquiloya, d'icelluy mesuré & aussy esté au dedens & au dessus. Ceste Pyramide estoit mesuré par pas, dont chūn pas contient quelq̄ peu plus de trois anticques palmes. La base est a chescun coste de .cc. & .lxx. pas, & d'vng carre parfaict. Elle est entieremēt faicte de dures pierres creues. Et par le dehors d'icelle peult on monter iusques au sommet, mais non ayseement, Car chascune marche est de trois palmes & demye de hault, & aussy nya tant de plaine sur chūn que lon y peult poser le piedt d'vng hōme. Le nombre des marches ou degrez depuis le bas iusques au sommet, est de .cc. & .x. & sont toutz dune mesme haulteur, tellemēt que la haulteur de toute la masse contient aultant que la base. Lon presu me & croit, qu'icelle pyramide estoit vne Sepulture, parce qu'au dedēs ya vne mansion, au mi tant de laquelle ya vne grande pierre, presumāt que sur icelle y peult auoir este quelque tom beau d'extimation. Pour entrer au dessusd. se trouue a la main gauche vne montee de pierre laquelle circuyt & tournē par dedēs ladite pyramide iusques a ladite mansion. Enuiron le mi tāt de ceste pyramide ya encor vne entree: mais il est serré de sorte qu'on ny peult entrer. Au sommet de cestedite pyramide ya vne belle plaine, large a chūn coste de huiet pas. Et par icel le congnoit on lacheuement & parforuiffement d'icelle pyramide, nestant ague cōme d'em bas il semble estre. Quelque peu ar rierre de la, lon trouue vne teste de pierre dure avec vne partie de la poi trine, tout dune piece, dont le vi sage contient dix pas: & ya en ceste figure aulcunes lettres Egiptiennes.

Et de ceste pyramide & teste, escript Pierre Martir par luy veu & mesuré guieres moins different de ceste me sure.






Res qu'ainſy ſoit que les Grecz ont eſtez les premiers inuenteurs de la bonne & droicturiere Architecture, comme noſtre precepteur Vitruue de ce donne teſmoignaige, meſmes auſſy aultres diuerſes auteurs: ce neantmoins a l'oſcaſion des grandes & continuelles guerres, & auſſy q̃ les pays ont eſtez ſubiuguez par aultres plus puiſſantes Nations, ſont les places tellement deſpoulies & rauies, qu'en toute la Grece lon ny voit hors terre choſe de quelque efficace, ou bien peu. Mais d'aultant que par aucuns m'a eſte dit, il ſe trouue encor quelque veſtiges d'une edifice. Lequel, ainſy que lon peult comprendre, contenoit cent colonnes, & eſtoient icelles colonnes de telle altitude, cōme lon peult aparcevoir par daulcuns eſtantes encor debout & en eſtre, que de noſtre temps nauons nulluy ſuffiſant a nulz geſtz de pierres pouoir eſtendre iuſques au ſommet dicelles: & meſmes deux hommes de bras a bras ne ſcauroint enuyronner vne deſdictes colonnes. Et parce que en l'vng des anglez entre quatre pilliers ſe trouue vng maſſif mais bien peu hors de terre & fort ruynez, ſemble y auoir eſte vne montee pour paruenir au deſſus de l'edifice. Laquelle edifice lon ymagine que ſe doit auoir eſte vng porticq, la on vſoit daulcunes ceremonies, a celle fin icelles eſtre du peuple myeulx aperceues. Et combien (ainſy q̃ dit eſt) que de cedit edifice lon ayt bien peu d'aparence de ce que hors terre ſe demonſtre, reſerue aucunes colonnes, n'ayant receu d'icelluy aucunes meſures particuliers, ny auſſy auoir eſte departy par la veue deſdictes choſes, ce neantmoins ay bien voulu cy deſoubz poſer & meſtre ceſte figure par portraiſt, prenes quelle ne ſoit ſemblable a la preterite, ſi eſt elle pour le moins comme ie la puis entendre. Et ores que telle maniere ne fut iamais eſte faicte, pourueu que aux champs on l'eſleua quelque peu hault hors de terre, croy pour certain quelle auroit tresbeau regard, & principalement par les quatre obeliſces ſur les coingz. La groſſeur d'une cheſcune colonne a mon ymagination doibuent eſtre pour le moins de cinq palmes, & leur haulteurz avec baſe & chapiteau de cinquāte trois palmes. La haulteur de l'architrabe, frize, & corniche, peultēt eſtre de dix palmes. Et a celle fin que les baſes du ſecond ordre, ne ſe obſcuriſſent de la veue inferieure, appartiendroient iceulx eſleuer en forme de degrez ſelon leurs appartenances. Ce deuziefme ordre deburoit a mon aduis, diminuer de la quatriefme part de celluy dembas, cōme en pluſieurs & diuers lieux iay en mon liure quatriefme traicte.




DES ANTIQVITES

A Vpres de S. George en Velabro se trouue ce p̄sent edifice, lequel fut fait des bancquiers & marchantz de boësz au temps Lucius Septimius Seuerus, & de Marcus Aurelius Antonin⁹: lequel edifice est d'auure Composite, a tous costez fort bien aorne & enrichy de diuerſes sculptures. Lon ne ſesmerueillera ſi la friſe & architrabe ſont couuert & occupe de ce tablet, qui cauſoit q̄ ladite friſe neſtoit grande aſſez pour y adiouſter toute leſcripture qu'on y deſiroit meſtre, qui fut la raiſon q̄ l'architecte le cōpoſa de telle ſorte, ne corrupat pource l'ordre d'architecture, a l'occaſion qui laiſſa au coingz l'entree & ample forme




I E neſcripay en plein les meſures de ceſte edifice, parce quelles furent perdues āps laouir meſure : mais me ſouuent bien q̄ la largeur d'ung pilastre a aultre, contenoit douze antiques piedz. La haulteur dicelle largeur eſtoit de vingt piedz. Leſpeſſeur d'ung cheſcun pilastre avec toutes ſes colōnes (leſquelles ſont plattes) contenoit quatre piedz & demy. Et aultant comportoit l'architrabe, p̄friſe, & corniche.




Les œuvres que cy desoubz se demonstrent, sont aornementz du dessusdict Edifice, lequel en verite est tant enrichy & aorne q̃ nulz aultres edifices de Rome: car il n'ya nulle espace sans taile, C'est assez raisonnement fait, toutes choses bien correspondantes, Reserue la corniche superieure, laquelle par la sumptueusite des enrichissementz & entailleures est fort confuse & vitieuse de puis lechine embas, C'est pour deux causes, l'une pource q̃ entre ladi te esbime avec ses œufz, n'ya nulle diuision daulcune Cimaïse ou fillet, qui est chose touttefois fort licite & oportune pour separer l'un des membres de l'autre, & principalemēt quāt ilz sont enrichiz, dentretailleures: l'autre raison encor plus grande est, quau desoubz des dētilles ya deux œuvres d'une mesme nature, & de semblable taile, ce qui n'est chose raisonnable, ny ne voudroie faire, doncq̃s propose expressement q̃ cest chose importable & de iamais semblables ne mettre en œuvre.




Part interieure soubstenant le ciel.



Le fond de l'architrave.




En la traueure ou ciel ya .xxvij. quarrez.




DES ANTIQVITES

Les Thermes de Diocletian, sont veritablemēt tresriche d'edifice, cōme lon peult cōprendre par les ruy-
nes diceulx, que pour le iourd'uy lon voit gisant p terre : Et en oultre les tresgrandz appartementz,
Et de diuerſes formes y estantz avecques riches aornemētz, mesmes le grant nombre de colonnes q̄ y
estoiēt, donne ample tesmoignaige de sa grandeur : Et certainement p les diuisions de ceste Ichnographie, peult
ingenieuz Architecte cōprendre Et auoir grande assistance dicelles, p les diuerſes formes y estantz, combien
qu'on ne peult nyer, qu'au dessuſdictes ne si trouue plusieurs discordances, ce qu'en nostre temps ne fut este
supporte: nonobstant que ie ne dis cecy, a la correction d'ung tel Empereur, ny aussy de telle multitude d'Archi-
tectz qu'alors se trouuoient, prenez q̄ adonques neſtoient si expert Et entendu, cōme en aultre temps: mais
le dis seulement au grand bien diceulx, lesquelz ne se trouuerōt indignes a lire mes escriptures. Bien est vray
que la plusbelle part d'ung edifice est, la correspondance Et ses appartenances, Et quil ne soit occupe de chose
quelconq̄ offendant a loeil : pource ie dis que si la voye .A. B. estoit cōme elle de C. D. le derriere de ledifice
en seroit plus agreable Emyeulx assis, en sorte que toutes les voyes en seroient plus franches Et libres, sans
empeschemens d'au-
cunes choses, Et par
ainſy la ptie de ledi-
fice du mitāt signee
de .A. laquelle sorte
hors du droit mur
vers le Theatre, ne
empescheroit le che-
min, mais demeure-
roit entre icelluy Et
ledit Theatre les pas-
ce, lequel est appel-
le aux aultres vrayz
Theatres, Prosce-
nium: Et p telle ma-
niere se trouueroi-
ent les chemins lar-
ges Et amples, par
lesquelz ledit edifi-
ce auroit tant plus
belle correspondan-
ce. le ne toucheray
aussy des aultres A
C, ny de B D. les-
quelz sont de for-
me discordante: mais
par les portions du
dehors trouuera Et
connoistra en luy
mesme le prudēt Ar-
chitecte les discordz
que lon y trouue.
Neantmoins (cōme
dit est) il ya tant de
belles inuētions Et
partiemētz que ce
ne sera chose de pe-
tite assiste au iu-
dicieux Architecte.
Et voz souteueurs
Et defendeurs des
choses antiques, voz
plaise me tenir pour
excuse, si en parlāt
vous peulx auoir of-
fence, Me mettant
touſiours au iuge-
ment Et discretion
des saiges Et enten-
duz.




Ceste Ichnographie est mesurée avec la paulme Anticq : mais pource qu'en ce plant me suis plus adonné a l'invention, q sur aultre chose, n'en donne aucunes ptielières mesures, & seroit aussy chose en verite trop longue a racompter : Ce neantmoins l'ay mis & transporte avec grande diligēce en ceste petite forme proportion de telle sorte q le prudent Architecte porra facilement a peu pres trouver les mesures, soy aydant des petites palmes, estantes au demy cercle cōparties en dix parties, & chesune portion est de .x. palmes, q vient lentierre ligne a estre Cent palmes : Par ainsy doncques avec le compas en main lon porra a peu pres cōprendre les mesures de ceste edifice. Quant a l'orthographie n'en ay aulcunement voulu mētre en pourtraict, & ce pour trois raisons : premier p les grandes ruynes en quoy lon y trouue peu d'apparence : l'autre pour les difficultez des mesuratiōs dicelles : & la tierce, pource quen verite pour aultant q lon en voit en cest edifice, ne fut icelluy faict en ce tresheureux & felicieux temps des bons Architectz : car lon y appercoit grāde discordances & desordres, mais bien tresgrande richesses daornemētz. Et pource qu'en telle petite forme d'ichnographie lon ne peult bonnemēt demonstrier la pfection des membres dicelle, ie feray cy apres ample ostension de la partie du mitant.

La paulme
Anticque.





DES ANTIQVITES

Pource (comme dict est) que l'ichnographie ou plant des Thermes de l'Empereur Diocletian est reduict & transmue en telle petite forme, a grand peine peult on bonnement comprendre toutes choses de membre en membres: A raison de quoy ay bien voulu pour le moins faire presentation d'une seule partie en forme plus grande, comme celle que cy embas est designee, & vient la partie du mitant a estre ainsi que la lettre A, le demonstre. Et la ligne qui au milieu est, contient cent palmes comme la precedente. Par laquelle le diligent Architecte pourra avec le compas a peu pres congnoistre & trouver quasi toutes les mesures.



Les Thermes de Diocletian (assez suffisamment mentionné) se vsoient pour plaisirs & ioy
Leusez publiques, & par dessus tout, a baigner, dont pource conuenoit grosse quantite
d'eaux, lesquelles eaux se conduisoient de long par aqueducs, & paruenues au lieu, estoient
conseruees en aucunes grandes & profondes cisternes: dont celles des Thermes dudit Dio-
cletian estoient faictes de telles sortes & manieres comme demonstrent celles d'icy embas.
Elles estoient faictes avec pilastres, sur lesquels auoit volseures en croix, avec ses mures a l'en-
tour, fort bien platree de tresbonne matiere, & de mesmes est le pauement, tant ferme & dure
que pour le iourd'hui encor est en estre. L'espeurs desdictes pilastres sont de chescun coste
de quatre piedz. Entre l'vng des pilastres a l'autre ya douze piedz, & est a entendre piedz an-
tiques Romains. Combien que les dessusdictes Thermes soient par palmes mesurez. Et ceste
inferieure ligne est vng demy pied antique.



Le demy pied Antique.





DES ANTIQVITES




EN Rome sont plusieurs antiques Arcqz triumphaulz, entre lesquelz cest edifice est tenu ou reputé de la plusgrād part du cōmun, pour vng Arcq triumphal: toutesfois pour aultant de cōnoissance qu'on en peult auoir, estoit ce vng Porticq ou loge, semblable a vne bourse de marchātz, & paraduēture elle peult auoir este faicte de quelq natiō seule, ainsy q̄ encor pour le iourd'uy se trouue aux villes & citez marchādez, la ou les nations ont leurs especiales places, cōbien que toutesfois ne soient separees. Ce porticque estoit *Nel foro boario*: & par les Antiques estoit appelle, le Temple de Ianus, lequel est mesuré avec la palme anticq: Ceste edifice a quatre portes, cōme le plant dembas le demonstre: entre lung des pilastres a l'autre, ya. xxii. palmes: a lentour du porticque sont. xlviii. nichetz, mais il nen nya que seize a poser statues ou ymages, & la reste ne sont qu'aparēces, alcauoir de petite caeu re: lesquelz dict nichetz estoient aornez de petit pilliers peu esleuez, daultant qu'on en peult comprendre, & estoient d'œuure Corinthe, mais pour l'heure il est frustré de telz aornementz.



Le plant de la suyuant edifice,






Les hauteurs des arcqz sont de quarante quatre palmes, la hauteur des bases cy desoubz signez de E, sont chescun d'une palme & vng tiers. La fascie D, la quelle au cornetz est cōuertie en cornice, est de mesme hauteur. C'ie prise fort le iudice de l'architect en cest endroit: cest, quil ne feist aucune proiecture de cornice aux inferieures parties a celle fin de nempescher aux negotians. La hauteur des aultres cornices ne furent mesurees, mais la forme d'elles contrefaite en diligence ensuyt cy apres.




DES ANTIQVITES

LEs cinq pieces de cornichemētz suyuantz, sont les aornemētz du porticq̃ cy deuant demonſtré: La bāte E, & la faſcie D, furent meſurez (cōme dit eſt) & en ceſte forme proportionneement du grand transmis en petit: mais les aultres furēt ſeulement cōrefaiçtes a vene doeil, adcauſe de l'altitūde ou elles ſont, Et ya peu de difference d'entre lune & l'autre de mēbres & de hauteurs: La figure C, eſt la faſcie ſoubz le premier Nichet.



LArcq triumphal enſuyuāt on lappelle *Larco triumphal di Tito*, dont le plant d'icelluy eſt cy deſoubz denote, eſtant meſure avec le pied anticque. La largeur de l'arcure contient .xviii. piedz & xvii. mi. La groſſeur de la colomne eſt d'vng pied & vingt & ſix minutes & demye. Le pied dont ce preſent eſt meſure, tient ſoixante & quatre minutes, duquel cy embas en poues veoir le demy.






Vant a la largeur & grosseur en ay suffisammēt parle, maintenāt narreray de la haul-
 teur. Et premieremēt, la haulteur de larcure est de double largeur: Le base du pede-
 stal, est deux piedz & quatre minutes de hault: La corniche dudiēt pedestal est de
 trente cinq mi. de haulteur: Laltitude du base de la colōne est enuyron d'vng pied, & tous
 iceulx membres mēmes le chapiteaux de la colōne bien proportionnez de mesures, se trou-
 uent au cōmencemēt de lordre Composite en mon quatriesme liure: Le plat du pedestal est
 de quatre piedz & demy de hault: La haulteur du troncq de la colōne sans base ne chapiteau
 est de dix sept piedz & treize min. La haulteur du chapiteau, est dung pied & vingt sept min.
 Laltitude de larchitrabe est dung pied & dixneuf min. La frise est haulte vng pied & dixsept
 min. La cornice est haulte, deux piedz & six min. Le basement de lepitaſphe, contient en haul-
 teur comme la frise: La haulteur dicelluy epitaſphe, est de neuf piedz & douze mi. Sa largeur
 est de .xxiii. piedz: Lesquelz membres seront cy apres plus amplement demonſtrez & descrip-
 z.



Soubz cest Arcurs ya .xv. parqz carrez fort aornez & enrichys: & au mitant
 vng plusgrand quarre, ou il ya vng Iupiter entretaille.



E seroit chose fort ennuyable & facheuse tant a l'escripuain que au lecteur, de vouloir reciter toutes les parties de ces cornicemētz de membres en membres, en sorte comme elles sont fort pres & diligemmēt este mesurees: mais bien ay voulu prendre la peine de seulement icelles transmuēr avec soigneuse diligence des grandz, en ceste petite forme, tellement que le discret lecteur, avec le maniemēt du compas facilement porra trouuer les proportions. Il est bien notoire, que la plusgrande partie des aornementz estantz aux arcqz triumphaulx de Romme, s'esloignent grandement des escriptures de Vitruue. Ce que croy & pense proceder d'une chose, qui est, que les deuantdictes arcqz sont faictz, la pluspart de despoyllemens daultres edifices, cest de diuerses pieces ramassees, mesmes peult estre qu'en icelluy temps les Architectz estoient audacieux, sans auoir regard ny cure d'aucunes obseruances, parce aussy que cestoit choses pour vser aux triumphes & solempnitez, & possible (comme souuent souloit aduenir) faictes a grande haste. La partie du coste signe de A, est (ainsy que dit est) la base de l'epitaphe. La part B, est la superieure corniche, frize, & architrabe: laquelle corniche a mon semblant est fort licentieuse, par plusieurs raisons: la premiere, elle est trop haultaine, selon la proportion de l'architrabe, & encor par dessus ce elle a trop grand nombre de membres, & principalemēt les mutiles & dentiles ensemble estantes en vne mesme corniche sont reboutees & deiectees de Vitruue. Ce neantmoins elle est fort bien besongnee, & specialement la Scime de dessus, & si cestoit que i'eusse a faire telle corniche (obseruant l'ordre droicturiere) ie feroie la Scime de moindre haulteur, & la coronne plusgrande: les mutiles laisseroie en leurs effectz, & ne entretaileroie point les dentiles, mais bien la Cimaïse. L'architrabe de ceste me plaist assez bien. Les deux membres signez de C, represente la face & le profil de la mensule, qui est la clef de dessus l'arcq. Les membres marquez de E, l'vng demonstre les impostes de ladicte arcure, & l'autre est pour la fascie dentre les colonnes. Ladicte imposte E, est veritablement riche d'aornementz, & plus que trop, car l'vng des membres obscurist l'autre, & si iceulx membres estoient diuise, en sorte que l'vng fut entretaille, & l'autre non, ie les priseroie de beaucoup plus, & en cecy fut l'architect qui restaura & refeit le Pantheon fort iudicieux, car en ses aornemētz lon ne trouue telle confusion ny erreur. Les œuures de desoubz ceste arcure sont tresbien faictes & bien comparties: Et est aussy vng tresbeau compartiment & fort riche d'œure, A ceulx qui sont embrueez & plains des anticquitez de Romme semblera parauenture que ie m'aduence de trop grande hardiesse de me vouloir entremesler de iuger & reprendre les œuures des discretz & tresentendus Romains Antiques, mais en cest endroict ie requiers d'accepter mes parolles en bonne part, parce q̄ toute mon estude & diligence ne tend a autre chose, que d'enseigner & remonstrer a ceulx qui ne le scayuent, & qui se humilieront a ouyr ce que ien ramente & diz. Car il ne suffit de faire choses antiques comme elles se voient, mais cest bien autre chose de scauoir choisir & eslire le plusbeau, suyuant l'auctorite de Vitruue, & deiecter en arriere le laid & mal entendu. Il est bien vray que cest la plusbelle partie a l'architect, de non se fouruoyer a iuger ou condamner comme plusieurs font, lesquelz obstinez en leurs opinions, font toutes choses ainsy quilz ont veu en Rome, disant, les Antiques l'ont faict: & avec cela couurent leur insipience, sans donner autre raison d'aucunes desdictes choses. Il en ya encor daultres disantz, que Vitruue n'estoit qu'un homme, & que eulx aussy sont homes, suffisantz et assez entenduz a faire inuentions nouuelles, sans auoir regard que ledict Vitruue confesse et congnoist d'auoir este instruit de plusieurs prudentes et doctes personnes en partie de son temps et mesmes par les escriptures et doctrines delaissez d'autres ses predecesseurs, et bons maistres.




DES ANTIQVITES



V desoubz le Campidoglio, ya vng Arcq triumphal : Lequel par les inscriptions dicelluy lon peult comprendre, quil fut faict au temps de Lucius Septimius Seuerus, & en son nom: Et daultant que lon en trouue & apperçoit, il fut faict & compose de despouilles daultres edifices: il est aussy fort garny de belle taille & beau enrichissement, estant aussy fort curieusement besoigne & ouure, tant aux costez, comme deuant & derriere: il fut mesure avec l'antique palme Romaine, de douze doigtz, & chescun doigt de quatre minutes, ce quy vient a estre en tout quarante huit minutes: La largeur de l'arcure du mitant, tient vingt deux palmes & quinze minutes & demye: La largeur des arcures, aux costez, contiennēt chescun neuf palmes & .xxx. minu. & l'espaisseur dung chescun diceulx est de .xxiii. palm. & .xxv. minu. Les poternes ou portelletes mesmes des costez sont chescune de sept palmes & .xxx. minu. de largeur. La latitude des pilastres avec les colom. sont chescun de .viii. palm. & sept minu. La grosseur dune chescune colomne dembas est de deux palm. & .xxx. mi. La grosseur dune chescune colomne denhaut sont de deux palm. & .xvi. mi. L'espaisseur des colomnes plattes sont chescune de .xxviii. minu. Cest Arcq est pour l'heure ensepueley & en terre iusques au dessus du pedestal, ce qu'ont cause les ruynes, que tant per celles il est couuert: & combien que lon a descouuert quelq; peu pour le mesurer, ce neantmoins n'a on sceu paruenir iusques au base du pedestal pour icelluy mesurer, a loccasion que cestoit chose trop penable de mouuoir icelles ruynes.

Le Plant de Larcq Triumphal de Lucio Septimio.



CY deuant iay declare tous les mesures de cest Arcq triumphal quât a l'ichnographie, asscauoir la grosseur & largeur: maintenant traicteray ie des haulteurs. La haulteur de l'arcure du mitant, contient quarante cinq palmes & trois minutes. La haulteur d'vngne chescune arcure des costez, est de vingt cinq palmes. La haulteur du pedestal est enuiron de dix palmes. La grosseur de la colomne (côme dit est) contient deux palmes & trente minutes au diametre d'embas, & en la superieure partie dicelle droit soubz l'architrabe deux palmes & seize minutes, & sa haulteur est de vingt & trois palmes, & vingt cinq minutes. La haulteur de l'architrabe, contiét vne palme & trente minutes. L'altitude de la frize, est d'vne palme & trois minutes. La haulteur de la cornice, est de deux palmes & quatorze minutes. La haulteur du plinthe suruenât sur la cornice marque avec vne ✚ est de .xxix. minutes. La base de dessus iceluy plinthe, tient demy palme. La superieure cornice, est d'vne palme & deux minutes. Les aultres membres particuliers seront cy apres declare, transmise en plus grande forme, & de meilleure proportion.


IMP. CÆS. LVCIO SEPTIMIO. M. FIL. SEVERO. PIO. PERTINACI AVG.
PATRI PATRIÆ PARTHICO ARABICO, ET PARTHICO ADIABENICO
PONTIF. MAX. TRIBVNIC. POTEST. XI. IMP. XI. COS. III. PRO
COS. ET IMP. CÆS. M. AVRELIO. L. FIL. ANTONINO. AVG.
PIO FELICI TRIBVNIC. POTEST. VI. COS. PROCOS. P. P.

OPTIMIS, FORTISSIMISQVE PRINCIPIBVS
OB REMPVBLICAM RESTITVTAM IMPERIVMQ. POPVLI ROMANI PRO-
PAGATVM INSIGNIBVS VIRTVTIBVS EORVM DOMI FORISQ. S. P. Q. R.





EN la carte precedente iay suffisamment traicté des haulteurs & largeurs de cest arcq triumphal, de *Lucius Septimius Seuerus*, pour ceste heure ie narreray des particuliers & especialz membres, & cōme cy deuant iay dict, il n'ya nul base des pedestalz, combien que lon peult presumer d'auoir este pour le moins de telle haulteur comme celle de sa cornice, laquelle cornice contient vne palme, & aultant peult contenir ausy ladicte base: desquelz membres les formes cy apres senluyent, signez de G. La base de la colomne, est la aupres marquee de F, laquelle base a soubz son plinthe vne platte pierre ou contrebasse, ce que par aduenture fut fait a l'occasion que la colomne n'eust sceu paruenir a telle haulteur qu'on la desiroit. Le chapiteau n'ay ie pas icy mis, pource que lon en trouuera vng semblable, au commencement de l'ordre Composite en mon quatriesme liure, car cest arcq est d'œuvre Composite. La haulteur de l'architrabe est d'une palme & trente minutes: Et la phrize de neuf palmes & trois minutes: Laquelle phrize, parce qu'elle est remplie de sculpture ou taille, semble estre de moindre haulteur qu'elle n'est en effect en la place ou elle est. Et ausy selon la auctorite & doctrine de Vitruue, appartiendroit icelle estre la quatriesme partie plus haulte que ledict architrabe, ce qui est le contraire. La haulteur de la cornice est de deux palmes & quatorze minutes, laquelle en verite est trop haultaine, selon la proportion des aultres membres, & ce monstre encor d'aultant plus grande, parce qu'elle a plus de proiection que sa haulteur, ce qui me fait espesiallement croire, que cest arcq fut ramasse & assemble d'aultres diuerses edifices, pour cause de la corruptiō desdictes membres. La forme de l'architrabe, frize, & cornice, est cy apres signe par B. La haulteur des bases suruenantz sur icelle cornice, sont chescun de demy palme. La haulteur de la derniere & superieure cornice, est d'une palme & deux minutes, contenant aultant de proiection & saillie, comme lon peult apparcevoir en la figure, & en tel lieu ne veulx despriser ny blasmer telle cornice, mais ie diz qu'elle est faite avec grand entendement, parce que ladicte proiection luy rend commodite, & semble estre plus grande, adcause qu'elle se voit du bas a mont, & a l'occasion ausy qu'il ya petite quantite de matiere, ce qui n'apesantist l'edifice: Ceste cornice est cy apres marquee de A. La cornice soubstenant le grant arcure signe par C, d'icelle est sa proiection de beaucoup trop excedente. Et quant a moy, en tel endroit luy donneroie plustost moindre saillie que sa haulteur, a celle fin que par icelle grande proiection ne m'auugla ny absconsay la veue d'icel arcq. L'œuvre marqué de D, vient a estre la base, laquelle va de colomne a aultre, au dessus des deux petitz arcures, lequel se associe & acompaigne avec la cornice C. La cornice marquee par E, est celle, soubstenant les deux dictes petitz arcures, laquelle cornice a vne scime, que ne vouldroie ausy mestre de telle sorte en œuvre, pource que toutes cornices n'ayant les proiections droicturieres, sont tousiours malplaisantes & inagreables, Et la plus belle part d'une cornice est, que la corone soit de bonne haulteur, & meismes de bonne proiection: parquoy ie dis pour vne reigle commune, que toutes coronnes ayantz plus grande haulteur que la scime, & pour le moins ayantz aultant de saillies comme leurs haulteurs, seront tousiours des entenduz louees & prisees, ce qu'ay bien voulu ramenteuoir, pour & a celle fin d'aduertir iceulx, lesquels n'en ont aucune congnoissance.





DES ANTIQVITES



V Royaulme de Naples, asscauoir, entre Rome et Naples, ya beaucoup d'āricquitez a l'occasion que les Romains prenoient grant deduict et se delectoiēt en ses lieux. Entre lesquelles ya cest Arcq triumphal assez congneu, & en grande veue, encor pour l'heure tout entier & incorruptu. Ce qui ma semble bon de le poser & mesre au nombre des aultres Arcqz, lesquels ont estez faict des Romains. Dont ce present Arcq est a Beneuento, pardeça Naples, & fut mesuré par vne aulne moderne. De laquelle cy embas est demontre la tierce partie: La figure inferieure est l'ichnographie d'icelluy. Et de faire declaration de qui ou par qui fut faict cediēt Arcq n'est besoing, parce que de l'escripture posee & taillee au dessus, lon le porra congnoistre. La largeur de l'arcure est de huiēt aulnes: L'espeuseur de la colomne est dune aulne: Le pilastre soubz ladiēte arcure, est aussy de mesme largeur: Chescune entrecolomne contient trois aulnes: La haulteur dudite arcure est quasy de deux largeurs: La haulteur de la base du pedestal auēc sa contrebasse, tient vne aulne dix onces, & six minutes: La haulteur de sa corniche est de neuf onces: Laltitude de la base de la colomne, contient sept onces: La haulteur du tronq de la colomne sans base ne chapiteau, est de neuf aulnes & quatre onces: La grosseur de la colomne embas, comporte vne aulne en diametre, estant diminuee en la superieure partie la sixiesme part: Le chapiteau est hault, vne aulne, cinq onces & demye: La haulteur de l'architrabe, tient quinze onces: La frise, dix-sept onces. Et la corniche, vne aulne, trois onces & demye: Le plinthe seruant de contrebasse, venant pardessus ladiēte corniche, est hault dixneuf onces & vng quart: La base seant sur icelluy, tient vnze onces en haulteur: Lepitaphe est hault, de quatre aulnes & deux onces: La haulteur de la superieure corniche, est d'une aulne & trois minutes: La haulteur des impostes de l'arcure, sont chescun vne demye aulne.

L'aulne de laquelle fut mesure ce present Arcq, compartie en douze onces, & chescune once en cinq minutes: Comporte les douze onces, soixante minutes, dont vecy la tierce partie d'icelle aulne.








Es aornementz de l'Arcq de Beneuento, lequel est demonstre en la carte passee, seront declairez & demonstrez cy apres proportionneement de façon telle que sont les originales. La base doncques de ce pedestal avec sa corniche cy apres designée par F, sont certainement deux membres de tresbonne maniere & belles pieces de cornichementz. La base de ce pedestal ensemble la contrebasse de desoubz, sont haultz vne aulne & dix onces & six minutes. La corniche du mesme pedestal, est haulte .ix. onces: la base de la colomne a sept onces en haulteur, & est tout d'œuvre Corinthienne, fort bien proportionnee apres ladicte colomne, laquelle est suyuantee marquee d'ung E. Le chapiteau n'ay point icy mis, parce qu'elle (ainsy cōme j'ay cy deuant dit) sera trouuee au cōmencement de l'œuvre Composite en mon .iiii^e. liure, a l'occasion que cest Arcq est d'œuvre Composite. L'architrave, phrise, & corniche, qui suruiennēt sur les colonnes, sont cy en ceste marge suyuantee denotees & marquees par C, lesquels membres sont tresbien proportionnez au residu de l'edifice. Et non obstant que la corniche excede en haulteur l'ordre ordonnee de Vitruue, Ce neantmoins elle est tresproportionneemēt faicte & conduicte de membres: & nya aussi en icelle tel vice ny desordre, quil ya en plusieurs autres corniches, ausquelz sont les mutiles & dentilles l'accompaignant ensemble. Mais l'architecte en cecy prudent & saige, ne voulut entre-tailler les denteletz, combien qu'en ladicte corniche y a pose & mis la forme, & ce pour euitel tel scandale. Ceste mesme consideration auoit aussi l'Architecte qui le Pantheon refeit, en la premiere corniche de dessus les chapelles enuyronnant le temple du dedens: Et pource soit l'Architecte aduerty, d'euader & fuyr tel scandale, & quil ne se fonde sur choses des licentieux et audacieux Architectz, s'excusant & disant, les Antiques l'ont bien faict, parquoy ie le peulx aussi faire. Et combien que les aucuns veullent arguer, disans, quil ya heu tant de diuerfes Architectz, non seulement d'ytalie, mais en plusieurs autres places & contrees du monde, qui ontz faictz les corniches avecques mutiles et dentilles entaillees, ensemble associees, tellement que telle vsance est conuertie en vne loy et consuetude. Ce que toutefois ne voudroie obseruer en nulles de mes choses, ny aussi a autrui conseiller.

La contrebasse de desoubz l'epitaphe, dessus la corniche B, est haulte dixneuf onces & demye. La haulteur des bases de dessus, sont chescū d'vnze onces. La haulteur de cedit epitaphe, contient quatre aulnes & deux onces. La haulteur de la corniche d'icelluy, est d'vne aulne & trois onces. La base de cest epitaphe est a priser, adcause de sa petite proiection, pour raison du regard d'embas a mont. Mais la corniche dont ie veulx parler, est beaucoup trop haultaine selon la proportion de l'epitaphe: & si elle estoit de moindre saillie, & que la coronne fut plus large & de plus grande proiection, m'est aduis qu'elle s'en monstreroit beaucoup myeulx, & l'estime roie aussi plus de n'auoir tant d'entretailleures, & que ses membres fussent compartis en sorte, que l'vng fut entretaille & l'autre non. Mais il ya plusieurs Architectz, & principalement pour l'heur du iourdhuy, lesquels pour complaire au peuple, & aussi pour enrichir & cou urir leurs vitieuses architectures, y mettent tant d'entretailleures que parce ilz confondent du tout l'architecture, & luy ostent la beaulte de sa forme, & qu'ainsy soit que parcy deuant soient este estimees les choses solides & simpleesses de taille aupres des prudentz & iudicieux, si sont ilz encor pour le temps present. La figure signee par D, est l'vng des impostes de l'arcure, estant pour tel membre tresbien entendu. La mesme corniche se change apres en vne face, laquelle court & va a lentour ainsy qu'on aperçoit en sa demonstration, & est demy aulne de hault. Et combien q ces impostes de l'arcure ne se monstrēt d'aucune taille ou sculptu re, si sont ilz toutefois entretaillez au principal, reste quilz sont estez oubliez a contrefaire.




DES ANTIQVITES



Vpres de l'amphitheatre de Rome appellé du cōmun Coliseo, ya vng trebel Arcq triumphal, lequel est fort riche, tant d'aornemētz que de statues ou ymages, & de plusieurs diuerſes hystoires : Il fut dedie a Constantin, mais vulgairemēt est appelle *Le Larco di Traſi*. Ce sumptueux Arcq, combien qu'ainsy soit qu'il est pour l'heur du iourdhuy fort aboly & ensepuely a l'occasion des ruynes & accroissementz de terre, Ce neantmoins il est encor de grande haulteur, & ses portes & entrees sont encor a present plus de deux largeurs en haulteurs. Cest Arcq (comme dict est) est fort plaisant a loel, & trefriche d'aornementz & de taille. Reste que les cornichementz ne sont de belle forme, ny maniere, combien quilz soient sumptueux de sculptures, desquelles traicteray cy apres. Ce plant cy desoubz denoté, est l'ichnographie dudit Arcq triumphal, & fut mesuré avec l'anticque palme Romaine. La largeur du grand arcure, est de .xxii. palmes, & .xxiii. minut. La largeur des moindres arcures aux costez, contiennent chescun vnze palmes & .xi. minu. & demye. Lespeſſeur des pilastres, sont chescun de neuf palmes & .iiii. minu. Lespeſſeur des arcures des costez sont chescun de .xxi. palmes & demye. Par ainsy vient a estre la place en dedens l'arcq quasy en carreure. Lespeſſeur des pedestalz sont chescun de trois palmes, & .xxix. minu. La grosseur des colonnes sont chescune de deux palmes & .xxvi. minutes : lesquelles colonnes sont stryees & canällees du hault embas, & sont d'entieres rondeurs, ayantz au derriere leurs contrepiliers.

Le plant de l'Arcq triumphal de l'Empereur Constantin.




Les largeurs & grosseurs de cest arcq sont suffisamment declairez, reste leurs haulteurs desquels maintenant ie traicteray. Et premierement la base du pedestal avec le plinthe, est hault vne palme & trente minutes. La haulteur du plat desdictz pedestalz, est de sept palmes & cinq min. La haulteur de la corniche du pedestal, est de .xlii. min. La haulteur des contrebases, de desoubz la base ou plinthe de la colomne, sont chescune de .xxxii. min. L'altitude du base de ladicte colomne, est de .lx. min. La haulteur du tronc de la colomne sans base ny chapiteau, est de .xxvi. palm. & .xxv. min. La haulteur du chapiteau, est de deux palmes, & .xxxiiij. min. & est d'œuvre Composite. La haulteur de l'architrave contient vne palme, & .xi. min. mais la frize contient beaucoup moins, estante toute fois entretaillee, ce qui est (côme i'ay aultrefois dit) cōtraire a la doctrine de Vitruue. La haulteur de la corniche, tient vne palme, & .xxi. min. L'altitude de la contrebase, soubz le deuxiesme ordre, est de trois palmes & neuf min. Et de la, iusques au sommet de la corniche ya douze palmes en haulteur: & la haulteur d'icelle corniche cōtient .xxxiiij. min. Les pedestalz de dessus icelle corniche, ne furēt point mesurez, sur lesquels du tamps passe y auoit aulcunes statues, mesmes ausly dessus la corniche signee de B, y estoient ymages appuyantes & ioinctes contre les quatre pillastres, lesquels representoient les prisonniers vaincuz, & triumphateurs. Les lettres cy desoubz designees, sont pardessus l'arcure, en la place signe par A, & en ya encor beaucoup d'autres, qui sont en diuerses lieux de l'arcq.

IMP. CÆS. FL. CONSTANTINO MAX. P. F. AVGVSTO. S. P. Q. R.
QVOD INSTINCTV DIVINITATIS MENTIS MAGNITVDINE CVM
EXERCITV SVOTAM DE TYRANNO, QVAM DE OMNI EIVS FACTI
ONE VNO TEMPORE IVSTIS REMPVBLICAM VLTVSEST ARMIS
ARCVM TRIVMPHIS INSIGNEM DICAVIT.





Vant aux proportions & mesures de l'Arcq triumphal de l'Empereur Constantin en ay cy deuant raisonnablemēt fait mention. Ores veulx ie maintenant traicter des membres particulieres des cornichemētz & de leurs mesures. Et premieremēt, la base signe par F, est celle du pedestal de l'Arcq precedent: la haulteur de laquelle contient vne palme & .xxx. minu. La haulteur du plinthe soubz la base, tient .xxviii. min. La reste des membres est mesureement comparty & proportionné au principal: la haulteur de la corniche du pedestal, lequel soubz la base E est designe, tient vingt deux minutes, & est aussy proportionnee apres la principale. Les contrebases venantz soubz les bases des colonnes (lesquelz ie presuppōse estre illec posez pour cause d'accidentz pour esleuer les colonnes) contiennent chescun en haulteur trente deux minutes. La totale haulteur des bases desdictes colonnes tiennent chescun cinquante trois minut. De l'altitude desdictes colonnes, est cy deuant declaire, & aussy mesmes des chapiteaux, desquelz chapiteaux la forme n'en est icy mise, a l'occasion qu'en mon quatriesme liure en l'ordre Composite y sont les pareilles. Les haulteurs de l'architrabe, phrise, & corniche, sont cy deuant declairees: ladicte corniche est fort modeste, car il n'ya en icelle telle licence, comme es aultres de ce present arcq, ainsy que celle des impostes de l'arcure du milieu, signe de C, lesquelles viennent a estre plus grandes, & plus membreux, que la grande & principale corniche: aussy est elle du tout confuse de membres, & que plus est, & chose insupportable, c'est, qu'il ya les mutiles & dentiles l'une sur l'autre associees, & prenez qu'iceulx dentiles ny estoient, ce n'est ce chose raisonnable de poser telle corniche pour impostz a supporter arcures, dont en ce fut l'architecte du Theatre de Marcello plus prudent & expert que ceulx cy, car les impostes des arcurer de ce dessusdict Theatre, sont les plus beaux & myeux entendu impostes que oncques i'aye veu, & par lesquelz lon peult apprendre & congnoistre, comment & en quelle sorte lon doit faire telles choses. Les impostes des moindres arcures, signez par D, sont chescun hault vne palme & vingt trois minutes & demye: lesquelz impostes se monstreroient beaucoup mieulx, que les deux platz dentre l'astragal de dessus & le chine desoubz, fussent conuertis en vne seule plaine, laquelle seruiroit d'abacus, ou aussy pour corone, leur donnant appartenante ou deue proiecture. La base soubz le second ordre, signe de A, est haulte seize minut. La haulteur de la superieure corniche, est de quarante trois minutes: laquelle haulteur trop peu seroit au regard de si grande distance, si ce n'estoit que sa gaillarde proiecture ou saillie ne la secourut & ayda, & aussy parce que d'embas contremont est regardee, semble estre beaucoup plus grande qu'elle n'est en effect, pource i'estime fort ceste maniere de cornichez en cest endroit, & mesmes toutes autres corniches dont les coronnes d'icelles excedent par proiectures ou saillies: leurs haulteurs ce que tousiours myeux se correspond, & se peullent faire aussy de moindre grosseurs & despences de pierres, mesmes endurent les edifices & supportent moindre charge ou pesanteur. Neantmoins pourtant ne les doit on faire de trop excedentes proiectures: mais regarder aux escriptures de Vitruue en la corone Ionicque, & en la Doricque, de mon quatriesme Liure, la trouuera lon ample declaration.




DES ANTIQVITES

AV dehors de la ville d'Ancone sur le port de mer, ya vne chief de mer, festendant quelque bonne partie en dedens la mer, lequel ne fut fait sans merueilleuse despence, & estoit pour contregarder & defendre les nauieres de la mer de leuante. Et sur icelluy ya vng Arcq triumphal tout de mabre, & d'œuvre Corinthe, n'ayant aucunes sculptures ou taille, excepte les chapiteaux, lesquels sont fait par bon entendement, & en verite cest edifice est de telle beaute & correspondance, & ses portions si bien accordantes au corps, de sorte qu'une personne ores qu'il n'eust la cognoissance de l'art, si se resiouyroit pour le moins de sa beaulte, & ceulx qui l'entendent, veant telles concordances, ne demeurent seulement contentez ny satisfaitz, mais louent & remercient grandement le bon Architecte, lequel a donne occasion a noz posterieurs d'apprendre & estre instruitz par ce tresbeau & bien fait edifice. Aux aornementz duquel est si bien contregarde l'ordre Corinthe, qu'en nulz autres arcqz quelconques. Et par son bon & ferme assemblément se trouue pour l'heure encor entier, reste qu'il est despoillee de plusieurs aornementz. Ce tresbel arcq, d'autant qu'on en peult comprendre, fait edifier Nerva Traianus, duquel la statue ou figure (selon qu'on dit) estoit en la superieure ou sommet de cedit arcq, seant a cheual faignant de menasser les peuples de luy conuaincuz & mis en subiection, a celle fin que de rechief ne se rebellarent: & estoit ceste statue faite de cuyure fort bien besongnee. Entre les colonnes de dessus la corniche signee de E, y estoient aucunes figures de cuyure, selon que les lettres demonstrent escriptes en ses lieux: il ya ausy certaines enseignes de trouz ou pertuys, denotant qu'il y auoit este festons pendantz de cuyure ou d'autres matieres semblables, lesquels peulvent auoir este vsurpe & pris des Gotz ou VVandalz, ou d'autres leurs ennemys. Cest edifice fut mesuree avec le pied anticq, duquel le plant cy desoubz est demonstre. La largeur de l'arcure est de dix piedz, son espaisseur de l'interieure partie tient .ix. piedz & deux minutes. La grosseur de la colonne, est de deux piedz & .xi. minu. Les entrecolumnes ou espaces d'entredoux sont chescunes de sept piedz & cinq minutes en largeur. Les colonnes sortent hors du mur vng pied & .xi. minu. La haulteur de l'arcure, est de .xxv. piedz & vng tiers, & combien q' ceste haulteur excede deux largeurs, n'est pourtāt messeante, quant lon apperceoit la totale masse. La haulteur d'vng chün pedestal avec ses cornices, est de cinq piedz & quinze minutes & demye. La haulteur de la base de la colonne avec son soubzbase, est d'vng pied & .xxxvi. min. L'altitude de la colonne iusques soubz le chapiteau, est de .xix. piedz & .xxij. min. & demye: sa grosseur au desoubz du chapiteau, est dung pied & .lvj. min. La haulteur du chapiteau, est de deux piedz & .xxiiij. min. y compris son abacus, lequel contient dix minutes. Cedit chapiteau se trouuera en mon quatriesme Liure au commencement de l'ordre Corinthe. La haulteur de l'architrabe, est dung pied & .xij. min. La haulteur de la frise est dung pied & .xviij. min. La haulteur de la corniche, est dung pied & .xxij. min. La haulteur du plinthe suruenant sur la corniche, contient vng pied & six minutes & demye. L'altitude de la base, de dessus ledict plinthe, tient trente minutes. La haulteur de l'epitaphe iusques soubz la corniche, est de six piedz & vngt deux minutes, reste la corniche de dessus, laquelle ne fut mesuree mais seulement contrefaite.

Le demy pied Antique Romain.




Le plant de cest Arcq Triumphal Dancone.



PLOTINÆ AVG.
CONIVGI AVG.

DIVÆ MARTIANÆ
AVG.SORORI AVG.


IMP. CÆSARI DIVI NERVÆ.F. NERVÆ TRA
IANO OPTIMO AVG. GERMANIC. DACICO,
PONT. MAX. TRI. POT. XVIII. IMP. XI. COS.
VI. P. P. PROVIDENTISS. PRINCIPI. S. P. Q. R.
QVOD ACCESSVM ITALIÆ, HOC ETIAM ✱
ADDITO, EX PECVNIA SVA, PORTVM TV-
TIOREM NAVIGANTIBVS REDDIDERIT.



DES ANTIQVITES

IL me semble d'auoir assez suffisammēt traicté des mesures de cest Arcq d'Ancone: mais a celle fin que tous les membres des cornichementz soient mieulx entenduz, les demonstireray en la carte suyuant de plusgrande forme, & commencheray aux inferieurs parties, ainſy quilz ſont miſes en œuvre, au fortiſſement de terre: La haulteur du pedeſtal ſigne de G, eſt de cinq piedz y comprins tous ſes cornichementz: Mais la haulteur du plinthe venant ſoubz la baſe dudiſt pedeſtal, eſt de dixhuiſt minutes. La baſe de deſſus icelluy, eſt de dixneuf minutes & vng tiers de haulteur. La corniche du pedeſtal, contient .xx. minutes & vng tiers en haulteur: & aultant comporte la pierre platte marquee de F, laquelle ſelon mon aduiſ ya eſte adiouſtee pour eſleuement de la colomne, & ne ſe monſtre pourtant point mal, mais pluſtoſt myeulx, parce qu'elle eſt aornee alentour d'une cinſte, par laquelle ſe ſepare du plinthe de la colomne. La baſe qui eſt d'œuvre Corinthe enſemble la cinſte de la colomne contient quarante trois minutes en haulteur, & ſa proieſture tient ſeize minutes & demye en largeur. L'eſpeſſeur du pedeſtal tient trois piedz quinze minutes & demye. L'eſpeſſeur de la colomne eſt de deux piedz & vnze minutes, & des ſtries ou canaulx en ya treize hors du pilastre du derriere. La largeur d'vng cheſcun canal eſt de dixſept minutes & demye: Et le liſte dentre deux, tient deux minutes & demye. La haulteur du chapiteau, eſt de l'eſpeſſeur d'embas de la colomne, ſans l'abacus, lequel chapiteau eſt de tresbelle forme, par lequel nous pouons comprendre le texte de Vitruue eſtre corrompu, & que lediſt Vitruue entendoit la haulteur du chapiteau ſans l'abacus, a l'occaſion que la plusgrande part de tous les chapiteaux que oncques i'aye veu ny meſuré, ſont de ſemblables haulteurs, & encor pluſhaultz, & principalemēt les chapiteaux de la rotonde, dont l'vng d'iceulx ſe peult apparcevoir au commencement de ce preſent liure. La haulteur de l'architrabe de deſſus la colomne, eſt d'vng pied & douze minutes. La haulteur de la friſe eſt d'vng pied & dixhuiſt minutes. L'altitude de la corniche, eſt d'vng pied & vingt deux minutes. Ces trois preſentes ſont marquees en la phriſe d'vng A. Le plinthe ſuruenant ſur la corniche, eſt hault vng pied ſix minutes & demye. La baſe de deſſus icelluy tient .xxx. minutes. L'eſpace ou les lettres ſont eſcriptes, eſt ſix piedz & .xxii. minutes de hault, eſtante marquee d'une ✱. L'impoſte de l'arcure eſt ſigne de D, dont la haulteur contient vng pied & quinze minu. Mais la corniche ſuperieure (comme dit eſt) ne fut meſure. La haulteur de la menſole au lieu de la clef ſignee par B, de deſſus l'arcure, eſt de trois piedz & trente minutes, & ſorte hors du mur en la partie ſuperieure vng pied & quatorze minutes, & en la partie inferieure ſorte vng pied. Les quattres tablettes avec la corniche deſſus, eſtantes entre les colom. peult on preſumer auoir eſte pour ſoubſtenemēt de quelque ſtatues de demy taille, deſquelles tablettes cy au coſtez marquees de E, en peult on apparcevoir la forme: & y eſt auſſy le profil la aupres, par lequel lon congnoit de quelle ſorte elles furent beſongnees, car elles ſont remplies d'ouurai ges iuſques pres du centre. La haulteur des corniches qui ſur icelles ſont, eſt de trente deux minutes. Et combien que n'aye narrez de membres en membres toutes leurs proieſtures, ſi les ayie toutefois tranſportez avecq grande diligence du grand en ceſte petite forme.

Et furent
comme dit eſt de
la reſte, avec l'antique pied
Romain meſurees.





DES ANTIQVITES



Ola Cite de Dalmatie gifante pres de la mer, est dotee & remplie de plusieurs Antiquitez, & oultre le Theatre & Amphitheatre (dont cy deuant est faict mention) sont encor aultres edifices, desquelz suis d'intention de pour lheur en traicter. Et en principal ya vng arcq triumphal d'oeuvre Corinthe, tresriche d'aornemētz, tant de figures comme de fueillages & aultres estrangetez, de sorte que depuis les pedestalz amont, n'ya membre ne espace sans estre entretaille, tāt au front du deuant, comme aux costez & par dedens, mesmes ausy soubz l'arcure, en laquelle ya plusieurs & diuerfes aornementz de taille, & conuiendroit auoir grande espace pour le tout monstrier: a raison dequoy ne demonstrey que seulement les parties desquelles l'architecte porra auoir necessite par l'inuention & mesure. Le plant de ce suyuant arcq est cy embas denote, & fut avec vng pied moderne mesure, duquel pied se demonstre la moictie d'icelluy en ceste inferieure partie. L'arcure est large douze piedz & demy, & sa haulteur enuyron de vingt & vng pied. Les pilastres au costez du dedens, sont quatre piedz despez. Lespeueur d'une chescune colonne, contient vng pied neuf onces et demye: L'entrecolonne tient deux piedz trois onces et demye: Les pilastres de l'arcure sont larges, chūn d'vng pied et deux onces: La haulteur du plinthe venant soubz la base du pedestal, contient vng pied. Ladicte base est haulte quatre onces: Le plat des pedestalz, tient trois piedz en haulteur: la corniche tient quatre onces: Le plinthe marque par D, soubz la colonne, tient quatre onces: La haulteur du base de la colonne avec son plinthe, est de dix onces et vng quart: La haulteur de la colonne, est de seize piedz vne once et trois quartz: La haulteur des chapiteaux sont chescun de deux piedz et vne once: L'altitude de l'architrabe, est d'vng pied et vne once: La haulteur de la Phrise, est d'vng pied et deux onces: La haulteur de la corniche, est d'vng pied et dix onces: L'altitude du plinthe suruenant sur la Corniche, est d'vng pied & deux onces: La haulteur dessoubz bases des pedestalz & ausy de leurs Plinthes de dessus, sont ensemble d'vng pied et deux onces: La haulteur de la Base seule, est de dix onces: La haulteur du plat desdictz pedestalz, contient deux piedz et vne once: leur corniche tient six onces. Le petit cauez venant dessus icelle corniche (lequel cōme ie croy est de Vitruue Corona Lisis appelle) tient cinq onces: Et est cecy touchant l'ichnographie de cest Arcq suyuant.

Le demy commun pied, compartiz en douze portions appelees onces,
dont ceste presente ligne est de six onces, qui faict vng demy pied.



Les mesures de cest Arcq present sont cy deuant notees, en la Carte suyuant se font demonstrees les
particuliers membres. Ces grandes lettres qu'icy sont, se voyent en la phryse signee de Y.


SALVIA. POSTVMA. SERGI. DE SVA PECVNIA.

Ces maiuscules presentes sont aux trois pedestalz marquez de .X. H. et A.

L. SERGIVS. C. F.
ÆD. II. VIR.


L. SERGIVS. L. F. LEPIDVS. ÆD.
TRI. MIL. LEG. XXIX.

C. SERGIVS. C. F.
ÆD. II. VIR QVINQ.





EN la carte passée iay traicté des vniuerfeles mesures de Larcq triumphal de Pola: mesmes aussy demonstté la forme dicelluy : & en partie declairé des sumptueux & riches aornementz du mesme Arcq: Maintenant traicteray des membres particuliers. Et cōmenceant premierement en la partie inferieure, en telle mode quil fut premiere-ment pose & mis sur la terre: La haulteur doncques du plinthe estant soubz le base du pedestal, est d'vng pied, combien q̄ toutteffois en ya encor vng soubz icelluy qui est de plusgrāde altitude, mais il est couuert de terre: La haulteur de l'environnante renuersee Cimaise avec l'astragal dessus le plinthe est de quatre onces: Le plat de chescun pedestal est de trois piedz de hault. Sa Cimaïse de dessus, contient quatre onces: aultant comporte aussy la contrebasse dessus icelle Cimaïse: La haulteur des bases d'vne chescune colonne est de dix onces, & fort bien besoingnez de taille: & ores q̄ sa forme soit de Doricque, ce neantmoins par les delicatz aornemētz representent & semblent estre faicte pour vne Corinthe: Lesdictes colonnes sont stryees ou canallees depuis le hault iusques embas, & sortent aultant de canalz hors du pilastre, comme ceste figure cy desoubz le demonstre: La haulteur d'vng chescun chapiteau avec son abacus, tiennent deux piedz & vne once: lequel chapiteau est de plusgrāde haulteur, que la grosseur dembas de la colonne. Nō obstant il est fort gracieux & plaissant a loeil, & est icel luy au plusrichemēt conduict & ouuré, ainsy que cy apres lon peult veoir en sa propre figure. Et quanteffois que le chapiteau de Corinthe, sera plus hault q̄ le diametre de la colonne embas, alors le iugeray & trouueray plus agreable a loeil, qu'il ne seroit, sil ne cōtenoit seulement que avec son abacus le diametre de sa colonne. Et combien que Vitruue ainsy le descript, ce neantmoins (ainsy q̄ dit est en diuerfes places) le texte peult estre corrompu: La haulteur de l'architrabe, tient vng pied & vne once: La haulteur de la Frise, est d'vng pied & deux onces: L'altitude de la Cornice, est d'vng pied & dix onces: laq̄lle Cornice est fort desordonnee, ores qu'elle soit riche d'œuure, p̄ laquelle œuure se trouue confondue. Et ce que plus luy desplait cest Lechine avec les œufz de dessus la Scime, vne chose qu'en verite est inagreable a loeil: Et encor que plus est a despriser, cest q̄ ladicte Echine est outretaillez en la partie superieure sans estre couverte d'aucuns petitiz membres, a celle fin qu'elle fut este conseruee, & ne paruenir a estre consumee des eaues: mais tousiours ayantz trouuez imprudentz Architectz, cōme encor pour le iourd'hui se trouuent: Lesquelz pour complaire au peuple, admeinent & posent beaucoup de sculptures en leurs œuures, sans auoir regard a la qualite de lordre: & les feront aussy bien en l'œuure Doricque, laquelle requiert constāce, force, & grauite, beaucoup d'entretail- leurs, cōme en celle de Corinthe, laquelle par sa delicatete luy appartient diuerfes aornemētz, Mais les iudicieux & scauans Architectz obserueront tousiours le decor. Et sil aduient qu'ilz fassent aulcune œuure selon la Doricq̄, ilz ensuyuront les bonnes anticquitez, qui la pluspart s'accordent aux doctrines de Vitruue: & sil font aussy quelque besongne apres l'œuure Corinthe, icelle vestiront & aorneront ilz selon l'appartenāce de l'œuure. Et cecy ayie bien voulu ramenteuoir, pour en aduertir & donner congnoissance a ceulx qui en sont ignorans, Car les scauāns n'ont que faire de mon aduis. Or pour retourner au propos, Il ya sur ceste cornice vng basement, conformant trois pedestalz: Soubz lequel ya vng Plinthe ou soubzbase suruenant sur icelle corniche, & a celle fin de non estre occupe par la proiecture d'icelle corniche, esleue d'vng pied de hault. Dessus icelluy suruient la base, duquel la haulteur contient dix onces. Le plat dudit basemēt, est de deux piedz & vne once de haulteur. La cornice de dessus est d'vng demy pied de hault, laquelle cornice est gracieuse, & se discerne tresbiē les membres lung de l'autre, parce qu'entre vng membre taille, ya tousiours vng vny & nō taille. Dessus icelle cornice ya ceste ioincture appelee Corona Lisis, d'aultant que ie puis entendre par Vitruue, laquelle contient en haulteur cinq onces: Par dessus icelle ya encor aulcunes pierres, qui n'ont point de fin ne bout, par lesquelles lon peult presumer, sur icelles y auoir este quelque aultre chose: La haulteur de cesdictes pierres sont chescune de dix onces. La haulteur des impostes de cest Arcq, est aussy pour chescune de dix onces, lesquelz impostes sont du tout desordonnee- ment faict. Et combien que les trois membres estantz lung sur l'autre diuerfes, toutteffois se conforment ilz en proiectures, parquoy ilz ne font bon effect en l'œuure. Quant aux aultres membres, lon les congnoistra, par les caracteres du grand Arcq.





DES ANTIQVITES



EN Verone ville fort Anticque ya beaucoup d'Arcqz triumphaulx, & entre les aultres en ya vng aupres de la porte de Castel vecchio: lequel pour vray a tresbelle forme & proportion. Cest Arcq pour aultant qu'on en peult comprendre, estoit aussy bien aorne derriere comme deuant, & aussy aux costez auoit il deux entrees, ainsy q'lon peult congnoistre & apperceuoir par les vestiges encor pour lheure y estantz, combien qu'ainsy soit que ie ne demonstre q'ung coste: Cest edifice fut mesure du mesme pied, que le deuantdict Arcq de Pola fut mesure: La largeur de ceste arcure, est de dix piedz & demy: L'espesseur d'une chescune colomne, est de deux piedz & deux onces: Chescune entrecolomne, est de quatre piedz, & trois onces de large: Le pilastre ou pillier de l'arcure, est de deux piedz & deux onces de large: L'espesseur dudite arcure aux parties interieures, est de quatre piedz & demy: La largeur de chescun tabernacle dentre les colomnes, est de deux piedz & dix onces: Et est cecy touchant la largeur & espesleur, Mais venant aux hauteurs, la base doncques du pedestal de la colomne, ensemble le Plinthe, est vng pied & trois onces de hault: Le plat du pedestal, tient quatre piedz, trois onces & demye en haulteur, Sa corniche contient dix onces & demye: La haulteur du base de la colomne est d'vng pied: La haulteur du troncq de ladiete colomne, sans base ny chapiteau, comporte .xviij. piedz & trois onces: La haulteur du chapiteau, est de deux piedz & quatre onces & demye: L'architrabe contient en haulteur, vng pied & demy: La haulteur de la frise est d'vng pied & sept onces & demye: La corniche est haulte, vng pied & dix onces: & combien qu'en ceste figure y soit le frontispice, ce neantmoins ne le voit on en cest Arcq: car depuis la premiere corniche a mont n'ya aucunes choses. Nonobstant ores qu'ainsy soit que le mur par longuesse de temps soit consume & abatu, si voit on toutesfois d'aucuns vestiges, par lequel on peult comprendre le frontispice y auoir este: La corniche superieure ny est point, & parce n'en declare nulles mesures quelconques, quant a l'anticquite: Mais en ay bien voulu faire & demostre vne aultre par portraicture (estante sur sa place) de telle forme & mesure, comme mon intention seroit de faire icelle, ayant pour commune reigle, que les choses de dessus la quatriesme partie deminueroint a celles d'embas: Ceste corniche doncques sera la quarte part moindre que celle de desoubz, estante ainsy compartie, que l'entierre haulteur soit diuisee en quatre partz & demye: La demye sera pour l'Astragal avec sa Cinete, vne partie entiere sera pour la frise: vne aultre partie sera pour vng membre soubz la coronne, qui peult estre vng dentil ou Echine: La troiziesme part sera pour la coronne avec son fillet: & la quatriesme, sera pour la Scime: La proiecture soit come la haulteur. Et ainsy sera ceste superieure corniche de telle raison faicte come dict est: Entre les colomnes ya tabernacles ou fouloient estre en iceulx statues ou ymages: Lesquelz tabernacles contiennent en largeur chescun deux piedz & dix onces, & leurs hauteurs sept piedz, & sont profondz au mur vng chescun vng pied & dix onces: la haulteur de leurs basementz, est pour chescun de quatre piedz, y compris base & Scime: Les petitz pilliers, sont a chescun costez vng demy pied despez: L'architrabe contient cinq onces & demye: La frise, est haulte six onces: La haulteur de la corniche sans la Scime, comporte quatre onces: La haulteur du timpan du frontispice, est de huit onces: Au dessus de ceditz tabernacles ya sur chescun vne tablette & vne corniche dessus: lesquelles tablettes contiennent chescune deux piedz en largenr, & en haulteur vng pied: La haulteur de leurs corniches sont chescune d'unze onces: La haulteur de l'ouverture de l'arcure, combien qu'il soit en partie ensepuely en l'inférieure, si est il toutesfois plus de deux largeurs en haulteur: car sa largeur est de dix piedz & vng quart, & sa haulteur est de vingt cinq piedz & demy: Le chapiteau venant soubz l'arcure est aultant hault comme large. L'œuvre de cest Arcq est Composite, & estoit fort aorne de statues de cuyure & de marbre, ainsy qu'on peult comprendre par les places vuydes.

L'ichnographie ou plant de ce present Arcq.





A forme de l'arcq triumphal de *Castel Vecchio*, en Verone, est de telle façon & maniere, comme cy desoubz est demonstre. Et combien que depuis la frize a mont, ne soient aucunes enseignes de nulz aornemétz, Ce neantmoins pouoit ainly auoir este. Et pource q̄ les membres de ceste p̄sente sont si petis, parquoy a grand peine les porroit on entendre. Les ay bié voulu mestre en portraict & significations, de lettres plus ample-ment en la carte suyuant. Cest arcq triumphal pour aultant qu'en la partie de dedens lon trouue par escript, vneillent les aucuns proposer q̄ Vitruue auoit icelluy faict faire: ce q̄ ie ne croy, & ce pour deux raisons, pour la premiere est, q̄ ie ne vois point que l'inscription parle de Vitruuius Pollio, mais possible est q̄ ce fut vng aultre Vitruue qui le fait faire: Laultre raison plus ouuerte est ceste, q̄ Vitruuius Pollio, en ses escriptures d'architecture, les mutiles & dentiles, estâtz en vne corniche les desiecte & repudie, laq̄lle corniche trouuez en cest Arcq, & pource ie n'affirme en maniere quelconq̄, que Vitruue (s'entens le grand Architecte) aye ordonne cest Arcq: mais comme il en soit, cest Arcq a tresbelle forme.

Ces presentes lettres sont soubz le ta-
bernacle au pedestal.

C. GAVIO. C. F.
STRABONI

Ces lettres sont entaillees en l'interieu-
re partie de cest Arcq.

L. VITRUVIVS. L. L. CERDO
ARCHITECTVS.

Ces lettres sont ausly au pe-
destal du tabernacle.

M. GAVIO. C. F.
MACRO.






L'occasion que ie n'ay assez amplement declairé ny descript tous les membres particuliers de cest arcq deuandié, ny ausy tant demonstré en forme par laquelle ilz puissent estre comprins, a raison dequoy les ay voulu presenter plusgrādz en ceste carte suyuant par telle forme du principal transmis. Et premierement la hauteur du plinthe venant soubz le base du pedestāl signé de G, est d'vng pied & trois onces. La hauteur de la base de dessus icelluy plinthe, contient six onces. Le plat du pedestāl marquée de F, est de quatre piedz, trois onces & demye de hault. Sa corniche est de dix onces & demye en hauteur. La base de la colomne est d'vng pied de hault. Le plinthe de ladicte base, se conuertist en corōne Lifis, laquelle chose fort me plaist, parce que j'ay veu aulcuns pedestālz Grecz de telle mode. La colomne est stryee ou canallee du hault en bas. La hauteur de son chapiteau, cōtient vng pied quatre onces & demye, mais sa forme n'est pas icy, pour cause qu'elle est demonstree au cōmencemēt de lordre Composite. Lequel chapiteau en effect est Composite, combiē qu'on peult iuger & nōmer lentier arcq Corinthe, & ce chapiteau est en ce dessus dict lieu marqué de C: Et mesmemēt se trouue ausy audict lieu les chapiteaux des impostes de l'arcure, lequel est signé par D, mais les chapiteaux des tabernacles dentre les colomnes, sont cy deuāt denotees par H, & ausy la corniche avec la base marqué par E, est celle qui vient soubz les tabernacles. La figure C, est la table de dessus lesdictz tabernacles. Et la figure marquée D, est l'architrabe, phrise & corniche du frontispice des tabernacles. La figure B, est l'ouuraige enuironnant l'arcure: La corniche signee par A, est la principale corniche de dessus l'arcure, laquelle en effect est bien besongnee & agreable a lœil, combiē que touteffois elle soit entachee de ce vice, au parauant de moy faict mention, qui est que des mutiles et dentiles reprouuez de Vitruue, par les plusapparentes raisons. Mais en ce passaige suyt & s'eslieuera vng grand cry de plusieurs: lesquelz dirōt que depuis Vitruue, tant & en si grandz nombres d'architectz ont estez qui ont faictz aux Itales & ailleurs, les Corniches avec mutiles & dentilles, cōme dit est, tellement que dorresnauant nya plus de redarguements ny contradictiō: mais est octroye a vng chescun de faire tout ce qui se trouue aux Anticques: A lencontre desquelz ie peulx respondre, q̄ en nyant le cōmencement, ilz seront vanicqueurs de toutes choses: mais sil est ainly quilz confessent & congnoissent Vitruue auoir este vng tresgrand & scauant Architecte, comme la plusgrand part pour tel le tiennent: eulx mesmes (en lisant les escriptures dicelluy Vitruue) confesseront quilz ont grant tort.

La moictie du commun pied, par lequel l'ichnographie & l'orthographie ensemble tous les aornementz de cest edifice sont este mesurees.








EN Verone a la porte de *i Leoni*, ya vng Arcq triumphal avec deux egales entrees, desquelz se trouue en peu de places, mais bien avec trois arcures: Laquelle edifice combien qu'elle ayt la figure de six fenestres, ce nonobstant ne sont elles ouuertes, ne aussy de fort grandes caueures, mais pour aultant que lon en peult comprendre, ont estez places, ou sont estez rondes ymaiges ou statues. Dessus la premier corniche droict au milieu est ceste edifice, cauee en maniere d'vng nid, mais point fort profond au mur. Neantmoins par la grande proiection de la corniche sy pouoient tenir & estre aulcunes personnes, faisant quelque office en temps de triumphes, mais telles choses sont de petite importance a l'architect, a raison dequoy veulx maintenant traicter des mesures. Et premierement l'ouuerture d'vng chescun arcure est d'vne piedz de largeur, & dixhuiet de hault. Le blocq ou soubzbas du pedestal, est d'vng pied de hault. La base dudiect pedestal, contiēt trois onces. Le plat dudiect pedestal, tient deux piedz, & vne once en haulteur: Et sa corniche contient trois onces. La haulteur de la base de la colomne, est de huiet onces & demye. L'altitude de la colom. sans base ny chapiteau, est de .xii. piedz & vng tiers. Sa grosseur est d'vng pied & quatre onces. La haulteur du chapiteau, est d'vng pied & huiet onces. La haulteur de l'architrabe, tient vng pied, & cinq onces. La phrize contiēt en haulteur vng pied & huiet onces, & aultant comporte la haulteur de la corniche. Depuis ladiect corniche iusques au second ordre, ya trois piedz & demy de haulteur, sur laquelle ya certaines mutiles, au dessus desquelles peulent auoir este statues ou ymaiges, ioinctes cōtre les sept pilastres, entre lesquelz sont les fenestres aornees & enrichies de petit pilliers point trop esleuez. La largeur d'vne chescune fenestre comporte deux piedz & deux onces: & leurs haulteurs sont chescune de quatre piedz & trois onces. La haulteur des grandes colomnes, sont chescune de cinq piedz & quatre onces, y compris base & chapiteau, & sont plattes peu esleuees. L'altitude du second architrabe, tient six onces & demye. La haulteur de la phrise, est d'vng pied & demy. Celle de la corniche est de dix onces & demye. La coronne Lisis de dessus icelle corniche est haulte dix onces. Chescune base du second pedestal est d'vng pied de hault: le plat d'icelluy est hault trois piedz sept onces & demye: La base de la colomne du second ordre, contient huiet onces en haulteur: Chescune colomne tient huiet piedz, trois onces & demye. L'espeisseur d'icelle, cōporte chescune dix onces & demye. La haulteur d'vng chescun chapiteau est d'vng pied, vng once & demye. La haulteur de l'architrabe contient vng pied & vne once. La frise est d'vng pied & deux onces: Et la corniche tient vng pied en haulteur, sur laquelle ya encor quelqne peu du mur, mais lon ne sceit que ce peult auoir este. Cest arcq n'est pas de grande espeisseur, mesmes n'apperoit on a l'autre coste auoir este enrichy de nulz aornementz, a l'occasion que au derriere de cediect arcq lon en trouue encor vng aultre si trespres l'vng de l'autre, que a grand peine peult on aller entredeux, ainsy comme cy apres ie diray & demonstreray par figure. Les fenestres de ce present arcq ne sont en tel ordre, mais sont quelque peu desordonnees: Car les deux fenestres ne viennent droictement en perpendicule sur la poincte du frontispice, mais sont de coste, laquelle chose desplaist a loeil. Et pource que telle discordance ne pouoie endurer, les ay cy mis par ordre. Les chapiteaux de cest arcq sont en partie Composite & lec aulcuns Corinthes, comme cy apres ie declaireray & presenteray par figure.

Dessus cest Arcq a la main droicte sont escriptz ces lettres suyuanes.

T. FLAVIVS P. F. NORICVS. IIII. VIR. ID. V. F. BAVIA. Q. L.
PRIMA SIBI, ET POLICLITO SIVE SERVO, SIVE LIBERTO
MEO, ET L. CALPVRNIO VEGETO.



DES ANTIQVITES



Y deuant i'ay demonstre les vniuerseles mesures du precedent Arcq, & avec ce sa forme proportionnee apres le principal: mais des particuliers membres n'ay sceu en si petite forme donner aulcune certitude d'iceulx: Desquelz membres parce quilz sont beaucoup, & de diuerse aornementz, nous en voulons aux deux Cartes suyuant esclairer quelque motif. Quant aux haulteurs & largeurs n'en feray plus de narration, car nous en auons dict: mais seulement les demonstrey telles quelles sont.

La figure de G, est le premier pedestal avec sa base, & avec le commencement de la colonne au dessus, laquelle est canelée, tous les membres estantz proportionnez apres le grant. Le Chapiteau signe par E. ayant l'architrabe dessus, s'uyt sur la premiere colonne, ainsi que les caueures le demonstrent. La figure marquee par D, vient a estre l'architrabe, phrise, & corniche, ensemble, l'une pres de l'autre, lesquelz sont sur lesdictes premieres colonnes. Et icel le corniche par les auctoritez & exemples declairez cy deuant en plusieurs places, porra le prudent Lecteur veoir & congnoistre, si elle est vicieuse, ou bonne. Le Chapiteau

marque par F, est celluy qui l'arcure soubstient sur les pilliers carrez.

Et ses deux chapiteaux sont d'œures Latines, & fort beaulx.

Et ainsi doncques, comme i'ay dict, ne traicteray d'aucunes mesures, car ses presentes figures

sont proportionnees apres le
principal & avec tresgran
de diligence du


grand en

petit

transmis.

La moictie du commun pied, duquel ceste deuandiste double arcure
avec ses aornementz suyuant sont estez mesurez.









Insy comme i'ay dit, est cest Arcq dessusdict fort riche d'aornementz, entre lesquels d'iceulx en ya de biens entenduz, & en ya ausy qui sont viciex & difforme. Et ne trouue en verite, que plus me desplaie, que la corniche passee signee par D, & ce pour cause des raisons predictes: mais quant a la reste de toutes les autres dessusdictes, sont de bonne maniere, tant les enrichissementz comme les corniches. Et ainsi comme les membres passez sont du premier ordre, le semblable sont ausy les suyuantz du deuxiesme ordre. Ceste mutile signee de H, est au commencement du second ordre, dessus le frontispice, sur lesquelles mutiles (comme dit est) y estoient figures ioinctes contre le plat pillastre. La fenestre marquee de I, est la forme de l'une des six fenestres, avec sa cornichette de dessus, & est la suyuant la mesure droicturiere. Le chapiteau & la base K, sont de la mesme fenestre, demonstre en plus grande forme, a celle fin d'auoir des membres d'iceulx meilleure congnoissance. La base, & le chapiteau signe par L, est le petit pillier dentre les pilastres & les fenestres. Et veritablement, auz deux bases, asscauoir, ceulx des grandz pilliers ioinduz avec ceulx des petitz, fut en ce l'architecte tresingenieux d'accorder l'vng avec l'autre, en sorte que lesdictes grandz pilliers auroient leurs bases appartenantz, & ausy les petitz pilliers leurs bases de moindre haulteurs a l'aduenant, ce que fort ie prise. L'architrabe, frize, & corniche, signe par C, representent celles du deuxiesme ordre au dessus des petitz pilliers: Ceste corniche est fort moderee, & non confuze dentretailleures. Le pedestal marque par B, est celluy du dernier ordre, sur lequel se repose la base signee par M, mesmes ausy le chapiteau qui est la dessus est son associe, estant iceluy de pure œuure Corinthe, lequel est conforme au principal tant d'œuure comme de mignotise, & est a mon semblant fort gratieux. L'architrabe frize & corniche, signe de A, demonstre la derniere corniche: l'architrabe n'est a repudier, pour ce qu'il n'a que deux fascies, car s'il en auoit trois, par l'esloignement de la veue, se monstroit trop empesche. La corniche avec les mutiles m'est fort agreable, a l'occasion qu'elle n'a nulz dentelles estante tresbien compartie de membres, & si n'est ausy confuze de taille, mais ayt vne gracieuse proiection, laquelle comporte quel que peu plus que sa haulteur.


La moitie du commun pied.






DES ANTIQVITES

Cest Arcq triumphal fut faict deuant le precedent, ce que demonstre la tablette dicelluy, en laquelle ya escript, P. VALERIVS, Q. CECILIVS, Q. SERVILIVS, P. CORNELIVS. Et lon croit, que ce a este du temps de Hannibal. Cest Arcq est mesure avecq la mesme mesure du deuantdict. La largeur de louverture dunc chescun arcure, contient vnze piedz, & sa haulteur. xviij. piedz. chescun des pilastres desdictes arcures sont dunc pied & viij. onces de large. Entre les deux pilastres ya cinq piedz & iiij. onces. Les costez tiennent chescun trois piedz. La cimaise soubz le C, au lieu darchitrave, comporte six onces & demye. La haulteur de la phrise est dune pied, sept onces & demye. Ceste cincte de dessus la phrise contient deux onces. La cimaise soubz le dentille est de quatre onces & vng quart: & la cimaise de la dessus est dune once & demye. Lastragal contient vne once. La cimaise de desoubz la corone, tient vne once trois quartz. La corone est haulte trois onces & demye: Sa cimaise est de deux onces & vng quart. La Scime est haulte trois onces & demye: mais son fillet tient deux onces. La proiecture de tout comporte aultant que toute sa haulteur. Le basement suruenant sur ceste corniche, tient vng pied, vne once & demye en haulteur. Lespeisseur dune chescune des colom. canellees, tient vng pied, trois onces. La haulteur dicelles sans chapiteau est. viij. piedz vne once & demye. Le chapiteau contient dix onces en haulteur. Cesdites colonnes nont nulz bases ne cincte. Carottus le quel a aussy contrefaict cest Arcq, ne met seulement que quatre parques, la ou bisfoires sont entretaillees, en cest ordre troiziesme, & avec ce sinon cinq colonnes. Et en la second ordre ny met que quatre fenestres, cinq pilastres, & la dessus aussy cinq colonnes. A le troiziesme corniche ne peult on aduenir.




Ceste figure signee par B, est l'architrave, frise, & corniche, de dessus les fenestres: La haulteur de la premiere fascie de l'architrave, est de huit onces & .iiij. quartz. La seconde tient neuf onces & demye: La Tenia est de trois onces: & la frise, est haulte d'vng pied & quatre onces: la largeur des Triglyphes, tient vng pied: Cest petite bordure de dessus est de trois quartz donc: l'autre de dessus icelle, contient vne once & vng quart: La Cimaïse soubz le dentille, est de deux onces & vng quart: la haulteur du dentille, est de quatre onces & trois quartz: Ce petit cauet de dessus, contient vne once: Les astragaulz sont de .iiij. quartz donc: La Cimaïse de dessus, tient vne once & vng quart: La haulteur de la Coronne, est de quatre onces: Sa Cimaïse, est de .iiij. onces: La haulteur de la Scime, est de quatre onces: son fillet, est de deux onces & demye: La proieure du tout, contient autant que toute la haulteur d'icelle: L'entier Arcq peult estre appelle Doricque excepte Lastragal entretaille, ce qui fut d'une simplese & fantasie qui survint a l'architecture. D'autres plusieurs choses de Verone me tairay, a l'occasion quelles sont sorties desordonnees, & principalement L'arcq triumphal de i Borsari, qui est d'œuvre barbarisque.




DES ANTIQVITES

A Pres auoir traicte tant de choses Antiques, & mises par figures, cest aussi bien raison que ie demonstre aucunes des modernes. Et especiallement l'œuvre de Bramant, leq̃l touttefois n'ay delaisse au derriere, ayant fait ostention & demonstré la merueilleuse œuvre de Saint Pierre, & aultres choses traictantes des sainctz temples: Et peult on en verite bien dire, quil a este celluy qui a fait resusciter les bonnes & parfaites Architectures. Neantmoins par les moiens de Iulio. 2. P. M. comme representent tant de belles œuvres de luy faictes en Rome, desquelles celle d'icy embas en est vne, & est vne gallerie faicte a Belvedere au iardin du Pape, en laq̃lle l'on comprend deux tresbelles choses: l'vne est sa fortitude, parce que les pilastres sont de si grande largeur & espaisseur: l'autre est pource qu'elle a tant de beaulx acōpaignementz & tant bien ornee & enrichie: La largeur d'vne chescune ouuerture des arcures est de dixhuiet palmes, & aultant contiennent aussi chescun des pilastres: La largeur d'iceulx pilastres est cōpartie en vnze portions: dont a chescun coste le pilastre soubstant l'arcure, aura vne d'icelles, ce qui fait deux portions, aultres deux parties baillera on a chescune colōne, monte ensemble quatre parties: Deux aultres donnera on aux petitz pilastres des nichetz, & trois portions a iceulx nichetz, paraincy seront les vnze portions diuisees: La haulteur d'vng chescun pedestal sera de la moitie de l'ouuerture, ou aussi des pilastres: La haulteur d'vne chescune base dudiect pedestal, contiendra vne partie de ses vnze diuisions cy dessusdictes: La corniche contient la neufiesme partie moins que le base: La haulteur d'vne chescune colomne avec base & chapiteau, est de neuf diametres, & avec ce la septiesme partie: La base est haulte de la moitie de l'espaisseur d'icelle colōne: Le chapiteau est de mesme haulteur, & la septiesme partie pour l'abacus: L'architrabe, frise, & corniche, contiennent aultant q̃ le pedestal sans sa base: & icelle haulteur cōpartie en vnze, quatre portions sera pour l'architrabe, trois donnera on a la frise, adcause quelle nest entretaillee: & les aultres trois sera pour la corniche: quant doncques le demy cercle de l'arcure sera tire, la haulteur de l'ouuerture sera doublee & de deux largeurs: Et apres les impostes seront tirez sur leurs places, desquelz vng chescun d'iceulx tiennent la moitie d'vne grosseur de colomne. Par aincy seront les niches & quarez de dessus, leurs appartenantes proportions.






Pour & acause que cy au coste (parce que la figure est de si petite forme) n'ay sceu parfaitement demonstrier les mēbres de la dessusdictē loge ou gallerie, les ay bien voulu mētre cy embas en plus grande formosité. Ceste partie C, est le pedesial de ceste loge, sur icelluy estant ausy la base de la colōne proportionnee apres le principal. La figure B, represente l'imposte de l'arcure, avec vne portion d'icelle: La figure signee de A, demonstre l'architrabe, frise, & corniche, de dessus les colonnes. Touchant des generales mesures en est assez dist, pourtant n'en ramentray riens, car tout est proportionne apres le grand. En ceste corniche fut l'architect fort inuentif, de faire courir la coronne sans rompure tout du long de l'edifice, & que depuis icelle coronne embas, laissa saillir dehors la reste des autres membres, ce qui la faict monstrier gracieuse & plaisante: & la couronne en est ausy tant plus forte, conseruant l'entier ceuvre des caues & pluyes. Par laquelle inuention se porra ayder l'architect en plusieurs diuers accidentz, Car les saillies de toutes corniches, ne se monstrent tousiours pas bien, mais en daulcunes places bien, & en vne autre mal: mesmes sont les grandes proiectures aulcunes fois insupportables: la ou les colonnes n'ont au costez aulcuns pilastres, & quant a ses saillies ou proiectures en ay assez amplement traicte en mon quatriesme Liure, au traicte des quatre manieres de Simmetries des Colonnes.






Y deuant ay demonstre vne œuvre de l'Architect Bramāt, maintenāt feray ostention encor d'une aultre faicte du mesme maistre, par laquelle le prudēt Architect porra auoir grande ayde & asistence, par les diuerses aornementz qui la se voyent. En cestedit loge voulut ledict Architect demōstrer trois ordres l'vng sur l'autre asscauoir la Doricque, Ionicque, & Corinthe: Et en verite estoient les ordres fort belles, bien enrichies & accompaignees. Neantmoins parce que les pilastres de la premiere ordre Doricque furent trouue trop debiles, & l'arcure trop large, selon la proportion desdictes pilastres, mesmes aussy par le massif du mur en l'ordre Ionicque: par ces causes en proces de temps cest cōmence a ruynier: mais Balthasar de Sienes vng hōme fort expert & tresentendu Architect, repara icelles ruynes, en y adioustāt encor contrepilastres avec leurs soubz arcures en l'ordre Doricq. Et pource iay dict q le prudent Architect par ceste fabricq porra estre apprins & endoctriné: instruit, diz ie, point seulement d'imiter les choses belles & bien faictes, mais a se garder de erreurs, tousiours considerant les quantitez de faictz & poix, que les choses inferieures ont a supporter. Parquoy soit l'architect pluost paoureux ou timide que trop hardy. Car c'il est craintif, il prēdra tousiours le plus certain, & fera ses choses cōsidereemēt, mesmes il vsera aussy de conseil, ouy de moindre quil nest, desquelz souuētsefois lon est endoctrine & enseigne. Mais cil est trop haultain, se confiant par trop en son scauoir & science, ne voudra auoir le conseil de personne, qui causera que souuētsefois il tombera en deffault, cest que ses choses paruiendront a mal. Or maintenant voulons retourner a la loge dont ie tiens mon propos, en donnant aulcunes reigles de la proportion. La largeur de l'ouuerture d'vng chescun arcure sera compartie en huit portions: trois dicelles seront pour la largeur d'vng chescun pilastre: & la haulteur dudiect arcure contiendra seize telles portions. Le front desdictz pilastres sera diuise en quatre, deux lon donnera a chescun pilastre desdictz arcures, & les aultres deux serōt pour la grosseur de la colomne. La haulteur du pedestal contiendra la moiētie de la largeur de l'ouuerture. La colomne sera haulte huit de ses grosseurs avec base & chapiteau. La haulteur de l'architrabe frise & corniche est de la quatriesme partie de la longueur de la colomne. Le second ordre sera diminue du premier la quatriesme partie, asscauoir, que depuis le paueement de l'ordre Doricque, iusques au sommet de sa corniche soit comparty en quatre portions, & trois d'icelles sera pour la totale haulteur de l'ordre Ionicque: & par ainly seront tous les membres en eulx mesmes la quatriesme partie diminuez. Le semblable fera on aussy avec le troiziesme ordre (lequel est Corinthe) contre le deuziesme, combiē quil ne soit icy, qui cause d'estre portraicte de trop grande forme: Mais affin de nō laisser le lēcteur confuz des deux petites colomnes, qui la suruiennent au mitant, & desirant scauoir cōme elles finēt: ie vous fais scauoir que trouuerez telle inuention en mon quatriesme Liure en l'ordre Doricque, sur le coste H.ii. Et combien qu'icelles colonnettes sont Ionicque, en mondict quatriesme Liure, ce neantmoins se peulrent faire Corinthe. Et a celle fin que l'architect peult auoir meilleure congnoissance des membres & cornichemētz d'icelle œuvre, ayie ces presentes bien voulu mētre en plus grande forme, & proportionnez apres le principal, i'entens les membres du premier ordre, car aux aultres ne pouoit on bonnement paruenir pour iceulx mesurer.




DES ANTIQVITES



Belvedere a l'entree des iardins du Pape oultre la loge que cy deuant iay demonstre, laquelle va tousiours en montant, ya vne montee fort belle, dont par icelle lon paruiet sur vne plaine, ayant la forme d'ung Theatre, laquelle montee est par l'ichnographie cy desoubz representee, y adioustant le profil dicelle en l'inferieure partie, a celle fin de la myeux entendre. Le n'ay icy tenu nulz comptes ou memoires d'aucunes mesures, mais seulement vueillant demonstrier l'inuention des degrez, avec le demy cercle de quelle forme il est. Ce demy cercle est fort esleue du premier iardin du Pape deuers le palais, & derrier le demy cercle lon trouue vne fort spacieuse plaine avecques beaucoup de beaulx appartemens, En laquelle place lon entre par les deux portes, que lon aperceoit aux deux costez de ce demy cercle: en icelle place sont plusieurs belles statues, & entre aultres ya le Laochoon, l'Apollon, le Tibre, la Venus, la Cleopatra, & Hercules.




VEcy le s'eue ou orthographie du deuandict plant, & ainsi comme iay dit, ne traict'eray daulcunes mesures, prisant seulement linuention dicelle, & combien que icy a chescun coste, soit demonstre vng pilastre avec ses deux colonnes, neantmoins se rencontrent ilz en aulcunes loges, comme cy deuant en est traicte, cōme il appert par les doubles colonnes & les nichetx avec les quadretx dessus. En la place de Beluedere ya encor plusieurs aultres choses que ie ne demonstre, & entre aultres, ya vne merueilleuse montee, au plant ou fond duquel ya vne fontaine, tresplanteuse de aue, laquelle montee est toute enuyronnee de colonnes en linterieure partie, lesquelles colonnes sont de quatre ordres, asscauoir Doricque, Ionicque, Corinthie, & Composite. Mais ce qui est a esmerueillier & chose ingenieuse, cest que entre lung des ordres a laultre ny est mise nulles diuisions, mais lon va de la Doricque en la Ionicque, & de la Ionicque en la Corinthie, & de la Corinthie en la Composite, avec si grande science & scauoir, que nulluy ne peult apparecevoir ou vng ordre prent fin & entre en laultre, de sorte que ie iuge que iamais Bramant ne feist si belle ne sumptueuse architecture, comme celle cy.






DES ANTIQVITES

AV dehors de Rome, A monte mario, ya vne tres belle place, avec toutes les portions que a vne place de plaisance appartiennent. Desquel les singulieres parties ou portions, ay me myeulx m'en taire que d'en trop peu parler. Mais ie demonstiray seulement vne loge avec sa face, ordonnee par le discret Raphael Durbin, combien quil avoit donne aultres appartemētz, & grand commencement daultres choses. Ce court il ores qu'il soit quarre, ce neantmoins l'avoit il ordonne en rondcur, selon que le fendemēt en partie le demonstre. Le vestibule signe par A, & les deux places B, & C, ne sont pas en telle forme, mais pour accomplir le plant, les ay ainsi mis. Car la part C, samortist & fine en vne montaignette, comme fait aussy la portion E, mais a l'autre cosle de la loge signe de F, ny est le demy cercle. Ce qui fut delaisse pour nō corrompre aucuns appartemētz, mais pour acompaignement lay voulu mettre la empres. L'ordre de ceste loge est fort beau, de laquelle les volseurs sont concordantemēt changees, car la partie du mitant est vne tribune ronde, & les deux des costieres sont en croisures, auquel ciel ou volseure & aussy au mures lehan de V denes a fait merueilles de Stucco, grotesques, & aultres estrangetez: Tellement que par la belle & bien entendue Architecture avec les aornementz de Stucco & de peintures, mesmes aussy les statues antiques y estantz, ceste loge peut bien estre appelle la tresbelle. Et la ou le demy cercle ne respondoit a l'autre, ne voulut l'architecte pourtant laisser de la orner & enrichir, mais feist la paindre, par son disciple Julio Romano en la face le grand Poliphemus, enuyronne de plusieurs Satires, laquelle œuvre, le Cardinal de Medici, qui depuis fut Pape Clement feist faire. Les mesures de ceste dicte Loge au gallerie, ne coucheray p escript, mais suffise l'invencion a l'architecte, combien que toutesfois toutes choses sont proportionnees apres le principal. Cy ensuyvant appareuez le sseuement ou orthographie & face de ceste dicte loge, resse les nichetz des costez lesquelz ny sont point.




PAr ces portions suyantes signees par B, & A, peut on comprendre la totale volseure de la deuant dicte loge, la beaulte de laquelle est totalement gisante en angle signee dune croix, lequel (compris aussy les trois aultres) fort bien se prepare a lesteuement de la tribune du mitant, & va tousiours par allieement avec duplication de pilliers, iusques a chescune face du pilastre: lesquelz pilliers (par la coronne qui des meure entiere) ne font sembler les pilastres trop delicat: mais plusost par telz brisementz du pilastre en deux pilliers, fait vng ample regard, & neantmoins ilz sont en termin d'ung ferme pilastre, car mesmes leurs bases leurs ensuyuent, & pource que la figure suyante, au pilastre nest demonstre qu'ung plat pillier avec vne piece dice luy, ie diz affin de le myeulx entendre, que chescune face des pilastres de linterieure partie dicelle loge ou gallerie, est aussy diuisee en trois parties, desquelles lon entendra & fera on deux pilliers platz, & sur les coingz avec vne entrecolonne. Et combien (comme iay dict) qu'ainsy soit quil ya deux platz pilliers avec vne entrecolonne, ce neantmoins parvient a estre vng pilastre.






Ntre toutes aultres villes & citez d'Italie, Naples est appelée La Gentile. Non seulement pour cause des grandz Barons, Seigneurs, Contes, & aultres innumérables nombres de gentilz hommes, mais est aussy dotée, de iardins, & maisons de plaisances, autant qu'en nulloes contrées des Ytales: Et entre aultre agréables & plaisantes places estantes situées hors de la ville: il ya vng Palais que lon appelle Poggio Reale: Lequel le Roy Alphonse feist edifier, pour son plaisir, au temps que (au parauant l'heureuse) Ytalie estoit en paix entretenue, & maintenant malheureuse par leurs discordz. Ce palais est de tres belle forme, & fort bien comparty, en sorte qu'en chescun coing ou anglet d'icelluy, lon porroit loger quelq grant Seigneur, & ce a l'occasion qu'il ya la six bonnes chambres, sans les mansions de desoubz terre, & aulcunes aultres secretes chambrettes. La forme de ce bel edifice est cy ensuyuant demonstre en l'ichnographie & orthographie. Mais des mesures n'en fais mention, pource que seulement m'ay arreste sur l'inuention: Car le prudent Architecte porra ymaginer de quelle grandeur il requiert auoir vne chambre, estantes toutes d'une grandeur: & alors par ceste chambre porra prendre toutes les mesures de la reste de l'edifice: duquel edifice (côme dict est) le noble Roy en vsoit pour sa plaisance, a cause qu'on s'accōmode & se ayde en este, & principalement aux grandes chaleurs, de places & lieux des champs. La court de cedit palais est enuironne de galleries l'une sur l'autre: & en la place du milieu signee par E, descend on par degrez embas en vne tresbelle pleyne terrasse: En laquelle place le Roy y estant avec telz Seigneurs qui luy plaisoit, & illec prenant son repas en banquetant, on faisoit ouurer quelque secretes places, par lesquelles subitement a vne veue d'eil ladicte place estoit toute remplie d'eau, tellement quilz se trouuoient tous baingnes: & quant il plaisoit a Roy faisoit incontinent sortir l'eau. Et la ny auoyt necessite de diuers habillemens pour soy racoustrer, ny aussy sumptueux & beaulx lietz acoustrez prest pour reposer iceulx a qui il plaisoit. O Italiennes concupiscences, comment estes vous adneantis & fondez par voz grandz discordz & inimitiez. Des plus beaux iardinages avec diuers compartimentz, de vergiers & arbres, de toutes manieres de fructz en plusieurs nombre: des estangz & poissons: des places pour diuers oyseaulx grandz & petitz: d'estables bien estouffees de toute sorte de cheuaulx & de plusieurs aultres choses, n'en declaireray nullement, parce que Marcus Antonius Michael gentilhomme d'icelle ville, tresentendu en l'architecture, & qui a beaucoup veu, en a assez amplement traicté en vne Epistre latine, enuoyee a vng sien amy. Mais pour retourner aux parties de ce present Palais, lequel est droictement quarre. Et si est par le dedens enuironne de deux galleries venantz l'une sur l'autre: dont au quatre angletz d'icelluy Palais, en dedens l'espeueur du mur, sont les montees a monter en hault. Les quatre loges ou galleries signees par B, n'y sont pas, mais pour commodite & aornement de l'edifice, seroient choses bien seantes d'y estre.

EN ceste inferieure figure ay bien voulu demonstrier l'orthographie du dehors & du dedens. La part signee de A, represente la partie de dehors. La part B, represente la gallerie du dedens. La part C, designe les mansions interieures. En ceste figure n'ay mis en pourtraict le toist courrant l'edifice, car a mon semblant ie vouldroie faire tel edifice plastree, en sorte qu'on en vsa pour vne ambulation a veoir les passaiges.




Le plant du Poggio reale de Naples.



DES ANTIQVITES




Considerant sur la belle edifice de Poggio Reale, m'est veu en pensee d'en mettre encor vne d'icelle maniere, mais d'aulte forme d'appartementz, & parauenture avec plus de commodite, parce que les mansions, sont toutes d'une grandeur, ce qui ne se concorde pas bien, mais est necessaire que la premiere soit plus grande que la seconde. En ceste edifice ne vous faictz aucune place ne lumiere par dedens, a cause que cest vne maison de champs, sans empeschementz d'aucuns costez, lequel a en tous les quatre coingz lumiere assez: Mais quelcun porroit dire, que la sale avec les quatre chambres, a loccasion de nauoir aucune lumiere que par les loges ou galleries, seroiēt obscures & tenebreuses, car ce ne peut estre iour par faict: Surce peut on respondre, que tel edifice est faict et compose pour vser en temps des grandes chaleurs, parce quil na aucune place au mitant, ce qui faict la sale avec les quatre chambres tousiours freisches, a loccasiō que le soleil ny peut entrer, Lesquelles places seront fort commodieuses & d'vysables a leur du midy. Et ores qu'icelles dictes places n'ayent si grant accomplissement de lumiere, comme aultres habitations, ce neantmoins obtiendront bien aussi ample lumieres qui leurs appartient, car de semblables se voyent a Bolongne, laquelle est de telle maniere, & avec ce ya encor en linterieure partie, places avecques loges, & est iournellement habitee: Cest edifice est de telle disposition, que si auant quaux coingz y soit bonne espeesur de muraille: La reste sera forte assez & se supportera bien, & ores que mesmes lesdictes murs fussent de moyenne espeesur, parce que les coings sont contre fortz lung de laultre, seront encor fort assez: Quant aux mesures ne me trauailleray den traicter, a loccasion que ce present est proportionnement faict. Le discret & expert Architecte porra ymager selon le contenu du poriet, la grandeur dune des places, & icelle compartir en autant de piedz, ou aulte mesure, par laquelle il porra mesurer tout le reste de ledifice. Et si la contree de la place le peut supporter, lon regardera premierement sur toutes choses a poser ceste edifice, que le soleil se viengne leuer a len contre de lung des coings, a celle fin que tous les costez soient participantz du soleil, car si lune face dicelluy estoit droit contre lo-rient, & laultre du coste doccident, parce sensuyuroit que le coste septentrional nauoit iamais soleil, laquelle seroit fort Romantique & mal saine.






N diuerſes manieres & ordonnances porroit on edifier ſur ce deuantdict plant, neantmoins parce que ceſte preſente eſt vne place de plaifance, m'a ſemble bon pour l'aggreablete, de la compoſer ſelon la Corinthe. Je ne m'empêſcheray a narrer les meſures ny hauteurs: car en mon quatrieſme Liure en l'ordre Corinthe. O. ij. trouuera on vng traictie, lequel avec le bon iudice de Larchitect ſatiffiera. Et pource que en ceſte face n'ya nulz reſcourſſementz, par leſquelz lon porroit congnoiſtre les loges ou galleries, & avec ce les lieux platz & enclos l'vng hors de l'autre, ie les meſteray cy par eſcript: Les deux pluſhault coſtez a cheſcun bout, leſquelz ſentendent auoir pilliers platz depuis le bas iuſques au hault: La partie d'entred'eux, laquelle n'eſt ſi haulte, ſentend auoir deux galleries ſuruenantes l'vne ſur l'autre, deſquelles galleries les colonnes veulent eſtre rondes, & cela ſe veult entendre derrier & aux deux coſtez: Lon porroit auſſy faire ſur icelles loges ou galleries quelq̃ pauement, ou autrement bien pourgeſte avec ſon appuy ſortant de la corniche du premier ordre de la figure deſſuſdite, pour reſiſter a la pluye & autres moiteurs; Et par ainſy auroit la ſale du mitant, enſemble les quatre chambres de la deuxieſme ordre, meilleure & pluſgrade lumiere. Pour deux raiſons ayie faiſt les petites fenestreſ ſuruenantes ſur les grandes de ladite premiere ordre: La premiere eſt, ſi lon veult faire les fenestreſ ſi baſſes de ſorte q̃ vne perſone eſtate aliſe porroit facilement veoir au dehors: & qu'icelles ne excedaſſent la hauteur de l'huys, par ainſi reſteroit trop deſpace & hauteur depuis leſdites fenestreſ iuſques a la traneure, ce qui fort occuperoit & prendroit la lumiere, & y feroit fort obſcur: mais y adiouſtât les petites fenestreſ, rendra a ladite ſale plus de clarte. L'autre raiſon eſt, q̃ les chambres d'empres la ſale n'ont q̃ faire d'eſtre de telz hauteurs, mais peult on faire la aulcunes chabres pendetes, dont ſes fenestreſ viendront a ſeruir. De pluſieurs autres choſes porroit on traictier, leſq̃lles ſont a la volente de Larchitect.



DES ANTIQVITES



ON trouue en Iherusalem au dedens d'une montaigne de pierre dure, vne edifice d'assez raisonnable grandeur envuyde hors d'icelluy mont par diuers instrumens, ainsi qu'en ceste figure d'embas lon peut apparcevoir : Et a celle fin q la place du mitant a raison de sa grande latitude, fut preseruee & asseuree des ruynes futures, y estoit au milieu d'icelle referue les deux grandz pilastres, & les aultres deux moyens aux costez, & les deux petitx au deuant : a celle fin (come dit est) que la volseure envuydee d'icelle montaigne, fut supportee d'iceulx pilastres: Au dedens de la premiere entree, y auoit quatre chapelletes: en la plus large place en ya dixhuiet: & en la place de derriere en ya deux, & vng huys ferme, lequel signifie qu'on passoit plus auant. Ces chapelletes susdictes, estoient places la ou on ensepulturoit les Roys de Iherusalem, selon que le Patriarche d'aquilea de alors, & a present Cardinal, m'en a racompte, & aussy faiet present de ce portraict. Quant aux mesures n'en auoit icelluy Cardinal aultre memoire, sinon que chescune dicelles chapelletes nestoiét de moindre largeur que dyne haulteur d'homme, par laquelle doncques lon peut comprendre la totale formosite & grâdeur de ledifice. Les figures A, B, denotent la forme desdictes chapelletes: ceste place n'auoit nulle lumiere, ny aussy lon ne peut aulcunement apparcevoir que oncques il y suruint lumiere quelconque, a l'occasion qu'icelluy edifice est fort parfond soubz la montaigne.



VNG TRAICTE

d'aulcunes choses merueilleuses

d'egipte.



INSY que maintenant nous auons veu & apperceu, que les choses des anciens Romains estoient fort merueilleuses deuant noz yeulx : Mais si possible estoit doncques d'estre desparty par la veue, ce que les Grecz au temps passe ont faictz (lesq̃lles sont toutes consumees) par aduenture porroient surmonter toutes les choses Romaines, veu que Rome & Venise sont fort aornees & enrichies des pillages & vsurpations, qui furent dudit pays admenees . Mais que declairerons nous des plus merueilleuses œures d'Égypte : lesquelles semblent estre plustost songes & fantomes, que choses vrayes . Neantmoins parce que Diodorus Siculus confesse, que luy mesme en a veu aulcunes vestiges d'iceulx : Et aussy qu'encor a present lon trouue illec pieces monstrueuses, lon en doibt tenir quelq̃ chose : Car entre aultres merueilleuses choses qu'il a veu, il recite d'une sepulture d'un Roy d'Égypte, appellé Simandius, duquel son pareil en grandz faictz ne fut oncques . Ceste sepulture doncques estoit la plus renommee & merueilleuse, que iamais fut edifiee de Roy : car ce grand edifiement contenoit dix stades, qui fait vne lieue Italienne & vng quart. Premieremēt estoit la porte avec diuerses belles pierres aornee : en laquelle y auoit vne entree, contenant deuz centz & vingt aulnes en longueur, & la haulteur estoit de quarante cinq Cubitus : & a la fin de ceste entree y auoit vng Peristilie, cest vng Courtil ou ambulation en carreure, avec ses loges ou galleries a lentour : & chescune gallerie estoit longue quatre centz & quarante aulnes : Aulquelles loges en lieu de Colomnes y estoient faictz animaux & bestions d'une seule piece de pierre : lesquelles estoient haultes de seize aulnes : Au dessus desdictes animalz au lieu de l'architrabe y estoient pierres large chescune de deux pas, cest enuyron dix piedz, estantz icel les aornees de figures Astronomiques, & le fons couche doultre maryn. Lon veoit aussy la vne aultreallee cōme la premiere, mais aorne de plus materiele taille, & a l'entree d'icelle appareceoit on trois grandes figures de marbre, faictes d'un Maistre appellé Mennon, dont l'une d'icelle figure estoit assise, & la long de son pied passoit deux toises, en sorte qu'elle outrepas soit en grandeur toutes les statues d'Égypte . Aupres de laquelle a chescun coste y auoit les deux aultres figures, qui ne montoient quasy que iusques aux genoulx de ceste du mitant, l'une estoit a la mere, & l'autre a la fille de Simandius dediee . Ceste œuvre n'estoit seulement merueilleuse pour cause de sa grandeur, mais aussy estoit excellente pour l'art qui y estoit conregardé, & mesmes par la diuersesorte & nature de la pierre, car lon ny veoit en telle grande piece la ou elles s'assembloient . L'inscription estoit, le suis Simandius Roy des Rois plus parfait : & qui scauoir vouldra de moy quelque aultre chose, ou en quel lieu ie gis maintenant & repose, s'efforce surmonter aucuns de mes haultz faictz . Il y auoit encor vne aultre figure apart, toute d'une piece, faicte pour la mere dudit Simandius, & estoit de vingt aulnes de hault : ayant sur sa teste trois enseignes Royales, en signifiante qu'elle fut mere, femme, & fille de Roy . Ceste porte passee y auoit encor vne aultre gallerie plus magnificq̃ que la premiere, pour les singulieres sculptures, esquelles lon veoit portraict la guerre de ce Roy Simandius, a lencontre des rebellans Bactrians, estantz soubz l'obeissance de son filz : Contre lequelz mena vng armee de quatre centz milles hommes de pied, & vingt mil cheualx : La quelle armee estoit diuisee en quatre, En la premiere partie y estoit taillé le contenu du siege de la ville du coste ou la riuere couroit : apres lon aperceuoit comment & en quelle ma-

niere le Roy combattoit a lencontre de ses ennemys, & par l'assistance d'vng Lion priue ou domestique incontinent furent mis en fuyte. En la seconde partie lon veoit mener les prisonniers avec les mains & genitoires coupees: vueillant demonstrier, qu'iceulx auoient este lasche de cuer & foible & imbecile de corps. En la troiziesme y estoient entaillees les sacrifices & les triumphes du Roy sur ses ennemys vaincuz. Et en apres veoit on au milieu de la place deux grandes statues toutte entieres, & chescune d'icelles contenoit en haulteur vingt six aulnes, & alloit on au peristyle par trois allees. Aupres de ces figures y auoit vng Pretoire suspen du sur colonnes, lequel contenoit a chescun coste deux centz vingt aulnes: En icelluy estoient plusieurs ymages de bois, lesquelles sembloit discorder en disputations, attendant la sentence de trente iuges: Au milieu desquels estoit le President assis pour iuger: icelluy auoit pendant a son col le signe de Verite, & auoit les yeulx entreouuertz, & autour de luy beaucoup & grand nombre de liures, vueillant par ce signifier, que les Iuges ne doibuent prendre regard a personne, & que le President doit seulement choisir & vsfer de la vraye verite. Passant oultre ceste place lon trouuoit au mesmes Pretoir ou maison vne sale, en laquelle de tous costez y auoit plusieurs chambres, ausquelles y estoient entretaillees diuerfes sortes de viandes prestes a manger. Et par dessus plusieurs aultres figures entretaillees, y estoit le Roy Simandius painct & estoffe de diuerfes couleurs, offrant aux Dieux tout lor & l'argent qu'il recepuoit annuellement de ses tributaires: dont toute la somme estoit la escripte, montant a trois millions & deux centz mille mines, qui vient a estre enuyron trente deux mil millions d'escuz. En apres trouuoit on la librarie, & au dessus de l'entree y estoit escript ce mot, La medecine de l'esperit: Et passant oultre veoit on les figures & ymages de tous les Dieux d'egypte, avec les dons & oblations qui leurs estoient presentez, vng chescun selon ce quilz leurs appartenoit. Et puis encor plus auant apparceuoit on Osiris, & tous ses succeffeurs, dominateurs d'egypte, demonstrent quilz auoient este fort assistant au peuple, tant pour l'institution des sacrifices, comme pour la bonne iustice quilz auoient vse entre les hommes. Au bout de ceste dite maison y estoit vng Edifice Royal, auquel y auoit vingt challitz consacrez pour Iupiter & Iuno, & en la superieurite estoit la statue & ymage du Roy Simandius, car son corps estoit la ensepuey. A l'entour de ceste edifice y auoit plusieurs chambrettes, ausquelles lon veoit painctes toutes les effiges d'animaulx que lon vsoit aux sacrifices d'egypte: & lesquelz animaulx ten doient & montoient deuers ladite sepulture: Laquelle sepulture estoit enuyronnee d'ung grand cercle d'or, contenant en circumference ou tour, trois centz soixante & cinq aulnes, & auoit vne aulne despesseur: Audiect cercle d'vne aulne a aultre, estoient descriptz les trois centz soixante & cinq iours de l'an, ensemble le cours des estoilles & planettes, avec leurs significations, selon l'obseruance d'egypte. Et veult on dire q̄ cediect cercle d'or fut emporte au temps que Cambises & les Perses occuperent la domination d'Egypte. Ce monument ou sepulchre de ce Roy Simandius, ne fut pas seulement le plus riche de tous les aultres, mais aussi le plus magnifique & excellent d'art & d'edifice. Plusieurs ans apres, vint Miris Roy d'Egypte, lequel fait edifier en Memphis du coste de Septentrion vng Portal, ceuvre par dessus tous excellent. Ce Roy fut celluy qui fait creuser & enfouyr (enuiron vne lieue Françoise) vng grand estang, de merueilleuse vtilite, & d'increable grandeur. Car il contenoit de tour, trois mille fix centz stades, comporte enuiron, deux centz vingt cinq lieues Françoises: & contenoit en profondeur, cinquante toises: Tellement que si on regarde a la grandeur de loeuure, a l'vtilite du pays d'Egypte, avec l'entendement dicelluy Roy, lon ne scauroit icelluy louer selon les merites. Cediect Roy Miris considerant que la creue & inundation de la riuere du Nil, estoit incertaine & immuable, & que icelle terre recepuoit sa fertilite dicelle, soit plus ou moins: a l'occasion de laquelle, il feist creuser & tirer icelle fosse, pour en necessite delaicher & recepuoir l'eau du Nil selon l'opportunitie, Et aussi a celle fin, que les fructz & labouraiges par faulte deuaes ne perissent, fait faire & tirer vng fosse depuis le fleuve du Nil, iusques audiect estang, long de quatre vingt & cinq stades, vient a estre plus de cinq Lieues françoises: & estoit large qua-

quarante toises. Par lequel fosse apres leaue dudiſt Nil admenee & conduicte audict eſtang, lon la conseruoit au seruice & vtilite des champs, en temps de necessite: Et ce par le moyen d'une escluse, fermant la bouche dudite fosse: laquelle n'estoit a clore ny a fermer qui ne couſta cinquante Talentz, qui vient a estre enuiron quatre mil cinq centz marks d'argent. Et estoit cecy encor en nature au temps de Diodore Sicu. L'estang ou lac s'appelloit Mirida, apres son aucteur Miris. Au mitant duquel estoit demeure vne mote, sur laquelle il feist edifier sa sepulture avec deux Pyramides, chescune de cinquante deux toises de haulteur: l'une estoit pour luy, & l'autre pour sa femme, Sur lesquelles il feist poser deux statues de pierre, assize sur vng throsne, cuydant par tel œuure, rendre immortelle l'ouuenance de ses vertueux faictz.

Plusieurs ans apres fut Maro Roy d'Egipte, lequel edifia pour soy mesme vne sepulture, appelée Laberinthe, chose certainement merueilleuse, & de grande edifice, non seulement pour la grandeur de l'œuure, mais pour cause de l'artifice. Car il n'estoit possible a ceulx qui leans en troient, de retourner dehors sans guide & aide. Et disent aucuns, que Dedalus veant icelluy fort s'esbaist & esmerueillie print le plant de ce, & en feist vng semblable au Roy Minos de Candie: lequel pour l'heur est tout consumé & adnichillez, Mais le premier estoit encor en estre au temps dudiſt Diodore Sic. Chemnis regna longuement apres en Memphis, lequel feist edifier la plus grande Pyramide, laquelle est comprise entre les sept merueilles du monde: & est distante de Memphis du coste de Libye de cent & vingt stades, qui font enuiron sept Lieues & demye de France, & du Nil enuiron trois Lieues. Laquelle Pyramide tant par l'artifice que par la grandeur de l'œuure, faict esmerueillir ceulx qui la regardent. La largeur du baſe d'ung quatriesme coste contenoit sept Centz & septante aulnes: & la haulteur neuf Centz aulnes. La cime de dessus estoit large soixante & cinq aulnes. Laquelle masse estoit de certaine pierre tresdure, pour durer eternellement: Car au temps de Diodore elle auoit desia duré plus de mil ans, & est encor pour le iourd'uy. Les pierres dicelle furent admenees Darabie, & fut la massonnée sur vne place sablonneuse, dont parce lon presuppole adcause qui ne si voit aucunes trouz a l'assistance des eschaffaulx pour icelle Pyramide escheuer, qu'ilz faisoient tout a l'entour vngne montaigne de sablons, tousiours les esleuantz a l'aduenant de la haulteur de l'œuure. Lon dist aussy qu'il y auoit trois Centz soixante Mil ouuriers adce ordonnez, & a l'acheuement dicelluy, ilz furent vingt ans. La seconde Pyramide feist faire Chabreus Roy d'Egipte: laquelle estoit de telle maniere & de la mesme pierre comme la premiere, mais point si grande. Car chescun coste de sa Baſe n'estoit que d'une stade de large, comporte enuiron cent & quatre toises, & n'a icelluy qu'une entree de l'ung des costez. Micerinus filz dudiſt Chabreus, feist edifier la tierce Pyramide, mais preuenue de la mort, n'accomplist ceste oeuvre. Elle estoit encor moindre, & en icelle estoit escript au coste Septentrional le Nom de l'aucteur Micerinus. Encor sans icelles en ya trois autres de la mesme sorte que les dessusdictz estoient mais encor moindres: car vng coste d'icelles n'oultrepassoit point quatre vingtz toises. La premiere fut faicte de Armeus, la seconde de Amasis, & la tierce de Masis, tous Roys d'Egipte.

Long temps apres regna Sabbachus comme Roy d'Egipte, mais pour certaines visions de laissant le Reaulme, vindrent illecques douze administrateurs ou gouuerneurs, lesquelz par bonne police & ordonnance gouuernerent ledit Reaulme en puissance de Roy l'espace de quinze ans. Et apres ce ordonnerent pour eulx tous ensemble, vne cōmune sepulture: A celle fin, qu'apres leurs deces ilz eussent la gloire d'auoir vng commun & seul sepulchre. En laquelle chose ilz s'efforcerent surpasser les oeures des Roys precedentz. Car ceste masse estoit composee avec tel artifice & magnificence, de sorte que si elle eust este parfaite auant leurs discordz encommence, elle fut surmontee d'oeuvre & d'excellence toutes les autres sepultures & monumentz de tous les Roys d'Egipte. Lesquelles choses estoient faictes sans besoing, ny necessite, avec grand despens perduz, combien quelles estoient merueilleuses a veoir. Ce que iamais ne scauroye priser, parce que ce ne sont que toutes vanitez & dommaiges.

CHOSÉS MERVEILLEUSES.

Mais plustost estimeroye de faire edifier Palais, Maisons, & semblables Edifices, pour commodite & vtilite du commun, avec telle forme & aornement, comme a iceulx seroit conuenable: Car veritablement la beaulte des Edifices est bien conuenable & plaisante pour les habitans. La gloire, louenge, & decor d'une ville, & chose plaisante a veoir, seulement estoit a priser ce que le Roy Miris feist faire a l'vtilite & prouffit de tout le pays d'Egypte.

F I N.



Visité & admis par Monsieur

Martin Cools, Curé & Pasteur de Saint Goze a Brusselles:
Par la Chancellerie de Brabant approuué & preuilegé,
& Soubsigné P. de Lens.

IMPRIME EN ANVERS, POUR

Pierre Coeck d'Alost, libraire iuré de l'Imperialle Ma-
iesté, par Gil. van Dieft. En Lan de nostre Seigneur
Mil, cinq centz, & cinquante, le .vij^e. iour de Iuillet.



PAR GRACE
ET PRIVILEGE IM-
PERIAL
LE.



APR 8 1936

